

YOHANIS

Ikanu Sou Iake rerihoni Yesus Anamana Mautunue

Yohanis ne Sou Iake rerihoni Yesus reini mo, rerihoni Yesus Kristus mo Ia seia. Ia mo, ihokai on roe noiyaha na iapuheu mansiau. Yohanis iruni na Yesus iatuhete sio mansiau, isuisene sio kupua, iuna sio matana oamahaiso, na iuna sima-simana. Iuna rai pusire suka samatoro, sio osotai, ouna sinsarai, na sio ororui roe hini, ne onona tonu iamahaiki honu.

Surate reini nene nanae Sou Iake, areimo tau nene sirita rerihoni sapan na Amari Anahatana iaisosi Yesus Kristus tau imatai na iamahaiki honu tau iusi mansiau no rosau, na ia seia man wain iparisaa tanui ouna iake nnai honu, na oamahaiso okatai rotu-tu ria supan.

Sani ita ihatae tau sura *Yohanis ne Sou Iake rerihoni Yesus* reini mo, “iahanai” ruae oi arihoni sura Sou Iake tonu waron tamena rai. (*Matius, Markus, na Lukas*). Areimo, tau Yohanis mo, iroma sirita panesi waron ruaya oi, waron noi sura Sou Iake tonu waron tamena rai. Ia iae iruni panesi rerihoni Yesus tau waimo hasae ikata sio umau man (3:1-21, 4:1-42, 13:1 - 17:25, 19:25-27, 20:11-18).

Ia sia wain ikanu Surate reini: Mai surate reini reasau ia-ia tewa rerihon ia seia sahoro ikanu surate rei. Ia wain ikanu surate reini mo, hasae isima na ruai osi “Yesus ne mampusue wain anoi runai nai osa” (13:23, 19:26, 21:20, 24). Sani pusu sio mainaya tau kereya naon-naone, ia rei mo, Yohanis, ia iae ia wain saka ikanu

surate1-3 *Yohanis* na *Yohanis isupu kakinatē*. *Yohanis* mo ia Yahudi, Yakobis wanin, ia iae ia isa arihoni Yesu ne mampusua hutusa rahana ua. Ia mo, saka ikata-kata Petrus runa Yakobis, tonuso ohaineke na Yesu nai osana onoo sae man waron sio mampusu tamena onoo tewa (Matius 17:1-13; Markus 5:37, 14:32-33). Yesu isaai na roe noiyaha suka, samatoro *Yohanis* iuna ia mainae tau sio wason oparisaa roe Yerusalem (Galatia 2:9; 2 *Yohanis* 1:1).

Surate reini mo, osi ia seia: Areimo tau *Yohanis* iuna ia mainae tau sio wason oparisaa roe Yerusalem, Ia mo, kani ikanu surate raini osi sio wason oparisaa roe kota rei runa sio sui supan man. Ne anamanae wani isupui arihoni sae wani ikanui rei mo, hasae osi sio wason oparisaa man tewa, ne osi sio wason oparisaa tau Yesu tewasi sui supan man oi. (20:31). Reiso, *Yohanis* ikanu surate reini mo, osi ia seia man, sio wason sio Yahudi na sio wason sio Yahudiu tewa. Arihon rei, reiso ianamana erepusu sio Yahudiu no monna mkane runa sio Yunani no monna mkane na ianamana rerihon Yesu mo, ia seia.

Yohanis ikanu surate reini nanie tau sae: *Yohanis* ianamana rerihoni nanie ikanu surate reini tau *Yohanis* 20:30-31. Ikanu surate reini na sio oparisaa ata Yesu mo Anahatana Anai. Oni iruni mataanoē asi, iasau nea ata, Yesu mo, Anahatana, na ikata Anahatana oni nante na tuniai reini waron tewasi (1:1-5). Erepusu Ia, mansiau titue-tue oationa Anahatana (1:18, 14:6-11).

Ia iae ikanu surate reini na sio oparisaa ata Yesu mo Ia wain Anahatana Ihitiki na Iapuheu

mansiau. Amari Anahatana iaisosi Yesus na ihokai mai tuniai na imatai iapuheu mansiau arihoni no rosau (3:16). Na sio wason oparisaa tanui oamahaiso rotu-tu ria supan okata Anahatana.

Surate reini resamai tau inasa rai:

1:1-18	Yesus mo, Ia seia.
1:19-35	Yohanis ia mamsohue isima runa Yesus mo, Ia
1:35 - 12:50	Yesus ne sima-simana runa ne matuhetena.
13:1 - 17:26	Yesus iatuhete ne mampusua.
18:1 - 20:29	Sio osota Yesus, sio ororui roe hini, oyo iamah
20:30-31	Nanie tu-tu Yohanis ikanu surate reini.
21:1-23	Yesus iatuhete ruai osi ne mampusua.
21:24-25	Yohanis ne anamanaya waron tau muie.

Yesus mo, Anahatana ne Sou

- ¹ Mataanoë, oni Anahatana ihaye tau tuniai reini tewasi, Ia isa wain.
Ia reimo, sio oaoiki tau Sou.
Sou rei ikata Anahatana.
Sou rei mo, Anahatana ruai.
- ² Ikata Anahatana oni ihaye tuniai reini tewasi.
- ³ Pusu Ia, Anahatana ihaye tau rai pusire.
Sani Ia wain tewa, Anahatana ihaye tau saisa tewa.
- ⁴ Ia sahoro iuna pusire ramahai.
Ia wain iapuhaita rei mo, irori manahane osi mansia pusiki na oanei sae sahoro manisate.
- ⁵ Mansia mo, openeso tau Sou rei, tau iatuhete ata ouna kihatene.
Ne sio kihatena onete kua Sou rei tewa.

Noo sani pumono renete kua manahane tewa.

Sou rei iatuhete sae sahoro manisate sirinia.

⁶ Anahatana iaisosi ia isa. Ia rei mo, nanai Yohanis.

⁷ Yohanis ihokai na isima runa manahane rei. Isima runai na mansia pusiki oparisaa tau manahane rei.

⁸ Ia mo, manahane rei tewa. Ia mo, hasae isima runa manahane rei man.

⁹ Ia wain sahoro ia manahane rei mo, Ia wain iatuhete sae wani manisate osi pusita. Ia mo, wain ihokai mai tuniai reini nea.

¹⁰ Ia mo, wain mai tuniai nea. Ia sahoro ihaye tau tuniai reini. Ne sio mai tuniai rei oanei tewa ata Ia mo, arihoni Anahatana.

¹¹ Ihokai mai ami Yahudiu. Tea mo, ami wan ruai ne mansiau wan iromama. Ne, ne mansiau, sio Yahudiu, sio panesi openeso tanui.

¹² Ne sio wason oatarimai mo, Anahatana ihitiso tau ne hehuka. Ihiti sio wason oparisaa tanui tau ne hehuka.

¹³ Ihitiso tau ne hehuka pusu no upu momou wason ne mansiau areimo tewa. Ihitiso tau ne hehuka pusu pina hanai no maue nanie osusu areimo tewa. Ne ihitiso tau ne hehuka areimo, tau Anahatana ruai sahoro nanie ihitiso.

¹⁴ Reiso Sou rei iamrai iuna mansia. Irue ikataso mai tuniai reini. Onoo ne kawasa nea. Ihokai on roe Amai Anahatana. Amai irui kawasa osiki. Ia mo, Ia osa ruai man. Masike mansiau opalalosa iae, irui iake mainae osiso sirinia. Iatuheteso runa sae wan manisate rerihoni Anahatana.

¹⁵ Yohanis isima nnai osi sio panesi. Reiso iakapona iahata, "Uasau nea ata Ia isa mka ihokai tau muie. Ia mo, ia mainae inesi au. Tea

mo, au wan tewasi, ia wain potuina nea. Ia reimo sahoro ain uasau nnai rei. Ia rei tea!"

¹⁶ Masike ita ipalalosa iae, irui iake mainae osi pusita ututa sirinia.

¹⁷ Tea mo, Anahatana irui ne maunauna osi Musa na isima runare osi rea upu momou. Ne, pusu Yesus Kristus, Anahatana iatuheteta ata, masike ita ipalalosa iae, irui iake mainae osita sirinia. Isima runa sae wan manisate.

¹⁸ Ia seia man inoo Anahatana tewa. Hasae Anai osa ruai tunne wain ihaineke runai man, sahoro isima runa Ama Anahatana osita nea.

Yohanis iruni rerihoni Yesus

¹⁹ Taue isa, sio mainaya arihoni akama Yahudi roe kota Yerusalem oaisosi sio imam umau runa sio arihoni ipane Lewi umau. Sio Lewi oanori roe Anahatana ne numa mainisie oakahai sio imam. Sio mainaya oaisosiso na oeuso oasei tau Yohanis. Oasei tanui ata, "Ano reini mo, ano seia?" Oyo isima runa Yesus osiso.

²⁰ Iasau mai uao anoa. Iahata, "Au mo, Au wan Aia wain Anahatana Ihitiki na Iapuheu Mansiau rei mo, tewa."

²¹ Ouni oasei tanui honu. Oahata, "Munata san rei mo, ano mo, ano seia? Ano reini mo, Elia si?" Iasau osiso, "Tewa! Au reini mo, Elia tewa."

Ne ouni oasei tanui honu. Oahata, "Pene tu-tu ano reini mo, ia mamsima runa Anahatana ne maunauna isa waini Anahatana itotoe runai nea rei te sae rei?"

Yohanis iasau osiso honu. Iahata, "Au reini mo, ia mamsima runa Anahatana ne maunauna waini itotoe runai rei mo, tewa."

²² Ne tau muie san rei, oasei tau Yohanis nai osa-sa honu. Oahata, "Aree asau mai ata ano

reini mo, ano seia? Ami mo, kahuræ anei na anunima, asau osi ma sio mainaya wason oaisosima reini.”

²³ Yohanis iasau osiso rerihoni Yesaya ne anamane isa. Yesaya mo, naone ia mamsima runa Anahatana ne maunauna isa. Yesaya ikanu ata, “Au reini mo, au wani uhatae osi mansiau pani otoa huie runa nioku mainae ata, ‘Seka tau anomo sani sio seka tau arena osi Upuri na inikui.’ ”

²⁴ Tau sio wason sio mainaya oaisosiso oasei rei mo, sio onata umau arihon akama Yahudi wasumo oi.

²⁵ Oasei tau Yohanis oi. Oahata, “Sani munata ano reini mo, Aia wain Anahatana Ihitiki na Iapuheu Mansiau tewa. Ano mo, Elia tewa. Ano mo, ia mamsima runa Anahatana ne maunauna isa waini itotoe runai nea rei tewa. Reiso, sapan na asohuso na mansiau oanei ata oarihoni no rosau nea?”

²⁶ Yohanis iasau osiso, iahata, “Au usohu mansia tau tihu. Ne, Ia isa wain ikatamo ne oationai tewa.

²⁷ Ia mo, mka ihokai tau muie. Ne Ia mo, Ia mainae inesi au. Reiso nanie unosu ne sandaliu arihoni ain atua mani oo, umoniki. Reiso unosure mo, pannuhu tewa.”

²⁸ Yohanis isohu mansiau poe nia Betania, poe Wae Yordan on poe hae rani mata msaie.

Yohanis iasau ata Yesu mka noo sani Rompa Anae wan sio ohunui na iusi re rosau

²⁹ Nene han san rei, Yohanis inoo Yesu ihokai mai tanui. Iahata, “Masi onoo! Ia mo, Anahatana iromai na irui ruai osi sio ohunui noo sani rompa

anae wan ita Israel ihunui na iusi re rosau. Tea mo, mka iusi mansiau no rosau.

³⁰ Ia onate rei sahoro uasau runai osimo rei. Uasau ata mka ihokai tau muie. Ia mo, Ia mainae inesi au. Areimo tau Ia mo, wain naone nea samatoro au.

³¹ Naone au ruaku uanei tewa ata Ia mo, Ia seia. Ne masike uanei tewa ata Ia mo, Ia seia, uhokaku na usohu omi Israel tau tihu na mansiau oanei ata oarihoni mo rosau nea. Usohumo na oationai.”

³²⁻³³ Pusi, oyo Yohanis isima osi mansiau rerihoni sae waron Anahatana iatuhetere osiki nea rei. Iahata, “We kakau waniu ee! Anahatana wain iaisosiku na usohuso na mansiau oanei ata oarihoni no rosau rai. Iasau osiku ata, ‘Sani anoo we Inaha isipui oyo iatasohoi tau Ia isa mo, Ia rei wain mka irui we Inaha osimo.’ Taa ihokai, uationai tewa ata Ia mo, Ia seia. Ne unoo Anahatana ne Inaha isipui on roe nante nooi sani manu puane hatae isa oyo iatasohoi roe tanui samatoro uationai.

³⁴ Unoo rai pusire tau ruaku matakua nea. Reiso usima osi pusimo ata Ia mo, Anahatana Anai.”

Yesus iroma Simon Petrus runa Anreas na ouna ne mampusua

³⁵ Nene han san rei, Yohanis waipo wae Yordan honu ikata ne mampusua ua.

³⁶ Taa inoo Yesus iniku, oyo iasau osi ne mampusua ua rei. Iahata, “Masi onoo! Ia mo, Anahatana iromai na irui ruai osi sio ohunui noo sani rompa anae wan ita Israel ihunui na iusi re rosau.”

³⁷ Taa oatinu sae wani Yohanis iasau rei, oyo uaso oeu pusu Yesus rei sirinia.

³⁸ Oyo Yesus iuni inoo hae muie, inoo uaso wason oeu pusui. Oyo iasei tau uaso. Iahata, “Uamo wan onina sae?”

Uaso oasau ata, “Ano Ona Matuhetene, Ano mo, aruea sui supa?”

³⁹ Iahata, “Mai na mka uamo ruamo onoo.”

Reiso uaso oeu okatai na onoo ata irue sui supa. Tau reimo kani yam ate ran manne. Oyo uaso orueso katai rotu-tu ranie resohui.

⁴⁰ Ia isa arihoni sio ua wason oatinu Yohanis ne anamanae oyo oeu pusu Yesus rei mo, nanai Anreas. Ia mo, Simon Petrus wanin.

⁴¹ Anreas inuniki on pan Yesus oyo ieui inina kakai Simon sansana. Isupui, oyo iasau osiki. Iahata, “Anoo! Ami asupu Ia wain sio oiki tau Mesias nea.” (Sio oiki tau Kristus oi. Kristus nene nohue mo, Ia Aia wain Anahatana Ihitiki na Iapuheu Mansiau.)

⁴² Oyo Anreas irori kakai osi Yesus. Yesus inoo mai Simon ia-ia, oyo iasau osiki. Iahata, “Nanam Simon. Amam nanai Yohanis. Ne uhete nanam tau Kepas.” (Kepas nene nohue tau sou Yunani mo, Petrus. Petrus nene nohue mo, *hatu*.)

Yesus iroma Natanael runa Pilipus na ouna ne mampusua

⁴³ Nene han san rei, Yesus iapamata sou nanie ieu poe otoa Galilea. Isupu Pilipus oyo iasau osiki ata, “Pilipus, mai na apusuku.”

⁴⁴ Pilipus mo, ia on pan kota Betsaida. Anreas runa Petrus iae on pani kota rei oi.

⁴⁵ Pusi oyo, Pilipus ieu isupu Natanael. Iahata, “Anoo! Ami asupu Ia waini naone Musa ikanu rerihoniki tau ne maunauna nea rei. Sio mamsima runa Anahatana ne maunauna iae

oasau runa Ia rei naone nea oi. Ia mo, nanai Yesus, Yusup anai hanaie. Ia mo, ia arihoni nia Nasaret.”

⁴⁶ Ne Natanael iahata, “Nasaret? Sae isa wan iake mo, rehokai on pan nia ikine rei mo, tewa!”

Pilipus iahata, “Munata san rei mo, mai na ruam anoo tau matam!”

⁴⁷ Taa Yesus inoo Natanael wain ihokai mai tanui, iahata, “Masi onoo ia rei ee! Ia mo, titue-tue ia Israel. Ia mo, ianei iakarota iakanihu anamanea tewa.”

⁴⁸ Oyo Natanael iasau osiki. Iahata, “Ama, sapani na Ano anei rerihoni au reini?”

Yesus iasau ata, “Oni Pilipus ieu ioia tewasi oimo, unooa. Ano wapo ai ara nohue asi.”

⁴⁹ Pusi, oyo Natanael iasau iahata, “Ano Ona Matuhetene! Au mato uanei reini ata Ano mo, titue-tue Anahatana Anai. Ano mo, ita Israel ma Ia Aia!”

⁵⁰ Yesus iasau honu ata, “Uasau ata unooa nea poe ai ara nohue man reiso aparisaa rei sirinia si? Atinu! Ano mo, mka anoo sae umau honu waron ranesi reini.”

⁵¹ Oyo iakapena iahata, “Oatinu ia-ia mai, nanie uasau osimo! Omi mo, mka onoo nante rehukai oyo Anahatana ne maisosia on roe noiyaha osipu osaa mai Au Tumata Reini wain Anahatana Ihitiku.”

2

Karisaa mausahae pani kota Kana

¹ Yesus iroma Natanael runa Pilipus tau ne mampusua suka, oyo nene poua pan san rei, karisaa mausahae isa pan kota Kana. Kota rei

mo, wapan otoa Galilea. Tau rei, Yesu inai waimo karisaa rei oi.

² Yesu runa ami, ne mampusua iae, sio oima tau ahokama tau karisaa rei oi.

³ Ne karisaa pusiki tewasi, tihu anggur pusire nea. Reiso Yesu inai iasau osiki iahata, "Ama! No tihu anggur pusire nea."

⁴ Yesu iasau ata, "Ina! Areini mo, nene orase tewasi tau uatuhete we kawasa. Reiso pene asau osi Au."

⁵ Ne Yesu inai iasau osi sio manorina ata, "Kahurae ouna sae man wan iaisosimo na ounai rei."

⁶ Pan rei mo, unena waron oapatau tihu tanre hua nome warumo. Unene osa reaiinu tihu kani liter 100. Sio Yahudiu oaiinu tihu tau unene san rei na osohu aio atua repusu no monna.

⁷ Yesu iasau osi sio manorina. Iahata, "Mai na oaiinu tihu tau unena rai ee!"

Reiso oaiinu unena rai tau tihu rotu-tu taua ia-ia.

⁸ Pusi, oyo iasau osiso ata, "Eu na ripa tihu mkane arihoni unene isa na roriki osi ia karisaa upue."

Reiso orori tihu rei osi ia karisaa upue rei.

⁹ Tau ia karisaa upue rei ininu rea tihu wan ororiki osiki rei mo, tihu rei mo, iahanai reneniki tau tihu anggur nea. Ia karisaa upue rei ianei tewa ata tihu anggur reimo, onanai on supa. Ne sio manorina wason ororiki rei oanei. Irea tihu anggur rei iake nai osa. Reiso ioi ia hanaie wain iaisenei rei.

¹⁰ Iasau osiki ata, "Tau maisena mo, sio saka ohoka tihu anggur wan iake nai osa naone. Sani sio wason ohoka tau maisene rei oninu rotu okua tewa samatoro ihoka tihu anggur wan iake

mainae tewa tau muie. Ne ano mo, ahoka tihu anggur wan iake mainae tewa naone samatoro ahoka tihu anggur wani iake reini tau muie.”

¹¹ Sae wan Yesus iunai pani kota Kana rei mo, ne sima-simane wan retuhete ata ne kawasa arihon Anahatana mataano. Sima-simane wani iunai rei mo, iatuhete ne kawasa wan mainae osi mansiau. Ne mampusua oparisaa tanui tau rei sirinia.

¹² Pusi oyo, Yesus na inai, ne waniu, runa ne mampusua oeuso na pan kota Kapernaum. Orueso pan rei onona inasa asi.

Yesus inei sio wason oahen roe Anahatana ne numa mainisie

¹³ Haineke ami Yahudiu ma karisaa anoma rapeka na Anahatana ihoka ma upu momou arihon otoo Mesir nea, reiso Yesus ieu roe kota Yerusalem.

¹⁴ Hoka roe, ieu roe Anahatana ne numa mainisie nene nusue. Inoo sio wasumo oahen koropou, rompau, runa manu puana na sio wason ohane oatanimare osi Anahatana. Inoo sio umau oi wasumo orueso noi no meyau tau otuka kepen Roma tau sio no kepen.

¹⁵ Inoo san rei reiso isapa kasapute isa arihon awane. Oyo inei pusiso arihon Anahatana ne numa mainisie runa no koropou na no rompau pusire oi. Iuni hehi sio wason saka orue otuka kepen rei no meyau na iuna iahurara no kepen pusire oi.

¹⁶ Oyo iasau osi sio wason oahen manu puana rai ata, “Oeumo runa mo manua rai! Pene ouna Au Amaku ne numa mainisie reini mo tau naniamo ohane oahen.”

¹⁷ Yesus ne mampusua onoo Yesus iuna san rei, oyo anoo rapeka runa sae wan okanui tau Anahatana ne anamanaya. Okanu ata Ia Aia wain Anahatana Ihitiki na Iapuheu Mansiau iasau,

“Anoku runa me numa mainisie.

Reiso onesiku rotu-tu umataku iae iake sirinia.

Hete sae, oamuiira me numa.”

¹⁸ Sio mainaya arihon akama Yahudi oasau osi Yesus. Oahata, “Atuhete osima ata me kawasa aneni ma monna. Mai na una sima-simane isa na ami anei ata Anahatana irui kawasa osia.”

¹⁹ Oyo Yesus iasau osiso ata, “Okohu Anahatana ne numa mainisie reini, mka onona ua mani oo, uapuooi honu.”

²⁰ Sio Yahudiu oahata, “Ee! Anahatana ne numa mainisie reini mo, sio onanai musum hutu ate rahana nome, reiso pene asau ata mka apuooi tau onona ua man!”

²¹ Ne oanei tewa sae wan Yesus iasau rei. Tau sae wan Yesus iasau rerihoni Anahatana ne numa mainisie reimo, waimo iasau rerihoni ia ruai tinain.

²² Imatai, oyo iamahaiki honu, samatoro ami, ne mampusua, anoma rapeka runa sae wan naone iasau rerihoni Anahatana ne numa mainisie rei. Anoma rapeka oyo, aparisaa Anahatana ne anamanaya waron raasau ata Ia Aia wain Anahatana Ihitiki na Iapuheu Mansiau mka iamahaiki honu. Aparisaa ata sae waron Yesus iasau runare reimo, titue.

²³ Yesus irue roe Yerusalem asi tau karisaa anoma rapeka na Anahatana ihoka ma upu

momou arihon otoa Mesir. Reiso sio panesi onoo Yesus iuna sima-simana waron ratuhete ata ne kawasa arihon Anahatana oyo oparisaa tanui.

²⁴ Ne Yesus mo, iparisaa tau sio tewa. Areimo tau ianei pusiso anoo nea.

²⁵ Ianei mansia anoi, mansia ne hali nea. Reiso inina ia isa tewa na isima rerihoni mansia mo, tewa.

3

Yesus iaunau Nikodemus

¹ Ia hanaie isa nanai Nikodemus. Nikodemus mo, ia isa arihon sio onata arihon akama Yahudi. Ia mo, ia isa arihoni sio mainaya wason orime sio Yahudiu.

² Taue isa ihokai mai Yesus tau pumono. Hoka mai, iahata, “Ano Ona Matuhetene. Ami anei ata Ano mo, Anahatana iaisosia mai na nanie atuhetema. Tea mo, hasae ia isa wain Anahatana ikata runai sahoru ne kawasa iuna sima-simana sani Ano reini.”

³ Iahata, “Atinu mai ia-ia nanie uasau osia. Ia seia man iae wain iamrai honu tewa, mka Anahatana irime ne mansiau, ia mka ipusu tewa.”

⁴ Iahata, “Sapan na ia isa wain ia mainae nea, iamrai honu? Kani inusui pan inai tiai anoe honu na iamrai nai ua?”

⁵ Iahata, “Atinu mai ia-ia nanie uasau osia. Sani ia isa nanie ipusu tau Anahatana irime ne mansiau, ia mo, kahurae osohu heu ne rosau tau tihu. Na kahurae Anahatana ne Inaha irui kawasa osiki na ne hali honue.

⁶ Ia isa iamrai arihoni inai, areimo tinain. Ne ia isa iamrai honu arihoni Anahatana Ne Inaha, areimo ia rei ne inaha remahaiki.

⁷ Pene asira sani uasau ata kahurae pusimo oamrai honu.

⁸ Atieu sani ihute reuhona sui supan man repusu ruae nene maue. Ita hasae iatinu nene tinunue man. Ne inoo mosai tewa. Ianei tewa, kani on supa, reeu sui supa. Arei iae sani pusiso wason oamrai arihoni Anahatana Ne Inaha. Omi oaneiki tewa.”

⁹ Iahata, “Areimo sapan?”

¹⁰ Iahata, “Ira oe! Ano reini mo, atuhete sio Israel. Ne anei rerihoni sapani na oamrai honu tewa, si? Reiso mka atuheteso sapan?

¹¹ Atinu mai ia-ia nanie uasau osia. Ami asima runa sae waron aneire rerihoni Anahatana ne Inaha nea. Asima runa sae waron anoo tau matama nea. Ne omi mo, openemo parisaa.

¹² Usima runa sae waron mai tuniai reini ne omi oparisaa tewa. Reiso sapani na omi oparisaa sani usima runa mka sapan roe noiyaha?

¹³ Ia isa man iae isaai roe noiyaha tewa. Ne hasae Au Tumata Reini, Anahatana Ihitiku, sahoro ukaisunu on roe noiyaha nea.

¹⁴ Naone Musa iapusaa tekene nene siaie* tau hini pan otoa huie. Iapusaai na ia seia wain tekene reotoi oyo iarinaa na roe tanui, imatai

* **3:14 3:14** Naone Musa iapusaa **tekene nene siaie*** tau hini pannuhu sio Israel opalalosa nea. Reiso Anahatana iapasanaso iuna teke minna raotoso. Oyo Anahatana iaisosi Musa ipunu tekene siaie wan iunai arihon tampaka roe hini. Iuna san rei na ia seia man wan iarinaa inoo roe tekene siaie rei, oyo tekene nene minne iake rei sirinia. (Sio Israel pan Otoa Huie 21:4-9)

tewa. San rei iae na Au oi. Kahurae Au Tumata Reini, Anahatana ihitiku, mka sio oapusaaku roe hini oi.

¹⁵ Oapusaaku roe hini na ia seia man wain iparisaa tanuku, mka iamahaiki ikata Anahatana rotu-tu ria supan.”

¹⁶ Anahatana anoi runa mansia mai tuniai reini pusiki mainae rotu-tu irui Anai hanaie wain ia osa man. Iruiki na ia seia man wain iparisaa tanui, mka imatai rotu-tu ria supan tewa. Ne mka iamahaiki ikatai rotu-tu ria supan.

¹⁷ Tea mo, Anahatana iaisosi Anai rei, na iapasana omi mai tuniai reini tewa. Ne nanie iapuheumo na orue okatai rotu-tu ria supan.

¹⁸ Ia seia wain iparisaa tanui, mka Anahatana iapasanai tewa. Ne ia wain iparisaa tanui tewa rei mo, Anahatana iasau nea ata nanie iapasanai. Tea mo, iparisaa tewa tau Anahatana Anai wain Ia osa man.

¹⁹ Anahatana iapasana sio mai tuniai reini san rei. Anai ihokai mai tuniai reini atieu rei sani manahane na iatuhete sae wan manisate osi mansia. Ne sio anoo runa pumono. Anoo runa kahatene. Anoo runa manahane rei tewa. Tea mo, no atata kahatena. Reiso mka Anahatana iapasanaso.

²⁰ Ia seia man wain ne atata kahatena, ipenei tau Ia wain sani manahane rei. Ipenei ihoka ruai mai Ia wain sani manahane rei. Pene rotu-tu ne kahatena rai onoore.

²¹ Ne ia seia wain ipusu Anahatana ne mau-nauna waron titue, mka ihoka ruai mai Ia wain sani manahane rei. Ihoka ruai na sio onooi na oanei ata anoi tau Anahatana.

Yohanis mamsohue iasau ata Yesus mo, Ia mainae inesi ia

²² Taue isa Yesus ieu ikata ami ne mampusua pan otoa Yudea. Aruema pan rei na asohuso na mansiau oanei ata oarihoni no rosau nea.

²³⁻²⁴ Tau rei mo, Yohanis inusu pui tewasi. Reiso ia iae waipan isohuso na mansiau oanei ata oarihoni no rosau nea oi. Isohuso pan nia Ainon. Ainon mo, haineke na nia Salim. Yohanis isohu mansiau pan niane rei tau nene waena panesi. Sio panesi saka ohokaso na Yohanis isohuso pan rei.

²⁵ Taue isa Yohanis ne mampusua umau otuntana runa ia Yahudi isa rerihoni sio Yahudiu no mon mamsohue nene maunauna.

²⁶ Oyo Yohanis ne mampusua oeuso mai tanui oasau osiki. Oahata, “Ano Ona Matuhetene! Anom repeka runa ia onate wain ikataya ria wae Yordan on pan hae rei asi te tewa? Ia wain asima nnai osima rerihoniki rei. Muie reini wain isohuso na mansiau oanei ata oarihoni no rosau nea. Sio panesi wason oeuso ria tanui. Oeu mai ami tewa nea!”

²⁷ Oyo Yohanis iasau osiso. Iahata, “Ia seia man mka iuna kua sae isa tewa, sani Anahatana irui kawasa osiki tewa.

²⁸ Oatinu au uasau osimo nea ata au reini mo, au Aia wain Anahatana Ihitiki na Iapuheu Mansiau mo, tewa. Ne au reini mo, Anahatana iaisosiku uanaonei na useka tau mansia anoo osiki.

²⁹ Atieu rei sani Ia mo, Ia hanaie wain iaisenei. Au mo, sani ne neta. Ne neta inapai ihoka. Ne neta rei iatinu nioi, anoi mirike. Arei iae nooi

sani au oi. Anoku mirike nai osa tau uatinu sae wan iasau rei osiku.

³⁰ Ia mo, kahurae Ia mainae inesi honu. Na au mo, kahurae pene unesi Ia.

³¹ Ia mo, ihokai on roe noiyaha. Reiso Ia mo, ia mainae inesi ia sia man. Ne sio wason oamrai arihoni no mansia mainaya mai tuniai reini mo, sio mansiau man. Hasae oanamana rerihoni sae waron mai tuniai reini. Ne Yesus ihokai on roe noiyaha reiso Ia ne anamanaya mainaya ranesi ia sia man.

³² Isima rerihoni sae waron inoo runa iatinure roe noiyaha nea. Ne sio panesi oparisaa tau sae waron iasau runare rei tewa.

³³ Sio wason oparisaa tau sae waron iasau runare rei mo, noo sani oamanaku ata sae waron Anahatana iasau runare rei mo, pusire titue.

³⁴ Ita ianei ata pusire titue tau Yesus mo, Anahatana sahoro iaisosiki. Iaisosiki na isima runa Anahatana ne maunauna. Pusire titue tau Anahatana iuna ne Inaha iruei pan Yesus anoi.

³⁵ Anahatana anoi runa Anai hanaie na irui kawasa pusire osiki.

³⁶ Reiso ia seia man wain iparisaa tau Anahatana Anai mo, wain iamahaiki ikata Anahatana rotu-tu ria supan nea. Ne ia seia wain iparisaa tau Anahatana Anai tewa, areimo mka iamahaiki ikata Anahatana rotu-tu ria supan tewa oi. Ne Anahatana anoi resaa tanui na mka iapasanai.”

4

Yesus ianamana runa ia pina Samaria

¹ Sio onata arihon akama Yahudi oatinu ata sio wason oeuso noi Yesus na isohuso na mansiau

oanei ata oarihoni no rosau nea, sio panesi onesi sio wasoni oeuso noi Yohanis.

² Aikee Yesus sahoro isohuso tewa. Ne ne mampusua sahoro osohuso.

³ Upuri Yesus iatinu ata sio onata arihoni akama Yahudi oaneiki nea oyo ikata ne mampusua na oeuso arihoni otoa Yudea na onunso pan otoa Galilea.

⁴ Onunso poe otoa Galilea mo, kahurae oniku pusu otoa Samaria.

⁵ Oeu rotu-tu ohokaso pan kota isa. Kota reimo haineke runa tuamane wan naone upuri Yakup iruiki osi anai Yusup. Kota rei nanae Sikar.

⁶ Pan tuamane rei mo, parike isa wamo. Parike reimo naone Yakup ne parike. Yesus resuniki nai osa tau oeu hainau. Tau rei, ranie katopu. Yesus resuniki, reiso iruei haineke parike rei

⁷⁻⁸ oo, ne mampusua oeuso poe kota na ohane muaine. Sira tau ia pina Samaria isa ihokai nanie iripa tihu poe parike rei. Yesus iasau osiki. Iahata, “Ano pina onate, rui we tihu mkane na uninu ee.”

⁹ Ne ia pina onate rei iasau. Iahata, “Ama, Ano reini mo, Ano Yahudi. Au mo, au Samaria. Sapani na ainisi tihu arihoni au Samaria reini?” (Ia pina rei iasau san rei tau sio Yahudiu mo, openeso tau onusu hoka tau sio Samaria.)

¹⁰ Oyo Yesus iahata, “Ina, sani ano anei Anahatana nanie irui sae osia na anei Ia sia sahoro wain iainisi tihu arihonia reini mo, mka ano ruam ainisi tihu arihoniku. Ainisi tihu oyo mka urui tihu wan reunaya amahaia.”

¹¹ Oyo iahata, “Upu, me titipate tewa. Samatoro parike reini mo, naue wapo hainau. Reiso mka asupu tihu wan reunaku uamahaiku rei sui supa?

¹² Mani upu Yakup iarihoni parike reini osima. Ia ruai runa ne upu momou oninu arihoni parike reini. Ne une-uneu, koropou iae raninu arihoniki oi. Ano ata kani Ano mo, Ano mainae anesi ami ma upu Yakup tu-tu arui tihu wan reunama amahaima rei si?”

¹³ Yesus iahata, “Ia seia wain ininu tihu arihoni parike reini mka anoi kasae honu.

¹⁴ Ne ia seia wain ininu tihu wan Au uruiki osiki, ia mo, mka anoi kasae tewa rotu-tu ria supan. Erenesi honu, tihu wan uruiki osiki rei mo, nooi sani waene hunae wan renia sui osa on pan anoi. Waene hunae rei reunai iamahaiki ikata Anahatana rotu-tu ria supan.”

¹⁵ Ne ia pina rei ianei sae wan Yesus iasau runai rei tewa. Reiso iasau ata, “Upu, munata san rei mo, rui tihu rei osiku mai nea, na pene anoku kasae nea. Na pene ueuku mai uripa tihu sui osa nea.”

¹⁶ Oyo Yesus iahata, “Eua na aoi saham mai, samatoro eu akatai mai rei.”

¹⁷ Iahata, “Ne au mo, uausahaku tewasi.” Yesus iahata, “Sae wamo asau rei mo, titue. Ano mo, ausahaya tewasi.

¹⁸ Ano mo, ausahaya nai nima nea. Ne ia waipo iruei ikataya poe me numa rei mo, saham tewa oi. Tea mo, uamo oaisenemo tewasi. Reiso sae wan inaku asau rei mo, titue.”

¹⁹ Iahata, “Upu. Wan mato uanei ata Ano mo, Ia mamsima runa Anahatana ne maunauna.

²⁰ Ne nanie uasei tanua ee. Ami ma upu momou oainisi oainaa na Anahatana mai tinetae reini. Ne, omi Yahudiu oasau ata ita mo, kahurae iainisi ainaa na Anahatana roe kota Yerusalem. Reiso sae sahoro wan manisate?”

²¹ Oyo Yesus iasau ata, “Ano pina onate, parisaa sae wan nanie uasau nnai reini. Mka omi oainisi oainaa na Anahatana sui supan man. Oainisi oainaa nnai mai tinetae reini tewa nea. Oeu roe kota Yerusalem iae, tewa nea.

²² Omi Samariau mo, oainisi oainaa na Anahatana ne oationai tewa. Ne ami Yahudiu mo, ainisi ainaa nnai mo, ationai nea. Tea mo, Anahatana itotoe nea ata mka Ia Yahudi isa ihokai na iapuheu mansia na pene Anahatana iapasanaso.

²³ Ne sani pannuhu nene umetene nea, sio wason titue-tue oainisi oainaa runa Anahatana, mka oainisi oainaa nnai runa kawasa arihoni Anahatana ne Inaha. Sio iae mka oainisi oainaa na Anahatana pusu Anahatana ne maunauna waron titue. Umetene rei mo, repa nea rei. Amaku inina na ita iainisi iainaa nnai san rei.

²⁴ Anahatana mo, Inaha. Reiso sio wason nanie oainisi oainaa nnai mo, kahurae oainisi oainaa nnai runa kawasa arihon ne Inaha. Sio iae kahurae oainisi oainaa runai pusu ne maunauna waron titue.”

²⁵ Oyo ia pina ona Samaria rei iasau osi Yesus. Ia-hata, “Ama! Au uanei ata Ia Aia wain Anahatana Ihitiki na Iapuheu Mansiau mo, mka ihokai. Sani ihokai nea, mka isima na rai pusire osita.” (Ia Aia wain Anahatana Ihitiki na Iapuheu Mansiau mo, oaoiki tau Kristus.)

²⁶ Yesus iahata, “Ano pina onate. Ia wain ano

asau ata Aia rei mo, Au. Au wan uanamana runaya rein, tea!"

²⁷ Sira tau ami, Yesus ne mampusua, ahokama on poe kota. Asira tau Yesus waimo iruni runa ia pina wain isupui sinasi rei. Ne ia sia man iasei tewa arihoni ia pina rei ata, "Nanie anina sae?" Ia sia man iasei tewa tau Yesus ata, "Nanie anamana na ia pina rei tau sae?"

²⁸ Pusi oyo, ia pina rei ieui iarihon ne tihu naniae rei sirinia, oyo ieu na poe kota na isima osi mansiau. Iahata,

²⁹ "Mai na ieuta pan, inoo ia onate isa repan. Iasau runa sae man waron au unare rei. Pene tu-tu Ia sahoro Ia Aia wain Anahatana Ihitiki na Iapuheu Mansiau rei te sae rei?"

³⁰ Oatinu san rei oyo, oeuso rei sirinia. Oeuso, ohokaso arihoni kota, na oeuso pan osupu Yesus.

³¹ Oo ia pina sinasi rei ieui iarihonima, ami ne mampusua atentene tau Yesus na iaiki mkane. Asau ata, "Ano Ona Matuhetene, mai na aia mkane ee!"

³² Ne Yesus iasau osima. Iahata, "Au mo, we muaina waron tau uaiku. Ne omi oaneiki tewasi."

³³ Reiso ami ase i tau umau oahata, "Pene tu-tu sio umau orori muaina osiki nea te sae rei?"

³⁴ Oyo Yesus iasau osiso, "Amaku Anahatana iaisosiku na upusu ne maue na una sae waron inina na Au unare. Uamahaiku na una san rei, areimo sani Au we muaina.

³⁵ Mansiau saka oasau ata, 'Nesie hunana ate oyo iapahia nisi tea!' Ne Au uasau osimo onoo sio Samaria wason sio Yahudiu tewa. Sio nanie oparisaa we maunaune. Sio mo, nooso sani

atuhu isia noi nisi waron nanie mtuaya nea, reiso nanie oapahia nisi nea.

³⁶ Ia seia wain isima runa Au osi mansiau, ia mo, nooi sani ia wain irahu nisi. Oyo ia sia sahoro iakahai sio mansiau rei na oparisaa tau Au, ia rei mo, nooi sani ia wain iapahia nisi. Iapahiai na isupu atuhu isia tau rekati ne kausa wanaya. Ia wain iapahia nisi rei mo, noo sani ia wain iaunau sio wason oatinu rerihoni Au oyo oparisaa. Oparisaa oyo oamahaiso okata Anahatana rotu-tu ria supan. Mka ia wain iaunauso isupu ne pahalaa sani ia wain iapahia nisi isupu nene atuhu isia. Reiso anoi mirike noo sani ia wain iapahia nisi anoi mirike.

³⁷ Reiso sani sou nanae reini mo, manisate. Sou nanae wan reasau, 'Sio umau orahu nisi, oo sio umau honu oapahia nisi.'

³⁸ Au uaisosimo na oeu oaunau sio wason mka oparisaa mo maunaune rei. Ne rotu-tu oparisaa mo, noso sio umau honu oeu oaunauso oanaonemo. Areimo sani oapahia nisi wan omi ruamo orahui tewa. Sio umau orahu nisi rei naone. Omi mo, hasae oeumo pan oapahia atuhu isia pan nisi wani sio umau orahui rei."

Sio Samaria panesi oparisaa ata Yesus wain Ia Aia wain Anahatana Ihitiki na Iapuheu Mansiau

³⁹ Ia pina onate wain Yesus ianamana runai iruni osi sio pan kota rei oyo sio Samariau panesi oparisaa tau Yesus. Oparisaa noso ia pina onate rei iasau osiso ata, "Ia onate reini iasau osiku runa sae man waron unai."

⁴⁰ Reiso sio Samariau rei ohokaso mai Yesus. Hoka mai, oapamanui na iruei ikataso pan no kota rei. Reiso iruei ikataso onona ua pan rei.

⁴¹ Sio panesi honu oparisaa tau Yesus tau rua o oatinu ne maunauna.

⁴² Sio oasau osi ia pina ona Samaria rei ata, “Ano pina onate, naone ami aparisaa tau Ia onate reini mo, repusu sae wani ano asau osima rei. Ne muie reini ami aparisaa pusu ami ruama atinu ne maunauna nea oi. Ami anei ia-ia nea ata Ia reini mo, titue-tue iapuheu mansia na pene Anahatana iapasanaso.”

Yesus isuisene ia iki hanaie isa

⁴³ Yesus iruei pan kota Sikar onona ua pusi oyo, ieu pani otoa Galilea.

⁴⁴ Naone ruai iasau nea ata, “Sio mansiau oamui ia mamsima runa Anahatana ne mau-nauna noi ruai ne niane tewa.”

⁴⁵ Ne tau ihokai pan otoa Galilea, mansiau oapusaai ia-ia. Tea mo, rua onoo pusire waron Yesus iunare roe kota Yerusalem tau karisaa anori rapeka runa Anahatana ihoka rea upu arihoni otoa Mesir.

⁴⁶ Yesus ieu honu pan nia Kana wapan otoa Galilea. Naone Yesus iuna tihu reneniki tau tihu anggur pan niane rei. Niane rei mo, hainau arihoni kota Kapernaum tewa. Pan kota Kapernaum mo, ia onate isa iruei pan rei. Ia onate rei reimo, ia aia hanai wanane isa. Anai hanaie waipo ikupui mtinte.

⁴⁷ Reiso iatinu ata Yesus wain ihokai on pani otoa Yudea na waipo otoa Galilea, oyo ieu poe Yesus na iapamanui. Iahata, “Upu, uainisi arihonia na aeu akataku poe Kapernaum. Tea

mo, anaku waipo ikupui mtinte. Nanie imatai nea. Uainisi arihonia na asuisenei ee.”

⁴⁸ Oyo Yesus iasau ata, “Waniku sin, kakaku sin! Omi openemo oparisaa tau Au sani onoo sima-simana waron ratuhete ata no kawasa arihon Anahatana runa sima-simana waron raasiraso tewasi. Onoo sima-simana samatoro oparisaa tanuku.”

⁴⁹ Oyo ia rei iahata, “Upu, uainisi arihonia na mai aeu akataku nea. Pene tu-tu anaku hanaie imatai.”

⁵⁰ Ne Yesus iasau ata, “Amaku, pene anom reuponu. Anunia nea. Anam hanaie waipo iake nea.”

Ia onate rei iparisaa tau sae wan Yesus iasau rei oyo inuniki na poe ne numa.

⁵¹ Wain arena tihue asi, sira tau ne sio makahaia ohoka osima osiki. Oahata, “Upu! Upu! Anam hanaie iake nea.”

⁵² Reiso iasei tanso ata, “Ne kupue iake tau yam ina?”

Oasau osiki ata, “Potusi! Yam osa ranie katopu ne patane titie tewa nea.”

⁵³ Oyo amai anoi repeka rei sirinia. Anoi repeka runa potusi yam osa ranie katopu mo, Yesus iasau osiki ata, “Anam hanaie iake nea.”

Reiso ia onate runa sio pusiso wason orueso okatai noi ne numa rei pusiso oparisaa tau Yesus.

⁵⁴ Areimo Yesus iuna sima-simane wan retuhete ata ne kawasa arihon Anahatana nai ua nea on ihokai mai Galilea on poe otoi Yudea.

5

Yesus isuisene ia kupue isa

¹ Taue isa Yesus ieu na roe kota Yerusalem. Ieu roe, nanie ihokai tau sio Yahudiu no karisaa isa roe rei.

² Roe kota rei mo, waene isa wamo. Waene rei mo, wamo haineke kota Yerusalem nene mitanunue isa. Mitanunue rei nanae Rompa nene Mitanunue. Waene rei tau sou Ibrani mo, nanae Betesda. Waene nusue rei nene heuta hua nima. Heuta rai oainatare.

³ Sio kupua panesi onekeso poe heuta rai. Sio umau mo, matao putia. Sio umau honu mo, oeu seu-seu. Sio umau honu mo, otalaso. Onekeso poe heuta rai onapa-napa waene rei nisue.

⁴ Areimo, tau taua-taua mo, Anahatana ne maisosie on roe noiyaha ikaisunu na iuna waene rei nisue. Ia seia man wain isipui naone tau waene rei nisue areimo, ia rei ne kupue iake rei sirinia. Kupue sae man mka iake.

⁵ Ia hanaie isa waimo iruei pan waene rei nusue. Ia hanaie rei mo, ikupui musum hutu tonu rahana wanu nea.

⁶ Yesus inooi waipo inekei poe rei. Iatinu ata ia hanaie rei mo, ikupui potuina nea. Oyo Yesus iasei tanui ata, "Nanie me kupue rei iake te tewa?"

⁷ Iahata, "Upu! E-e. Unina na we kupue rein iake. Ne waene reini nisue kani ia sia nanie iakahaiku na usipu poe waene reini? Ruaku nanie usipu, ne ukua tewa. Ia isa ianaoneku sui osa."

⁸ Yesus iasau ata, "Hanua roe, na noku me kinoe na aeu!"

⁹ Oyo sira tau ia hanaie rei iake. Ihitioi, inoku ne kinoe, oyo ieu.

Yesus isuisene ia hanaie rei tau ranie hatae wan ami Yahudiu amuira Anahatana.

¹⁰ Reiso sio Yahudiu no sio mainaya oasau osi ia hanaie rei. Oahata, “Ano onate! Ranie hatae repa mo, ranie hatae wan ita Yahudiu iamuiira Anahatana. Musa ne maunauna rasopo na pene ipakarian. Reiso pene arori me kinoe rei!”

¹¹ Ne iahata, “We amau! Ia wain isuiseneku rei sahoro iaisosiku unoku we kinoe na ueu.”

¹² Oasei tanui honu. Oahata, “Reiso ia wain iaisosia anoku me kinoe na aeu mo, Ia sia?”

¹³ Ne ia hanaie rei ianei tewa ata Ia sia sahoro isuisenei rei. Areimo tau sio panesi onete Yesus nea reiso inoo mosa Yesus tewa nea.

¹⁴ Potuina tewa oyo, Yesus isupu ia hanaie rei roe Anahatana ne numa mainisie nene nusue. Iasau osiki. Iahata, “Amaku atinu mai na uasau osia ia-ia. Me kupue iake nea tea! Pene apalalosa nea! Pene tu-tu sae isa remunaya renesi me kupue wan mato-mato rei honu.”

¹⁵ Ia hanaie rei ianamana runa Yesus suka oyo, ieu isima osi sio Yahudiu no sio mainaya. Iahata, “We amau, uanei ia wain isuiseneku mo, ia sia nea. Nanai Yesus.”

¹⁶ Reiso, noso Yesus isuisene pannuhu ranie hatae wan ami Yahudiu amuiira Anahatana, sio mainaya rei onina arena na ouna sinsara Yesus.

¹⁷ Ne Yesus iasau osiso. Iahata, “We amau. Au Amaku mo, ipakarian onone ranie rotu-tu ranie hatae repa, masike reimo ranie hatae wani iamuiira Anahatana oi. Reiso, Au iae, kahurae upakarian oi. Masike rei mo, ranie hatae wani iamuiira Anahatana oi.”

¹⁸ Noso Yesus iasau ata ipakarian tau ranie hatae wan ami Yahudiu iamuiira Anahatana, reiso sio Yahudiu anoo rasaa renesi honu. Reiso onina arena na ohunu Yesus. Areimo tau pusu sio mo,

Yesus ipusu Musa ne maunauna rerihoni ranie hatae wani iamuiira Anahatana rei tewa. Na isa honu mo, Yesus ioi Anahatana tau Amai. Areimo iuna ruai nooi sani Anahatana.

Anahatana Anai ne kawasa noo sani Anahatana

¹⁹ Yesus iasau osi sio mainaya arihoni akama Yahudi. Iahata, “We amau, oatinu mai ia-ia nanie uasau osimo ia-ia. Au, Anahatana Anai, una sae isa mo, upusu ruaku we maue tewa. Au mo, hasae una sae wan unoo Amaku iunai. Areimo noso sae wani Amaku iunai, Au iae una rei oi.

²⁰ Tea mo, Amaku anoi runaku. Iatuhete osiku runa sae man waron Ia ruai iunare. Mato-mato rei usuisene ia wain ikupui rei. Ne mka Anahatana iatuheteku una sima-simana waron mainaya ranesi usuisene sio kupua, reiso mka omi osira.

²¹ Noo sani Amaku iuna mansia matane iama-haiki honu. Reiso Au iae, mka uapuhai mansia matane pusu ruaku we maue.

²² Amaku iapasana ia sia man tewa. Ne irui pusi kawasa osi Au na Au sahoro uapasana mansia.

²³ Amaku irui kawasa osi Au na mansia pusiki oamuiira Au. Ia sia iamuiira Au tewa, areimo noo sani iamuiira Amaku tewa. Amaku wain iaisosiku uhokaku mai tuniai reini oi.

²⁴ Oatinu mai ia-ia nanie uasau osimo. Ia sia iatinu sae wani uasau runai reini na iparisaa tau Anahatana wain iaisosiku mo, mka iamahaiki ikata Anahatana rotu-tu ria supan. Mka Anahatana iapasanai tewa nea. Ia wain naone iruei hainau arihon Anahatana mo, muie reini wain

iamahaiki ikata Anahatana rotu-tu ria supan nea.

²⁵ Oatinu mai ia-ia nanie uasau osimo. Mka nene orase rehokai na sio wason oparisaa tau Au tewa mo, mka oatinu Au, Anahatana Anai, nioku. Sio reimo, nooso sani sio matana. Ne wain iatinu tanuku mo, mka iamahaiki ikata Anahatana rotu-tu ria supan. Orase rei mo, wan reeu nea.

²⁶ Iamahaiki tau Amaku ne kawasa tau iunaso oamahaiso rotu-tu ria supan. Ia iae irui kawasa rei osi Au na una mansiau oamahaiso okatai rotu-tu ria supan.

²⁷ Irui kawasa osiku na uarinii ia sia wain ia manisate, ia sia wain ia manisate tewa. Irui kawasa osiku tau Au reini mo, Au Tumata wain Anahatana Ihitiku.

²⁸ Pene osira tau sae wan mato uasau runai osimo rei. Tea mo, pannuhu nene orase, sio matana wason ria hatu nohua oatinu Au nioku.

²⁹ Mka ohokaso arihoni kupuro anoa na oamahaiso honu. Ia sia wain on mai tuniai iamanisa, mka iamahaiki honu na iamahaiki rotu-tu ria supan ikata Anahatana. Ne ia sia wain on mai tuniai mo, iuna kahatene mka iamahaiki honu, uapasanai.

³⁰ Ne uapasana mansia pusu ruaku we kawasa tewa. Uapasana mansia pusu sae wan Amaku iasau osiku na unai. Uapasana mansiau mo, uese hae osa man tewa. Tea mo, upusu ruaku we maue mo, tewa. Ne upusu Amaku ne maue. Ia sahoro iaisosiku uhokaku mai tuniai reini.”

Sio osima runa Yesus

³¹ “Sani Au ruaku usima na ruaku, mka sio oanei tewa ata kani sae wan usima runai rei mo, titue te tewa.

³² Ne ia isa honu wain isima rerihoni Au. Ia rei mo, Amaku ruai. Au uanei ata sae wan isima runare rerihoni Au mo, pusire manisata.

³³ Omi oaisosi sio umau pan Yohanis mamsohue na oasei rerihoni Au rei. Yohanis mo, isima runa sae waron manisata.

³⁴ Ne unina mansia na osima rerihoni Au tewa. Hasae nanie uasau osimo na anomo rapeka runa sae wan Yohanis isima runai nea osimo rei man. Isima na oparisaa na Anahatana iapuheumo na pene iapasanamo.

³⁵ Sae wan Yohanis iasau runai rerihoni Au mo, reuna omi oanei sae wan titue rerihoni Au. Nooi sani kamane wani resita itane manahane nai osa na oanei mosa arena. Mataanoë okaumin na sae waron Yohanis isima nnare rei. Ne okaumin hasae rapu-rapu man.

³⁶ Ne sae isa wan mainae renesi Yohanis resima runa Au. Sima-simana waron Au unare rei mo, pusire ratuhete ata Au reini mo, Amaku sahoro iaisosiku na unare rei. Ratuhete ata Amaku wain roe noiyaha iaisosiku mai tuniai reini.

³⁷ Amaku wain iaisosiku rei iae ruai isima runa Au. Omi mo, oatinu nioi tewa nai osa. Te onooi iae tewa oi.

³⁸ Omi oparisaa tau Au reini tewa. Au wan Anahatana iaisosiku reini. Reiso oparisaa tau ne anamanaya pan anomo tewa.

³⁹ Oarinii Anahatana ne anamanaya ia-ia noso omi ata kani oariniire, mka osupu arena na oamahaimo kata Anahatana rotu-tu ria supan. Ne Anahatana ne anamanaya rai rasima rerihoni Au.

⁴⁰ Ne openemo oparisaa tau Au na oamahaimo okata Anahatana rotu-tu ria supan.

⁴¹ Unina na mansiau oamuiraku tewa.

⁴² Ne omi mo, Au uanei anomo. Omi mo, anomo runa Anahatana tewa.

⁴³ Uhokaku mai tuniai reini runa Amaku ne kawasa. Ne openemo oatarimaku. Ne sani ia tamene isa ihokai na ruai ne kawasa, omi oatarimai.

⁴⁴ Reiso onina na mansiau oamuiramo. Ne onina tewa na Anahatana wain ia osa man rei iamuiramo. Reiso oparisaa tau Au tewa.

⁴⁵ Pene oata kan Au mka uamanarumo roe Amaku. Ia wain mka iamanarumo mo, Musa. Aikee omi oata kani opusu Musa ne maunauna mo, mka Anahatana iapuheumo.

⁴⁶ Ne sani oparisaa tau sae waron Musa ikanure, areimo omi iae oparisaa tau Au oi. Tea mo, sae waroni ikanure rei mo, ikanu rerihoni Au.

⁴⁷ Ne oparisaa tau sae waron Musa ikanure rei tewa. Reiso oparisaa tau sae waron uasau runare tewa, tea!”

6

Yesus ipana sio nihi nima

¹ Sio Yahudiu no karisaa pusiki nea oyo Yesus inuniki on roe kota Yerusalem. Ieu ria nakane wan nanae Galilea ria hae. Nakane rei mo, nene nanae isa oi mo, Tiberias.

² Mansia hutue oeu pusui. Opusui tau onoo sima-simana waron ratuhete ata ne kawasa arihon Anahatana waron iunare na sio kupua iake.

³ Ihokai ria nakane ria hae, inoai na roe pupue isa. Hoka roe, iruei poe ikata ne mampusua.

⁴ Tau rei mo, ami Yahudiu ma karisaa anoma rapeka na Anahatana ihoka ma upu momou arihon otoa Mesir haineke nea.

⁵ Yesus ihetu unui inoo ria nau. Inoo san rei mo, mansia hutue wason oeuso mai tanui. Reiso iasau osi ne mampusue isa wain nanae Pilipus. Iahata, "Pilipus. Kani ihane poroti sui supa na ipana sio panesi reini?"

⁶ Yesus iasau san rei osi Pilipus tau nanie ireai man. Areimo, tau Yesus ianei nea ata nanie iuna sae.

⁷ Oyo Pilipus iasau osi Yesus ata, "Ama. Masike ia isa ipakarian hunana wanu oi, ne kati relai tewa na ihane poroti osi pusiso. Masike kihore mkana-mkana na samare sinta-sinta osiso sana osa-osa oi."

⁸ Ne Yesus ne mampusue isa honu wain nanai Anreas. Ia mo, Simon Petrus wanin. Iasau osi Yesus ata,

⁹ "Ama. Ia iki hanaie isa wain rei. Irori poroti wan unai arihoni jelai. Irori hua nima runa ikaya use ua. Ne ralai tau ipana sio panesi reini tewa nai osa!"

¹⁰ Oyo Yesus iasau osi ne mampusua rei ata, "Aisosi sio panesi rei oru-rueso."

Noi tihue rei mo, monota panesi. Reiso sio rei oru-rueso poe. Tau sio hutue rei mo, sio hanaia, sio mainaya nihi nima runa sio pinau na sio ikina oi.

¹¹ Oyo Yesus inana poroti rei oyo, iainisi iake arihoni Anahatana. Iahata, "Amaku Anahatana, Ano mo, Ano iake. Asamama tau muaina raini." Pusi, oyo isama-samare osi sio wason orueso

sui monota rei pusiso. Inana ikaya use ua rai. Iainisi, oyo ikuparehire oyo isama-sama osi sio mansiau panesi rei oi. Isama-sama ikaya osiso oi. Pusiso oaiso rotu-tu tiao pokona.

¹² Pusiso oaiso tiao pokona oyo Yesus iasau osi ne mampusua. Iahata, "Oeu oamanou muaina nesia rai ee. Pene pesi sai-saire."

¹³ Reiso oamanou muaina nesia rai. Oaiinure tau pakuna hutusa rahana ua na poroti nesia rai oi.

¹⁴ Sio panesi rei onoo sima-simane wan retuhete ata Yesus ne kawasa arihon Anahatana wan iunai rei oyo oahata, "Titue-tue! Ia reini mo, ia mamsima runa Anahatana ne maunauna wain Anahatana itotoe runai nea ata mka ihokai mai tuniai."

¹⁵ Ne Yesus ianei ata sio panesi reimo nanie otentenei na iuna no aia. Reiso ieu arihon tihue otoi rei roe pupua honu na ruai man pan rei.

Yesus ieu roe waene hahae

¹⁶ Resou-sou nea, ami, Yesus ne mampusua, amusuma nau nakane wani nanae Galilea.

¹⁷ Oyo asaa ma arupai nanie aeuma ria hae, ria kota Kapernaum. Wapan pumono nea. Ne Yesus masi ihoka nau tanuma tewa sirinia.

¹⁸ Wan asaai, sira tau ihute reuhona mainae reuna kolau mainaya.

¹⁹ Asaai hainau kani kilo nima nomesa san rei nea. Oyo anoo Yesus ieu roe waene hahae, nanie ieu mai tanuma mai arupai rei. Akaitau hunu ruama.

²⁰ Ne Yesus iasau osima ata, "Ee! Pene okaitau! Au ruaku reini, tea!"

²¹ Reiso akaumin hunu ruama rotu-tu apusaai roe ma arupai. Anoo oi mo, ahokama ria hae nea.

Sio panesi onina Yesus

²² Yesus ieu roe waene hahae, sio panesi asi wason nau nakane wan nanae Galilea nusue sirinia. Nene han roe san rei, osira tau Yesus tutui tewa nea. Potusi onoo arupai osa mtola man. Ne oanei ata Yesus ne mampusua osaa arupai rei na ria hae ria kota Kapernaum nea, ne isaa ikataso tewa.

²³ Oyo sio umau ohokaso osaa no arupaiu on pan Kota Tiberias. No arupaiu rai ramanu-manuso haineke Upuri Yesus naniai wan potusi iainisi iake arihoni Anahatana oyo ipana sio panesi rei tau porotiu hua nima rei.

²⁴ Sio panesi rei onoo Yesus runa ne mampusua wasumo rei tewa nea. Reiso osaa no arupaiu rai oyo oeuso na ria kota Kapernaum onina Yesus.

Yesus mo, poroti wan reunata iamahaita

²⁵ Sio panesi oeu onina Yesus oyo osupui pan nakane wani nanae Galilea on pan hae. Osupui pan kota Kapernaum. Oyo oasau ata, "Ano Ona Matuhetene! Reiso ahokaya mai rei onnaha inasi nea rei?"

²⁶ Iahata, "Oatinu mai ia-ia nanie uasau osimo. Oeu oninaku tewa noso onoo sima-simana waron ratuhete ata we kawasa arihon Anahatana. Ne oninaku noso oai poroti wan oaiki rotu-tu tiamo pokona rei.

²⁷ Pene opakarian onina muaine wan mka rekopui. Ne, onina muaine wan mka rekahate tewa. Onina muaine wan reunamo oamahaimo

okata Anahatana rotu-tu ria supan. Muaine rei mo, hasae Au, Tumata Reini mo, Anahatana Ihitiku sahoro mka uruiki osimo. Areimo tau Au mo, Amaku irui kawasa osiku nea.”

²⁸ Oyo oasei tanui ata, “Ama! Reiso munata san rei mo, kahurae auna sae na apusu Anahatana ne maue?”

²⁹ Iahata, “Anahatana ne maue mo, na omi oparisaa tau Au wan iaisosiku uhokaku mai tuniai reini.”

³⁰ Oasei ata, “Munata san rei mo, masi auna sima-simane isa wan retuhete ata me kawasa arihon Anahatana osima mai. Mka anoo na aparisaa ata Ano mo, Anahatana iaisosia mai rei! Reiso nanie auna sae?

³¹ Naone ami ma upu momou orueso pani otoa huie okata Musa mo, oai poroti wan on roe noiyaha wan sio oiki tau manna. Anahatana ne anamanaya raasau, ‘Iruia poroti on roe noiyaha osiso na oai.’ ”

³² Oyo Yesu iasau ata, “Oatinu mai ia-ia nanie uasau osimo. Musa ipanaso mo, tewa. Ne Amaku sahoro irui poroti on roe noiyaha rei osi omi mo upu momou. Muie reini nanie irui poroti tunne on roe noiyaha osi omi.

³³ Areimo tau poroti tunne wan Anahatana iruiki mo, ikaisunu on roe noiyaha. Ia sahoro iapuhai mansia mai tuniai reini rotu-tu ria supan.”

³⁴ Oahata, “Upu, masi arui poroti wan on roe noiyaha rei osima sui osa nea.”

³⁵ Yesu iahata, “Au reini mo, poroti wan uapuhai mansia na ikata Anahatana rotu-tu ria

supan. Ia sia wain ihoka mai tanuku mo, mka imakanea tewa nea. Na ia sia wain iparisaa tanuku mo, mka anoi kasae tewa nea.

³⁶ Ne uasau osimo nea. Onooku nea, ne oparisaa tanuku tewa sirinia.

³⁷ Ia sia man wain Amaku iruiki na ouna we mansiau rei mo, mka oeuso mai tanuku. Na ia sia wain ihokai mai tanuku mo, mka uapusaa pusiso. Uneiso tewa.

³⁸ Areimo tau usipu on roe noiyaha na una pusu ruaku we maue mo, tewa. Ne nanie una pusu Amaku wain iaisosiku rei ne maue.

³⁹ Amaku iaisosiku rei mo, ne maue na ia seia man wain iruiki osiku nea rei mo, pene iamaninui. Ne ne maue na iapuhai sio pusiso honu pannuhu tuniai reini repena.

⁴⁰ Areimo tau Amaku ne maue mo, ia sia man wain ianei ata Au reini mo, Anahatana Anai oyo iparisaa tanuku, ia mo, mka iamahaiki ikata Anahatana rotu-tu ria supan. Oyo tau tuniai reini nanie repena mo, Au mka uapuhaiki honu pannuhu tuniai reini repena."

⁴¹ Oatinu Yesus iasau ata "Au mo, Au poroti wan on roe noiyaha." Reiso sio Yahudiu oana-namanaso pani muie.

⁴² Oasau osi umau ata, "Ia reini mo, Yesus wain inai na amai ita iationaso rei, tea! Yusup anai, tea! Reiso nanie iasau ata ihokai on roe noiyaha mo, iakarota."

⁴³ Ne Yesus iasau ata, "Pene oana-namanamo pani muie.

⁴⁴ Tea mo, Amaku wain iaisosiku rei sahoro iunaso oparisaa tanuku. Oparisaa pusu ruao no

maue tewa. Oparisaa oyo mka uapuhaiso honu tau tuniai reini nanie repena.

⁴⁵ Yesaya, ia mamsima runa Anahatana ne maunauna rei, iasau nea. Ikanu ata, 'Anahatana mka iatuhete pusiso.' Reiso, ia seia man wain iatuhetesu na oatinu tanui mo, mka iparisaa tanuku.

⁴⁶ Ia sia man inoo Amaku Anahatana tewasi. Hasae Au wan iaisosiku mai tuniai reini man sahoro unooi nea.

⁴⁷ Oatinu mai ia-ia nanie uasau osimo! Omi wan oparisaa tau Au mo, mka oamahaimo okata Anahatana rotu-tu ria supan.

⁴⁸ Sani poroti reuna tinairi ramahaiso, Au mo, uapuhaimo na okata Anahatana rotu-tu ria supan.

⁴⁹ Tau omi mo upu momou pani otoi huie mo, oai poroti wani oiki tau manna rei nea. Ne masike oai poroti rei nea, ne omataso sirinia.

⁵⁰ Ne poroti tunne rekaisunu on roe noiyaha nea. Poroti rei reuna mansia wason oaiki omata rotu-tu ria supan tewa.

⁵¹ Au mo, poroti wan reuna mansia oamahaiso rotu-tu ria supan ukaisunu on roe noiyaha. Ia seia wain iai poroti rei mo, mka iamahaiki ikata Anahatana rotu-tu ria supan. Poroti wan uasau runai rei mo, Au ruaku tinaiku wan uruiki osi mansia mai tuniai reini na oamahaiso okata Anahatana rotu-tu ria supan."

⁵² Sio Yahudiu rei oatinu san rei, oyo otuntana na umau. Oahata, "Ia hanaie reini ianamana ne sae reini? Sapani na irui tinain osi ita iaiki?"

⁵³ Oyo Yesus iasau ata, “Oatinu mai ia-ia nanie uasau osimo. Ia sia wain iai Au Tumata reini Anahatana Ihitiku tinaiku tewa, na ininu nasiku tewa, ia mo, mka iamahaiki ikata Anahatana rotu-tu ria supan tewa.

⁵⁴ Ne ia sia wain iai Au tinaiku runa ininu nasiku mo, mka iamahaiki ikata Anahatana rotu-tu ria supan. Na mka unai iamahaiki honu tau tuniai reini nanie repena.

⁵⁵ Tea mo, Au tinaiku mo, muaine wan manisate. We nasi mo, mamninue wan manisate.

⁵⁶ Ia sia iai tinaiku na ininu we nasi mo, anoi osa runa Au nea. Na Au iae, anoku osa runa ia nea oi.

⁵⁷ Au Amaku wain iapuhai pusire sahoru iaisosiku uhokaku mai tuniai reini. Na Au uama-haiku reini mo, noso Amaku iapuhaiku. Reiso sio wason oai Au tinaiku mo, mka oamahaiso rotu-tu ria supan noso sae wan Au unai osiso.

⁵⁸ Reiso Au reini mo, poroti wan rekaisunui on roe noiyaha. Poroti wani Au uruiki mo, nooi sani poroti wan mo upu momou oaiki rei mo, tewa. Masike oai poroti rei iae omataso sirinia. Ne ia sia man iai poroti wan Au uruiki mo, mka iamahaiki ikata Anahatana rotu-tu ria supan.”

⁵⁹ Yesus iasau runa rai pusire osi sio panesi reimo tau wain iatuhete sio panesi pan sio Yahudiu no numa mananouna pan kota Kapernaum.

Sio panesi wason mataanoa pusu Yesus oeu ari-honiki

⁶⁰ Sio panesi wason opusu Yesus oatinu iruni rerihoni poroti rei oasau ata, “Maunaune reini mo, mtinte mainae. Ia sia man ianei kuai tewa.”

⁶¹ Yesus ianei ata sio wason saka oeu pusui rei wason oana-namanaso pani muie rerihoni ne maunauna waron iasaure osiso rei. Reiso iasau osiso ata, “Openemo oatinu uasau san rei nan tau sae?

⁶² Munata san rei, mka omi sapan sani onoo Au Tumata Reini Anahatana Ihitiku usaa na roe noiyaha honu?

⁶³ Anahatana ne Inaha sahoro iuna mansia oamahaiso okatai rotu-tu ria supan. Mansia mo, rua i ikua iuna na iamahaiki rotu-tu ria supan mo, tewa. Maunauna waron uasau runare rei mo, on roe Anahatana ne Inaha. Maunauna rai raunamo oamahaimo okata Anahatana rotu-tu ria supan.

⁶⁴ Ne Au uanei ata arihoni omi reini mo, sio umau wason oparisaa we maunauna tewa.”

Yesus iasau san rei tau, on naon-naone nea mo, ianei ia sia man wason oparisaa tanui tewa. Na ianei nea ia sia wain mka iaheniki.

⁶⁵ Oyo iasau ata, “Omi umau wan oparisaa we maunauna tewa reiso uasau osimo nea ata hasae sio wason Anahatana ihuka anoo sahoro oparisaa tanuku na oamahaiso rotu-tu ria supan.”

⁶⁶ Oni orase reini, sio panesi wason opusui rei, oeu oarihoniki na openeso oeu pusui nea.

⁶⁷ Oyo Yesus iasei tau ami, ne mampusua hutusa rahana ua rei. Iahata, “Pene tu-tu omi iae nanie oeu oarihoniku oi?”

⁶⁸ Ne Petrus iasau osi Yesus. Iahata, “Upu, nanie aeuma tau ia sia honu? Hasae Ano man sahoro asima runa sapan na amahaima akata Anahatana rotu-tu ria supan.

⁶⁹ Ami aparisaa na anei ia-ia ata Ano mo, Ano manisate onate. Anahatana iaisosia ahokaya mai tuniai reini.”

⁷⁰ Oyo Yesus iasau ata, “Masike Au ruaku sahoro uroma omi hutusa rahana ua reini tau we mampusua, ne ia isa arihoni omi reini mo, mka ipusu ia aia sakahatene ne maue.”

⁷¹ Yesus ianamana rerihoni Yudas. Yudas mo, amai tau Simon on pan nia Iskariot. Masike ia mo, ia isa arihon Yesus ne mampusua hutusa rahana ua rei iae, mka iaheniki sinia.

7

Yesus ne waniu oparisaa tanui tewa

¹ Yesus ianamana osi sio panesi pusi, oyo ieu ihori otoa Galilea. Ipenei ieu poe otoa Yudea. Areimo tau sio Yahudiu no sio mainaya wason onina arena nanie ohunui.

² Ne tau rei mo, haineke ami Yahudiu ma karisaa wan oiki tau karisaa orueso sui wanana.*

³ Yesus ne waniu oasau osiki ata, “Nene iake mo, aeua poe otoa Yudea na auna sima-simana arihon Anahatana poe rei na me mampusua rei onoare.

* **7:2 7:2** Karisaa wani oiki tau ***karisaa orueso sui wananam***o, sio Yahudiu no karisaa mainae isa arihon sio no karisaa mainaya tonu. Tau karisaa rei mo, sio Yahudiu okure anggur huaya na orueso sui wanana waron ounare arihon ai sana atua. Ouna san rei na anoo rapeka na no upu momou orueso pani otoa huie musum hutu ate. Sio Yahudiu panesi mka oeso pani otoa Yudea roe kota Yerusalem na pusiso ouna karisaa rei kata umau. Karisaa rei reeu onona wanu. Karisaa wan anoo rapeka runa Anahatana ihoka no upu momou arihon otoa Mesir, hunana nome samatoro ounai.

⁴ Ia sia man wain inina na sio panesi oationai mo, iuna sae isa iauhun-iauhun tewa. Reiso sani me kawasa, areimo auna sima-simana arihon Anahatana na atuhete osi sio pusiso mai tuniai reini.”

⁵ Ne waniu rei oasau san rei tau sio ruao iae oparisaa tanui tewa oi.

⁶ Reiso Yesus iasau osiso. Iahata, “Nene orase tau Au ueuku roe kota Yerusalem tewasi. Ne omi mo, supan man tau oeu iae iake.

⁷ Areimo tau sio mai tuniai reini mo, openeso tau omi tewa. Ne openeso tau Au. Openeso tanuku noso uasau ata no haliu waron kahatena.

⁸ Reiso omi oeumo na roe karisaa rei. Ne Au mo, ueu tewa. Tea mo, Au mo, nene orase tau ueu roe rei tewasi.”

⁹ Yesus iasau san rei pusi, oyo iruei pan otoa Galilea asi.

Yesus ieui roe karisaa wan orueso sui wanana

¹⁰ Yesus ne waniu oeuso roe karisaa wan orueso sui wanana rai. Oyo Yesus iae ieu pususo. Ne ieui mene-mene man na pene mansia hutue oaneiki.

¹¹ Roe karisaa rei, sio Yahudiu no sio mainaya wason onina-nina Yesus. Oasei tau mansiau oahata, “Ia mo, wainpa?”

¹² Mansia panesi wason roe karisaa rei oarahuhu osi umau rerihoni Yesus. Sio umau oahata, “Ia mo, Ia mansia iake!”

Ne sio umau honu oasau ata, “Tewa. Ia mo, Ia iakarota sio panesi.”

¹³ Ne ia sia man ikaitau ianamana mainae rerihoni Yesus na mansia pusiki oatinu. Areimo tau okaitau sio Yahudiu no sio mainaya.

Yesus iatuhete roe Yerusalem

¹⁴ Karisaa rei reeu onona tonu te ate san rei nea, oyo Yesus ieui roe Anahatana ne numa mainisie nusue na iatuhete mansiau roe rei.

¹⁵ Sio Yahudiu no sio mainaya osira oatinu Yesus iatuhete sio panesi roe rei. Oasau ata, “Ia reini mo, isikola akama tewa, tea! Reiso sapan na ianamana san rei?”

¹⁶ Oyo Yesus iasau osiso ata, “Sae wan uatuhetei osimo reini mo, rehokai on mai Au ruaku mo, tewa. Ne usupui arihoni Anahatana wain iaisosiku rei.

¹⁷ Ia seia nanie ipusu Anahatana ne maue mo, mka ianei ata sae waron Au uatuhetere reini mo, rahoka arihon Anahatana te arihon Au ruaku.

¹⁸ Ia sia wain iatuhete mansia pusu ruai ne pikiran, areimo hasae inina na mansiau oamuiira ia man. Ne Au uatuhete maunauna waron rauna mansiau oamuiira Amaku wain iaisosiku rei. Areimo retuhete ata Au mo, uakarota tewa. Reiso oparisaa tau we matuhetene iae, iake.

¹⁹ Anomo rapeka runa Anahatana ne maunauna waron Musa ikanure rei. Ia sia man arihon omi ipusu pusire ia-ia tewa. Sinana opusure, areimo mka onina arena na ohunuku tewa.”

²⁰ Oyo sio panesi oahata, “Amukea! Auwena na sakahatene reiso anamana san rei si? Ia sia nanie ihunua?”

²¹ Yesus iasau ata, “Au una sima-simane arihon Anahatana osa man tau ranie hatae wan ita Yahudiu iamuiira Anahatana, oyo pusimo osira.

²² Ne rerihoni ranie hatae wan ita Yahudiu iamuiira Anahatana mo, naone Musa ikanu ata omi mo, kahurae orehi mo sio iki hanaia wason mato oamrai pannuhu no onona itu. Ne nene

manisate mo, mo upu Abraham sahoro isupu maunaune rei naone. Reiso noso maunaune rei, omi iae taua-taua orehi mo hehuka hanaia tau ranie hatae wan iamuiira Anahatana sirinia.

²³ Omi orehi mo hehuka hanaia tau ranie hatae wan iamuiira Anahatana sirinia repusu Musa ne maunauna, reiso nanie anomo rasaa tau Au noso usuisene ia isa pannuhu ranie hatae wan iamuiira Anahatana nanie tau sae?

²⁴ Pene oapasana Au tau onoo usuisene ia isa tau ranie hatae wan iamuiira Anahatana rei. Pene arinii pusu sae waron mansiau onooore man. Ne kahurae onoo sae wan manisate na iakahai mansiau.”

Sio oasei ata kani Yesus mo, Ia Aia wain Anahatana Ihitiki na Iapuheu Mansiau

²⁵ Tau Yesus ianamana osi sio Yahudiu roe Anahatana ne numa mainisie nusue roe kota Yerusalem mo, sio Yerusalem umau oasei tau umau ata, “Ia reini mo, Ia wain sio nanie ohunui rei, tea!

²⁶ Masi onooi. Iatuhete mansia panesi san rei, ne sio mainaya osopoi tewa. Pene tu-tu oata kani Ia reini mo, Ia Aia wain Anahatana Ihitiki na Iapuheu Mansiau te sae rei?

²⁷ Ne Ia reini mo, Ia Aia wain Anahatana Ihitiki na Iapuheu mansia mo, tewa. Tea mo, sani Ia Aia wain Anahatana Ihitiki na Iapuheu Mansiau ihokai mo, ia sia man ianeiki tewa ata ihokai on supa. Ne Ia reini mo, ita ianei ihokai on supan.”

²⁸ Yesus wain iatuheteso roe Anahatana ne numa mainisie nusue asi oyo iatinu oasau san rei, ianamana nioi mainae ata, “Omi oationaku na

oanei Au reini mo, on supa. Areimo manisate. Ne uhokaku reini mo, pusu ruaku we maue mo, tewa. Ne uhokaku reini mo, Amaku sahoro iaisosiku. Omi oationai tewa.

²⁹ Ne Au mo, uationai. Tea mo, uhokaku reini mo, on roe Ia. Ia sahoro iaisosiku na uhokaku mai tuniai reini.”

³⁰ Oatinui iasau ata Anahatana iaisosiki ihokai mai tuniai reini, sio onata onina arena na osota Yesus. Ne ia sia man arihon sio rei pusiso hanao rakahuui man tewa oi. Areimo, tau nene orase tewasi tau osotai.

³¹ Ne arihon sio panesi wason noi rei mo, sio panesi oparisaa tanui. Oahata, “Ia seia man iuna kua sima-simana waron ratuhete ata ne kawasa arihon Anahatana panesi sani Ia onate reini tewa. Reiso, Ia onate reini mo, titue-tue Ia mo, Ia Aia wain Anahatana Ihitiki na Iapuheu Mansiau reini nea rei, tea!”

³² Ne sio onata arihon akama Yahudiu oatinu sio panesi oarahuhu ata Yesus mo, Ia Aia wain Anahatana Ihitiki na Iapuheu Mansiau. Reiso okata sio imam no sio mainaya pusiso oeuso roe sio mamsaka Anahatana ne numa mainisie rei na oaisosiso oeu osota Yesus.

³³ Reiso Yesus iasau osi sio panesi rei. Iahata, “Mka ukatamo potuina tewa nea. Nanie ununiku na urueku ukata Amaku wain iaisosiku uhokaku mai reini.

³⁴ Omi mka oninaku ne osupuku tewa. Areimo tau omi mo, mka oeumo roe Au naniaku wan urueku rei mo, iake tewa.”

³⁵ Oyo sio mainaya arihoni akama Yahudi rei pusiso oasau mai umau. Oahata, “Nanie ieui sui supan tu-tu ita mka isupui tewa? Kani nanie

ieui sui niana-niana ikata sio Yahudiu wason orue oneka sio wason sio Yahudi tewa rei na iatuheteso te sae rei?

³⁶ Iasau ata mka ininai ne isupu kuai tewa. Na iasau mka ieu noi naniai ikatai tewa. Iasau san rei nanie tau sae ano?”

Yesus mo, tihu wan reuna iamahaita

³⁷ Nene onone wan tau muie, tau sio Yahudiu no karisaa wan oiki tau karisaa orueso sui wanana rei mo, onone wan mainae nai osa. Tau onone rei Yesus ihitio oyo ianamana nioi mainae. Iahata, “Ia seia man wain anoi kasae mo, ieu mai tanuku na ininu sae wan uruiki osiki na ininu.

³⁸ Sio okanu tau Anahatana ne anamanaya rerihoni sio wason oparisaa tau Au ata, mka waena hunaya rania on pan anoo wan mka raunaso oamahaiso.

³⁹ Yesus waimo ianamana rerihoni Anahatana ne Inaha. Sio wason oparisaa tau Yesus mo, mka Anahatana irui ne Inaha osiso. Ne Anahatana iruiki tewasi tau Yesus imatai na isaa isupu muiran manetane roe noiyaha tewasi.”

⁴⁰ Sio umau oatinu Yesus iasau san rei oyo oa-hata, “Titue! Ia reini nea rei tea! Ia reini sahoro ia mamsima runa Anahatana ne maunauna wain ami anapa-napai rein, tea!”

⁴¹ Sio umau honu oasau ata, “Ia reini nea rei, tea! Ia Aia wain Anahatana Ihitiki na Iapuheu Mansiau rei, tea!”

Ne sio umau honu oasau ata, “Tewa te sae rei? Ia Aia waini Anahatana Ihitiki na Iapuheu Mansiau mo, ihokai on poe otoi Galilea tewa, tea!

⁴² Sio okanu tau Anahatana ne anamanaya nea oi, tea! Okanu ata Ia Aia wain Anahatana Ihitiki na Iapuheu Mansiau mo, Ia aia Daud upui momoi wain iamrai pan kota Betlehem, ia aia Daud ne niane.”†

⁴³ Pusiso otuntana na umau noso Yesus. Sio umau oparisaa tau Yesus, ne sio umau mo, tewa.

⁴⁴ Sio umau nanie osotai, ne ia seia man hanai rekahuu man tewa oi.

⁴⁵ Sio mamsakaya wason osaka Anahatana ne numa mainisie rei onunso roe sio imam no sio mainaya runa sio onata arihon akama Yahudi wason oaisosiso rei. Oyo sio onata rei oasei tanso ata, “Ororiki mai tewa tau sae rei?”

⁴⁶ Oyo sio mamsakaya rei oasau ata, “Rotu reini ami atinu ia sia man ianamana sani ia onate rei tewasi.”

⁴⁷ Oyo sio onata arihon akama Yahudi rei oasau osiso honu ata, “Pene tu-tu iakarotamo oi te sae rei?”

⁴⁸ Masi onoo ia-ia ata ia isa arihoni re sio mainaya runa sio onata arihon akama Yahudi iparisaa tau Ia rei te tewa. Tewa, tea!

⁴⁹ Ne, sio panesi rei oparisaa tau Ia rei tau oanei Anahatana ne maunauna waron Musa ikanure rei tewa. Sio mo, mka Anahatana iapasanaso.”

7:42 7:42 2 Samuel 7:12; Mika 5:1 † **7:42 7:42** Yesus iamrai pan kota Betlehem. Kota Betlehem mo, wapam otoa Yudea. Ne on Yesus ia ikine asi, inai na amai ororiki oyo orueso pan otoa Galilea. Reiso Yesus iruhu pan otoa Galilea. Sio reini oanei tewa ata iamrai pan Betlehem. Naone, ia mamsima na Anahatana ne maunauna ikanu ata Ia Aia wain Anahatana Ihitiki ne Iapuheu Mansiau mo, mka iamrai pan Betlehem.

50 Ia isa arihon sio rei nanai Nikodemus. Ia mo, naone ieu i noi Yesus tau pumono. Iasau osi sio wason ikataso rei ata,

51 “We amau. Ita mo, pusu Anahatana ne mau-nauna waron Musa i kanre rei kahurae iarinii ia isa ia-ia naone ee. Iasei tanui oyo iatinu tanui samatoro iapasanai sani resana.”

52 Nikodemus iasau san rei oyo oasau osiki ata, “Ano reini mo, on pan otoi Galilea nooi sani ia hanaie reini oi te sae rei? Ano mo, arinii Anahatana ne maunauna ia-ia na anei ata Anahatana ne ia mamsima runa ne maunauna mo, ihokai on pani otoi Galilea tewa.”

Ia pina isa wain inekei na ia hanaie wain sahai tanui tewa

[53 Oasau san rei suka, oyo pusiso onunso sakakau sui no numau.]

8

[1 Ne Yesus ieu i na roe Pupue Saitun.

2 Omnano tunne, imusui on roe pupue rei, oyo ieu honu roe Anahatana ne numa mainisie nusue. Mansia panesi ohoka oamanouso ohoriki, reiso irue iatuhetesu.

3 Oyo sio matuhete Musa ne maunauna na sio onata arihon akama Yahudi orori ia pina isa na ounai ioi noi mansia hutue rei tihuo. Ia pina rei mo, osotai pannuhu inekei ikata ia hanaie wain sahai tanui tewa.

4 Oyo sio onata rei oasau osi Yesus. Oahata, “Ano Matuhetene! Ami asota ia pina rei pannuhu inekei ikata ia hanaie wain sahai tanui tewa.

⁵ Tau Anahatana ne maunauna waron Musa ikanure rei mo, iaisosima na arau ia pina wain san reini tau hatu rotu-tu imatai. Reiso pusu Ano mo, sapan?”

⁶ Oasei tau Yesus san rei nanie oreai na onoo ata Yesus iasau sapan na oapasanai iake. Ne Yesus iamaturui man. Ikanahata ikanu poe tuamane tau hanai nakate.

⁷ Sio onata rei oasei tau Yesus sui osa, oyo Yesus ihitioi roe, iasau osiso. Iahata, “Ta seia wain iahana ruai ipalalosa tewa nai osa mo, masi iakahuu hatu na irau ia pina rei naone.”

⁸ Iasau san rei pusi, ikanahata honu, ikanu poe tuamane honu.

⁹ Ne sio onata rei oatinu Yesus iasau san rei, oyo oeuso arihon rei sana osa-osa. Sio mtuana oeuso arihoni rei naone, samatoro sio honua rotu-tu tau muie oimo, nesie Yesus na ia pina rei ruao man.

¹⁰ Oyo Yesus ihitio roe, iasei tau ia pina rei. Iahata, “Ina, sio rei wasunpa nea rei? Sio umau apasanaya tewa?”

¹¹ Oyo ia pina rei iahata, “Tewa nea, Upu.”

Oyo Yesus iasau osiki honu. Iahata, “Au iae ua-pasanaya tewa oi. Nunia nea ne pene apalalosa nea.”]

Yesus mo, manahane wan resita mansia anoo

¹² Yesus ianamana osi sio panesi wason oa-manouso roe Anahatana ne numa mainisie nusue rei honu. Iahata, “Au mo, noo sani manahane osi mansia pusiki mai tuniai reini anoo. Nooi sani manahane resita sae man wan noi pumono na inoo mosai. Ia sia man wain

ipusu Au mo, mka ieu pusu pumono tewa. Ne ieu pusu manahane. Manahane rei retuhetei sapani na mka iamahaiki ikata Anahatana rotu-tu ria supan.”

¹³ Oyo sio onata arihon akama Yahudi oasau osiki. Oahata, “Wamo asima na ruam reiso kani ia sia nanie iparisaa tau Ano?”

¹⁴ Yesus iahata, “Masike usima na ruaku, ne sae wan uasau runai rei mo, pusire titue. Areimo, tau uanei ata Au mo, uhokaku on roe noiyaha. Na Au iae uanei ata mka ununiku roe rei honu. Ne omi mo, oanei tewa, Au on supa na mka ununiku sui supan.

¹⁵ Omi oarinii mansia pusu sae waron mansia onoare. Ne Au mo, Au wan rei na nanie uasau ata uarinii ia sia man mo, tewa.

¹⁶ Ne sani uarinii mansia, sae waron uasau nnare mo, manisate. Areimo tau Au ruaku sahoro uariniiso mo, tewa. Au na Amaku wain iaisosiku rei, uama sahoro ariniiso.

¹⁷ Musa ikanu tau Anahatana ne maunauna waron orimere ata sani amanaru mansia mo, kahurae me sio ua wason onoo tau matao na kahurae no sou osa, samatoro oasau ata sae wani oasau rei mo, titue.

¹⁸ Sio wason osima na Au iae, sio ua oi. Au usima osimo rerihon Au ruaku, na Amaku wain iaisosiku isima osimo rerihoni Au oi.”

¹⁹ Oyo sio onata rei oasei tau Yesus oahata, “Munata san rei mo, Amam wainpa?”

Yesus iahata, “Oationa Au tewa reiso omi iae oationa Au amaku tewa oi. Sinana oationa Au, mka oationa Amaku oi.”

²⁰ Yesus iatuhete rai pusire roe Anahatana ne numa mainisie nusue haineke peti maiinu kepen

waron oruire osi Anahatana. Ne osotai tewa. Areimo, tau nene orase tau osotai tewasi.

Sio onata arihon akama Yahudi oanei sae waron Yesus iatuhetere tewa

²¹ Yesus ianamana honu osi sio panesi. Iahata, “Mka ueu arihonimo. Oyo reeu mai, mka oninaku, ne mka omatamo Anahatana isiru heu mo rosau tewa. Mka oeu okataku roe naniaku wan Au mka ueuku roe tanui rei tewa.”

²² Oyo sio onata Yahudiu oasei mai umau. Oahata, “Pene tu-tu nanie ihunu ruai te sae rei? Reiso sinasi iasau ata ieu ikatai roe naniai wan mka ieu roe tanui rei, ieu iake tewa.”

²³ Ne Yesus iahata, “Omi mo, oamrai mai tuniai reini. Ne Au mo, uhokaku on roe noiyaha. Naniamo mai tuniai reini. Ne Au mo, tewa.

²⁴ Reiso sinasi uasau osimo ata mka ereeu mai, omatamo mo, Anahatana isiru heu mo rosau tewa. Sani oparisaa tewa ata Au mo, Au seia wain uasau runai osimo nea rei, mka omatamo ohana ruamo mo rosau.”

²⁵ Reiso oasau osiki ata, “Ano ata kan Ano mo, Ano seia na asau san rei?”

Oyo iahata, “Oni mataano uatuhete mo, uasau osimo nea rerihoni Au reini mo, Au sia.

²⁶ Nanie uasau osimo rerihoni mo rosau panesi asi. Ne, hasae nanie uasau rerihon sae waron Ia wain iaisosiku inina na uasau runare rei man. Sae waron iasau runare mo, titue. Usima osi sio mai tuniai reini runa sae waron uatinure arihoniki rei.”

²⁷ Ne oanei tewa ata Yesus wain ianamana rerihoni Ama wain roe noiyaha. Ia mo, ianamana rerihoni amai wain mai tuniai reini mo, tewa.

²⁸ Reiso iahata, “Au Tumata Reini Anahatana Ihitiku mo, uhokaku on roe noiyaha. Ne tau ohunuku roe hini, samatoro mka oanei ata Au mo, Au sia. Omi iae mka oanei ata sae man wan unai mo, unai tau ruaku we kawasa tewa. Ne usima na sae waron Amaku iatuheteku tanre.

²⁹ Ia sahoro iaisosiki, ikata runaku sui osa. Ieu arihoniku tewa. Tea mo, Au una sae man pusu ne maue.”

³⁰ Oatinu Yesus iasau rai pusire, sio panesi oparisaa tanui.

Abraham ne hehuka

³¹ Yesus iasau osi sio Yahudiu wason oparisaa tanui nea rei. Iahata, “Sani munata opusu we maunauna, areimo titue-tue Au we mampusua tanumo.

³² Omi mka oanei Anahatana ne maunauna waron manisata. Maunauna rai sahoro mka raunamo osihamo arihoni mo rosau na pene ouna sani maniane tanre nea.”

³³ Ne sio umau ouni oahata, “Ami mo, Abraham ne upu momou. Ia sia man iunama tau ne maniane tewasi. Reiso sapan na Ano asau ata ami mka asihama?”

³⁴ Oyo Yesus iasau ata, “Oatinu mai ia-ia, nanie uasau osimo. Ia sia ipalalosa sui osa, areimo ipusu ne hali wan ipalalosa rei man, nooi sani ia maniane kahurae ipusu upui man sui osa.

³⁵ Tumata maniane mo, iruei sui osa noi upui ne numa tewa. Ne upui anai hanaie man sahoro iruei noi numa sui osa rotu ria supan.

³⁶ Reiso sani Au, Anahatana Anai reini, unamo sihamo arihoni mo rosau, areimo titue-tue osihamo nea.

³⁷ Au uanei ata omi mo, Abraham ne upu momou. Ne onina arena nanie ohunuku tau openemo oatinu tau we maunauna.

³⁸ Sae waron uatuhetere osimo reini mo, pusire unoo oni ukata Amaku. Omi iae, ouna sae waron oatinu arihoni mo ama.”

³⁹ Oyo oasau osi Yesus ata, “Ami mo, ma upu tau Abraham.”

Ne iasau ata, “Sani munata omi mo, Abraham ne upu momou, omi mo, kahurae mo hali kalakuan noo sani Abraham oi.

⁴⁰ Au reini sahoru usima na sae waron manisata waron uatinure arihon Anahatana osimo. Ne omi onina arena sui osa nanie ohunuku. Aikee Abraham mo, iuna san rei tewa.

⁴¹ Reiso titue, omi mo, ouna sae waron mo ama tamene iunare.”

Oahata, “Ami mo, ami ana hua tewa. Ami mo, mani Ama osa man. Ia mo, Anahatana ruai.”

Ia aia sakahatene ne hehuka

⁴² Yesus iasau osi sio ona Yahudiu. Iahata, “Sani munata Anahatana mo, omi mo ama, areimo omi mka anomo na Au. Tea mo, uhokaku on roe Anahatana. Au wan reini mo, uhokaku pusu ruaku we maue tewa, ne uhokaku pusu Ia wain iaisosiki ne maue.

⁴³ Omi mo, openemo tau we maunauna. Reiso oaneire tewa.

⁴⁴ Omi mo, mo ama tau ia aia sakahatene. Reiso omi mo, mo suka tau pusu ne maue. Oni mataanoë asi, ia aia sakahatene mo, saka ihunu mansia. Ia mo, ipenei tau sae wan manisate. Areimo tau ia mo, ia makarota onate. Makarotana pusire rahoka arihon ia.

⁴⁵ Ne Au we maunauna mo, manisata. Reiso openemo oparisaa tau Au.

⁴⁶ Upalalosa tewa reiso sia man arihon omi reini mka iatuhete we rosa isa wani unai tewa. Uatuhete sae wan manisate, reiso nanie oparisaa tanuku tewa tau sae?

⁴⁷ Ia sia wain iuna Anahatana ne mansia mo, mka iatinu Anahatana ne maunauna. Ne omi mo, Anahatana ne mansiau tewa, reiso oatinure tewa.”

Yesus mo, Ia mainae inesi Abraham

⁴⁸ Sio ona Yahudiu oasau osi Yesus honu. Oahata, “Sae wan ami asau rei mo, titue. Ano Samaria* reini mo, amukea na sakahatene remasunia.”

⁴⁹ Yesus iahata, “Au mo, sakahatene remasuniku tewa. Au mo, uamaira Amaku, ne omi oamaira Au tewa.

⁵⁰ Au mo, unina na oamuiraku mo, tewa. Ne Ia isa wain inina na oamuiraku. Ia saoro iarinii ia sia wain ia manisate, ia sia wain ia manisate tewa.

⁵¹ Oatinu mai ia-ia, nanie uasau osimo. Ia seia ipusu we maunauna, ia mo, mka imata rotu-tu ria supan tewa.”

⁵² Oyo sio ona Yahudiu rei oahata, “Mato anei ia-ia ata Ano mo, sakahatene remasunia. Ma upu Abraham imatai nea. Na sio mamsima runa Anahatana ne maunauna omataso nea oi. Ne Ano asau ata sio wason oatinu tau me maunauna mo, mka omata tewa.

* **8:48 8:48** Sio Yahudiu openeso nai osa tau sio Samaria. Oata kani sio apaputi na oparisaa tau maunauna waron titue tewa. Reiso oi Yesus tau Ia Samaria, areimo openeso tanui na oasau ata ne maunauna mo, titue tewa.

⁵³ Ano reini mo, masike nai osa. Ano ata kan Ano mo, Ano mainae anesi ma upu Abraham. Ia mo, imatai nea. Na sio mamsima runa Anahatana ne maunauna iae omataso nea oi. Ano mo, auna ruam noo sani Ano mo, ano mainae anesi sio pusiso, reiso asau ata sio wason opusu me maunauna mka omata tewa?”

⁵⁴ Oyo Yesus iahata, “Sani Au ruaku sahoru unina mansia na oamuiraku mo, oparisaa tanuku tewa iae, iake sinia. Ne ia wain iamuiraku mo, Amaku. Ia rei mo, Anahatana wain omi oasau ata oainisi ainaa nnai.

⁵⁵ Omi oationai tewa, ne Au uationai. Sani uasau ata uationai tewa, areimo uakarota sani omi oi. Ne Au mo, uationai na upusu ne maunauna.

⁵⁶ Mo upu Abraham anoi mirike nai osa tau iatinu rerihoni sae waron Au mka unare mai tuniai reini. Noo sani inoore oni mataano e asi, ikaumin nea.”

⁵⁷ Oyo oasau ata, “Me musum hutu nima tewasi oimo, Ano asau ata anoo ma upu Abraham nea si?”

⁵⁸ Oyo iahata, “Oatinu mai ia-ia, nanie uasau osimo. Abraham ain tewasi mo, Au wan naone nea.”

⁵⁹ Oatinu Yesus iasau san rei, oyo oroma hatu na orai na ohunui. Tau oata kani Yesus iuna ruai sani Ia mo, Anahatana. Ne Yesus iunaso onoo mosai tewa, oyo ihitio ieui mene-mene arihon Anahatana ne numa mainisie rei.

9

Yesus isuisene ia hanai wain matai raputiso on iamrai asi

¹ Taue isa, Yesus na ne mampusua wason oeu. Oyo inoo ia hanaie isa wain matai raputiso on iamrai asi.

² Oyo ne mampusua oasei tanui ata, “Ano Matuhetene. Ia reini matai raputiso on iamrai reimo, tau inai na amai no rosau te ia ruai ne rosau?”

³ Yesus iahata, “Matai raputiso reimo, tau ruai ne rosau mo, tewa. Tau inai na amai no rosau iae, tewa oi. Ne matai raputiso rei mo, na mansiau onoo Anahatana ne kawasa noso isuisene ia rei.

⁴⁻⁵ Oni Au wan tuniai reini asi, Au sahoro una mansiau oationa Anahatana. Reiso Au sani manahane. Manahane reuna mansia onoo sae wan noi pumono. Reiso oni manahane asi, Ita mo, kahurae ipakarian pusu Amaku wain iaisosiku ne maue. Tea mo, sani nanie imatata, areimo sani pumono nea oyo sia man mka ipakarian tewa nea.”

⁶ Iasau san rei pusi oyo, ihuto poe tuamane. Oyo inehu ne apana rai na tuamane rotu ranehu umau, samatoro ikusare roe ia mata putie rei matai usena.

⁷ Oyo iahata, “Eua poe waene wan nanae Siloam na auneua.”

(Siloam tau sou Ibrani nene nohue mo, *aisosi*.) Reiso ia mata putie rei ieu iauneui poe waene rei. On poe inuni mai oimo, inoo mosa nea.

⁸ Sio mansiau sui ne numa nusue na sio wason naone saka onooi iai-iainisi kepen oasau ata, “Ia reini mo, ia wain naone saka irue iai-iainisi kepen rei si?”

⁹ Sio umau oi oasau ata, “Titue, Ia rei tea!” Sio umau honu oasau ata, “Tewa! Ia rei tewa. Ia reimo ia isa wain uai anoe sani ia rei oi.”

Ne ia ruai iahata, "Titue. Ia reimo, Au reini, tea!"

¹⁰ Oyo oasei tanui ata, "Reiso sapan tu-tu anoo mosa reini?"

¹¹ Iahata, "Ia wain nanai Yesus ihuto poe tuamane oyo inehu ne apana rai na tuamane oyo inanai ikusare roe matakusu. Oyo iaisosiku ueu uauneuku poe waene wan nanae Siloam. Reiso ueuku poe uauneuku oyo unoo mosa rei sirinia."

¹² Oasei tanui ata, "Reiso ia onate rei wain sui supan?"

Iahata, "Uanei tewa"

Sio onata arihon akama Yahudi onina ia sia wain isuisene ia hanai mata putie on iamrai

¹³ Yesus isuisene ia mata putie oyo orori ia mata putie rei roe sio onata arihon akama Yahudi.

¹⁴ Yesus inehu ne apana na tuamane oyo isuisene ia mata putie rei pannuhu ranie hatae wan ami Yahudiu amuira Anahatana.

¹⁵ Reiso sio onata oasei tanui. Oahata, "Sapani na tu-tu anoo mosa rei?"

Iahata, "Ia onate isa inehu ne apana na tuamane oyo inanai ikusare roe matakusu. Oyo uauneuku oyo unoo mosa rei sirinia."

¹⁶ Reiso sio onata arihon akama Yahudiu umau oasau ata, "Ia onate rei mo, Anahatana iaisosiki rei mo, tewa. Areimo tau ipakarian tau ranie hatae wan ita Yahudiu iamuiira Anahatana."

Ne sio umau honu oasau ata, "Ne sio palalosaya mo, omaha ouna sima-simane wan retuhete ata no kawasa arihon Anahatana san reini tewa!"

Reiso anoo osa tewa.

¹⁷ Oyo oasau osi ia wain naone matai raputiso rei. Oahata, “Ano sahoru isuisenea. Reiso pusu ano ruam mo, ia onate rei mo, ia seia?”

Oyo iahata, “We amau. Sani pusu au ruaku mo, ia onate rei mo, ia mamsima runa Anahatana ne maunauna.”

¹⁸ Ne sio onata rei oparisaa tewa sirinia ata ia hanaie reimo, matai raputiso on iamrai asi. Ne wain inoo nea. Reiso oaisosi ia isa ioi ia hanaie rei ne mansia mainaya.

¹⁹ Oyo oasei tau ne mansia mainaya. Oahata, “Ia reini mo, omi mo hehuke hanaie wain ata matai raputiso on iamrai rei si? Sani munata titue, reiso sapani na inoo mosa nea rei?”

²⁰ Ne mansia mainaya oasau ata, “Titue, ia reini mo, ami ma hehuke. Titue, ia mo, matai raputiso on iamrai asi.

²¹ Ne ami anei tewa ata sapan na inoo mosa nea. Ami iae anei tewa ata ia seia isuisene matai usena rai. Nene iake mo, ruamo oasei tanui. Ia mainae nea, reiso ruai mka iasau osimo.”

²² Oasau san rei tau okaitau sio onata arihon akama Yahudi. Tea mo, sio onata ohunu sou na ia sia wain iasau ata Yesu mo, Ia Aia wain Anahatana Ihitiki na Iapuheu Mansiau mo, pene oheta sio Yahudiu no numa mananouna nea.

²³ Erepuu rei, reiso oasau ata, “Ia mainae nea reiso oasei tau ruai.”

²⁴ Reiso sio onata rei ooi ia wain naone matai raputiso rei honu. Oahata, “Anahatana wain iatinu reiso asau sae wan titue osima. Ami anei ata Yesu mo, ipalalosa.”

²⁵ Oyo iahata, “We amau. Au uanei tewa ata Ia mo, ipalalosa te tewa. Hasae uanei mo, naone

mataku usena raputiso, ne muie reini unoo mosa nea.”

²⁶ Oyo oasei tanui honu. “Iuna sae tu-tu anoo mosa nea rei?”

²⁷ Iahata, “Are! Uasau osimo on sinasi nea rei, ne openemo oatinu tanuku. Nanie oatinu uasau osimo honu tau sae? Pene tu-tu omi nanie ouna ne mampusua oi te sae rei omi?”

²⁸ Oyo orati sohiki. Oahata, “Ano sahoru auna Ia ne mampusue. Ami mo, tewa. Ami mo, Musa ne mampusua.

²⁹ Ami anei nea ata Anahatana ianamana osi Musa. Ne Ia rei mo, ami anei tewa ata ihokai on supa.”

³⁰ Iahata, “Ira oe! Areimo sapan? Ia onate rei isuisene mataku usena rotu unoo mosa nea. Ne omi oasau ata oanei tewa ata ihokai on supa!

³¹ Pusita ianei ata Anahatana mo, iatarima sio palalosaya no mainisia tewa. Anahatana mo, hasae iatarima sio wason oamuirai na sio wason opusu ne maue no mainisia man.

³² Ia seia man iatinu tewasi ata ia wain matai raputiso on iamrai inoo nea sani au reini. Iatinu san rei tewasi on tuniai reini remrae rotu-tu reini.

³³ Munata Ia onate rei ihokai on roe Anahatana tewa, mka imaha iuna sae isa tewa.”

³⁴ Oatinu san rei oahata, “Oni amrai asi mo, me rosau panesi nea. Ano mo, ano seia na atuhete ami reini?”
Oyo oneiki.

Sio wason oationa Anahatana tewa mo, nooso san sio wason matao usena raputiso

³⁵ Yesu iatinu ata sio mainaya rei onei ia wain naone matai usena raputiso rei na pene iheta

ami Yahudiu ma numa mainisie. Isupui oyo iasei tanui. Iahata, “Ano parisaa tau Tumata wain Anahatana Ihitiki te tewa?”

³⁶ Oyo iahata, “Upu! Ia reimo, ia seia? Sima osiku mai na uparisaa tanui.”

³⁷ Yesus iahata, “Anoo Ia rei nea. Ia rei mo, Ia wain anamana runaya reini.”

³⁸ Oyo ia rei iahata, “Upu! Au uparisaa.”

Oyo irike tune, iainisi iainaa nnai.

³⁹ Oyo Yesus iasau honu. Iahata, “Uhokaku mai tuniai reini mo, nanie uarinii ia sia wain ia manisate, ia sia wain ia manisate tewa. Uatuhete arena osi sio wason oationa Anahatana tewa na oationai. Areimo noo sani una ia mata putie inoo. Ne sio wason oasau ata oationa Anahatana mo, Au mka uatuhete ata sio mo, oanei sae isa tewa. Areimo sani sio wason ata kani onoo mosa, oyo sira tau onoo mosa tewa.”

⁴⁰ Sio onata arihon akama Yahudi umau wasumo oatinu san rei oyo oasei tau Yesus. Oahata, “Sae rei? Wamo asau reno mo, Ano ata kani ami mo, matama raputiso si?”

⁴¹ Iahata, “Sani ruamo oamanaku ata matamo raputiso, areimo omi mo, opalalosa tewa. Ne omi wamo oasau ata omi mo, onoo mosa. Areimo omi ohana mo rosau asi.”

10

Yesus mo, nooi sani ia mamsaka rompau wan iake

¹ Yesus iasau ata, “Atinu mai ia-ia, nanie uasau osimo. Ia sia wain inusui pani rompau nene koka ne ipusu mitanunue tewa, ne isaai pusu koka iauhun mo, ia rei nanie ikimanaka rompau rai.

² Ne ia wain inusui pani rompau nene koka pusu mitanunue, ia reimo, ia mamsaka rompau.

³ Ia wain isaka koka nene mitanunue ihuka mitanunue osi ia mamsaka rei. Ia mamsaka ioi nanaya sana osa-osa, rationa nioi. Pusi, oyo ia utunure rahoka arihon koka.

⁴ Ihoka pusi ne rompau arihon nene koka nea, oyo ieu roe uae sui osa ia utunure. Rompau rai rationa nioi reiso raeu rapusu-pusui hae muie.

⁵ Ne rompau rai raeu rapusu ia tamene wain rationai tewa. Ne mka rarumaso arihoni ia rei. Tea mo, rationa nioi tewa.”

⁶ Yesus iruni matieue rerihon ia mamsaka rompau rei ne olai kua Yesus anoi tewa sirinia.

⁷ Reiso iahata, “Oatinu mai ia-ia, nanie uasau osimo. Au reini mo, sani koka nene mitanunue wan rompau ranusu pan koka anoe. Tea mo, Au mo, mitanunue na mansiau oeuso mai Anahatana.

⁸ Mansiau umau ohokaso oanaoneku na oasau ata sio mo, sio mamsaka rompau. Sio reimo, sio kimanakana. Ne rompau rai rapeneso rapusu sio.

⁹ Au reini mo, sani mitanunue. Mka Anahatana iapuheu ia sia man wain ihokai mai tanui inusu pusu Au. Mka inusu hoka sae isa remunai tewa sani rompa renusu hoka koka renina nene muaina mo, iake.

¹⁰ Sio kimanakana ohoka tau hasae okimanaka, ohunu, na ouna akahate. Ne Au mo, uhokaku mai tuniai reini na mansia oamahaiso okata Anahatana rotu-tu ria supan na urui iake osiso.

¹¹ Au reini mo, Au sani mamsaka rompau wain isaka ne rompau ia-ia. Isaka ne rompau ia-ia

mo, masike nanie imatai iae, hete sae ne rompau ramahaiso.

¹² Ne ia wain isupu seha-seha na inoo na rompau rai mo, noo sani mamsaka rompau rai tewa. Mamsaka rompau mo, rompau nene upue. Ia wain isupu seha-seha rei inoo asu wesie rehokai, oyo irumai arihoni rompau rai. Oyo asu wesie rei reoto rompa isa na nesia raruma rawena-wenaso.

¹³ Ia wain isupu seha-seha rei irumai, areimo tau ia mo, hasae isupu seha-seha man. Reiso anoi runare tewa.

¹⁴⁻¹⁵ Au reini mo, Au sani mamsaka rompau wain isaka ne rompau ia-ia. Au sahoro unoo runare ia-ia. Masike mka umataku iae hete sae we rompa ramahaiso. Uationa we rompau. We rompau iae rationaku oi. Noo sani Amaku iationa Au na Au uationa Amaku oi.

¹⁶ Au iae we rompau tamena wason oamanouso tewasi na we rompau waron mai koka. Reiso Au iae kahurae urorire na uamanou pusire tau osa. Rompau tamena rai oi mka raatinu nioku. Rompau rai pusire mka ramanouso tau osa. Au mka una mamsakae tau pusire.

¹⁷ Amaku anoi runaku. Areimo tau urui ruaku na umataku hete sae we rompau ramahaiso. Ne umataku, mka uamahaiku honu.

¹⁸ Ia isa ihunu Au mo, tewa. Ne Au ruaku sahoro urui ruaku na sio ohunuku. Au we kawasa urui ruaku na umataku runa we kawasa uamahaiku honu. Amaku iaisosiku na una san rei.”

¹⁹ Sio ona Yahudiu oatinu Yesus iasau san rei, oyo otuntana na umau honu.

20 Sio panesi oasau ata, "Sakahatene remasuniki reiso imukei. Pene atinu tau Ia!"

21 Ne sio umau oasau ata, "Tumata waini sakahatene remasuniki mo, ianamana san rei tewa. Tumata wain sakahatene remasuniki mo, ne kawasa isuisene ia mata putie tewa."

Sio Yahudiu oparisaa tewa ata Yesus mo Anahatana Anai

22 Nene onone tau karisaa anoo rapeka runa oseka tau Anahatana ne numa mainisie wan no nisa iuna apaputiki roe kota Yerusalem.* Tau rei mo, mahatane nanie.

23 Yesus ieu roe Anahatana ne numa mainisie ieu sui Salomo ne teune.

24 Oyo sio ona Yahudiu oo ohoriki. Oyo oahata, "Munata titue Ano mo, Ia Aia waini Anahatana Ihitiki na Iapuheu Mansiau mo, asau osima mai nea. Pene unama ase-asei pan anoma."

25 Oyo Yesus iahata, "Uasau osimo nea rei. Ne oparisaa tanuku tewa. Au una sima-simana panesi osimo nea. Tea mo, Amaku irui kawasa osiku na una rai pusire nea. Sima-simana waroni unare reimo na ratuhete osimo ata Au reini Au seia.

26 Ne oparisaa tanuku tewa. Tau omi mo, omi sani rompau waron nene mamsaka tamene.

* **10:22 10:22** Sio Yahudiu anoo rapeka runa naone no nisa isa iapaputi Anahatana ne numa mainisie tau iakanupu hahu osi ne anahatanau wason titue tewa. Sio Yahudiu onesi no nisau, oneiso, oyo ereeu rotu-tu musum tonu, samatoro ouna karisaa oseka tau no numa mainisie tau sio una apaputiki nea. Karisaa rei reeu rotu-tu onona wanu.

27 Au we mansiau oatinu tanuku sani rompau oatinu tau no mamsaka rompau. Uationa we mansiau na opusuku.

28 Au unaso oamahaiso kata Anahatana rotu-tu ria supan. Reiso mka omata rotu-tu ria supan tewa. Ia seia man iwahuso arihoni hanaku anoe tewa.

29 Amaku sahoro iruiso osiku. Amaku mo, Ia mainae inesi ia seia man. Reiso ia seia man iwahuso arihon Amaku hanai anoe tewa.

30 Au na Amaku mo, uama osa.”

31 Oyo sio ona Yahudiu oroma hatu honu nanie orai na ohunui.

32 Ne Yesus iahata, “Omi onoo sima-simana panesi nea waron Amaku iaisosiku na unare. Reiso arihon sima-simana rai mo, sima-simane sae sahoro reunamo na nanie orauku tau hatu na ohunuku?”

33 Oyo oasau ata, “Araua tau hatu pusu sima-simana tewa. Ne Ano anamana sani Ano mo, Anahatana rei. Aikee Ano mo, Ano mansia sani ami oi. Ne auna ruam sani ano mo, Anahatana rei.”

34 Oyo Yesus iahata, “Sio okanu tau Anahatana ne anamanaya† ata Anahatana iasau osi sio Yahudiu no sio mainaya ata, ‘Au uanamana osimo sani omi mo, mo hali noo sani Au ruaku oi.’

35 Omi anei ata sae man waron sio okanure tau Anahatana ne anamanaya mo, pusire manisata. Reiso noo sani Anahatana ruai iasau ata sio wason osupu ne anamanaya mo, no hali sani Ia ruai.

† **10:34 10:34** Yesus inana Anahatana ne anamanaya raini arihon Sura Kapatau 82:1-2. **10:34 10:34** Kapatau 82:6

³⁶ Anahatana iromaku na iaisosiku uhokaku mai tuniai reini. Reiso, sani uasau ata, 'Au mo, Anahatana Anai', pene anomo rasaa. Pene oasau ata Au uanamana sani Au mo, Anahatana rei.

³⁷ Sani Au una sae waron Amaku iunare tewa, areimo pene oparisaa tanuku.

³⁸ Ne sani Au una sae wan rehati Amaku uai anoe rei, masike oparisaa tanuku tewa sirinia iae, kahurae oparisaa tau sima-simana waroni Au unare rei. Parisaare na oanei ia-ia ata Au na Amaku mo, uama osa."

³⁹ Oatinu Yesus iasau san rei, oyo osota rea Yesus honu. Ne Yesus ieui arihonso.

⁴⁰ Oyo Yesus isipu toha Wae Yordan na ieui ria hae, oyo iruei ria rei. Naone Yohanis isohu mansiau ria rei na mansiau oanei ata oarihoni no rosau nea.

⁴¹ Mansia panesi ohokaso mai tanui. Oahata, "Yohanis mo, iuna sima-simane wan retuhete ata ne kawasa arihon Anahatana isa man tewa oi. Ne sae waron iasau rerihon la onate reini mo, pusire manisata."

⁴² Sio wason oeuso noi Yesus rei, sio panesi oparisaa tanui.

11

Lasarus imatai

¹⁻² Ia hanaie isa wain nanai Lasarus. Ia mo, iruei poe nia Betania. Iruei ikata ne hotau sio ua. Ne hotau rei nanao mo, Maria na Marta. Maria sahoru mka isona Upuri Yesus ain atua tau mina hau rihue samatoro ikusa Yesus ain atua tau ne huau.

Taue isa Lasarus ikupui mtinte.

³ Reiso ne hotau ua rei oaisosi ia isa ieu isima osi Yesus rerihoni Lasarus. Hoka poe, iasau osi Yesus ata, “Upu, ia wain anom runai nai osa rei waipo ikupui.”

⁴ Yesus iatinu san rei, oyo iasau ata, “Kupue reimo, mka rehunui tewa. Ne, kupue reimo, mka reuna mansia onoo Anahatana ne kawasa wani mainae nai osa na mansiau oamuiira Au, Anahatana Anai.”

⁵ Yesus anoi runa Maria, Marta, na Lasarus.

⁶ Ne iatinu ata Lasarus ikupui, oyo iruei noi rei onona ua asi.

⁷ Iruei onona ua pusi, samatoro iasau osi ami, ne mampusua. Iahata, “Mai na inunta poe otoa Yudea honu.”

⁸ Atinu san rei ahata, “Ano Matuhetene. Matomato rei man sio ona Yahudiu poe rei nanie oraua tau hatu. Reiso nanie anunia poe rei honu tau sae?”

⁹ Ne Yesus nanie iasau ata sani sae isa remunai, areimo pusu Amai ne maue. Reiso iahata, “Ranie hatae osa, ranie resita yam hutusa rahana ua. Reiso sani ieu tau ranie mo, mka iamasiru tewa tau inoo mosa arena.

¹⁰ Ne ia seia ieu tau pumono mo, mka iamasiru tau manahane tewa, reiso inoo mosa arena tewa.”

¹¹ Yesus iasau honu ata, “Re neta Lasarus mo, waipo inekei. Ne nanie ueu poe uhanui.”

¹² Oyo ami, ne mampusua asau ata, “Upu, munata waipo inekei mo, mka ne kupue rei iake, tea!”

¹³ Yesus waimo iasau reimo, rerihoni Lasarus waipo panokoi nea. Ne ami ata kani Lasarus mo, waipo inekei man.

14 Reiso Yesus iasau iau-iauhun osima tewa. Iahata, “Lasarus mo, panokoi nea.

15 Panokoi tu-tuku tewa mo, tau omi mo iake. Tea mo, mka omi oparisaa tau Au ia-ia honu. Mai, na ieuta poe inooi.”

16 Yesus ne mampusue isa wain nanai Tomas. Sio oiki tau Ia Iki Alaleka. Iahata, “Munata san reimo, mai na pusita ieu ikatai. Na pusita imatata ikatai oi.”

Yesus iuna kuru Lasarus ne hotau anoo

17 Yesus na ami, ne mampusua, ahokama poe nia Betania, samatoro anei ata Lasarus mo, sio atasiniki pan kupuro anoe onona ate nea.

18 Nia Betania mo, kilou tonu san rei arihon kota Yerusalem man.

19 Reiso, sio Yahudiu panesi on roe rei ohoka nanie ouna kuru Maria na Marta anoo tau no hota panokoi nea.

20 Taa Marta iatinu ata Yesus waimo haineke nea, oyo ieu inapai na isupui. Ne Maria mo, iru-ruei pan numa anoe man.

21 Marta iasau osi Yesus ata, “Upu, sinana tutua, hotaku panokoi tewa.

22 Ne au iae uanei ata sae wan ainisiki arihon Anahatana mo, mka iruiki osia rei sirinia.”

23 Yesus iahata, “Marta. Hotam mo, mka iama-haiki honu.”

24 Marta iahata, “Ama, au iae uanei ata hotaku Lasarus mka iamahaiki honu tau Anahatana iuna sio matana oamahaiso honu tau tuniai reini repena.”

25 Yesus iahata, “Au sahoro una mansia oamahaiso honu na Au sahoro unaso oamahaiso okata Anahatana rotu-tu ria supan. Sio wason oparisaa

tau Au, masike omataso nea iae, mka oamahaiso honu.

²⁶ Na sio pusiso wason oamahaiso asi na oparisaa tau Au, sio mo, mka omataso rotu-tu ria supan tewa. Ano parisaa tau sae wani uasaui osia reini te tewa?"

²⁷ Iahata, "E-e Upu. Uparisaa tanua, Upu. Uparisaa ata Ano mo, Ia Aia wain Anahatana Ihitiki na Iapuheu Mansiau. Ano mo, Anahatana Anai wain itotoe runai na ihokai mai tuniai reini."

²⁸ Oyo Marta inuniki poe ne numa nanie ioi Maria. Ne sio panesi wasupo numa anoe reiso iarahuhu osiki. Iahata, "Maria. Ia Ona Matuhetene wain ihokai nea. Wain iasei nnaya."

²⁹ Maria iatinu san rei, oyo ihitio ieui sisaa na isupu Yesus.

³⁰ Tau rei mo, Yesus inusu niane tewasi. Waimo naniai sinasi wan Marta isupui rei asi.

³¹ Tau reimo sio Yahudiu wasumo Maria ne numa anoe ouna kuru anoi. Onoo Maria ihitio ieu ihokai sisaa reiso oeu pusui. Sio rei oeu pusui tau oata kani Maria nanie ieui irani ria Lasarus ne kupuro.

³² Taa Maria ihoka inoo Yesus, oyo irike tune mai Yesus uai anoe. Oyo iahata, "Upu. Sinana tutua mo, hotaku panokoi tewa."

³³ Yesus inoo Maria na sio Yahudiu rei oran oapunokoso, iahana anoi wakihi pusiki nai osa.

³⁴ Oyo iasei, "Oeu oatasiniki sui supa?"

Oasau ata, "Upu, mai na ruam aeu ria anoo mana."

³⁵ Matai waena.

³⁶ Oyo sio Yahudiu umau wason noi rei oasau ata, “Masi onoo. Anoi runa Lasarus nai osa.”

³⁷ Ne sio umau honu oasau ata, “Ia onate reini sahoro ia wain isuisene ia mata putie rei, tea! Reiso nanie itapi Lasarus panokoi tau sae?”

Yesus iapuhai Lasarus

³⁸ Yesus anoi wakihi pusiki nai osa na Lasarus ne hotau uaso honu oyo ieui ria hatu nohue wan oatasini Lasarus rei. Hatu nohue rei mo, onete nene mitanunue tau hatu onate isa.

³⁹ Hoka ria, oyo iasau ata, “Nea hatu rei.”

Ne Lasarus hotai wain nanai Marta iahata, “Upu, hotaku Lasarus mo, panokoi onona ate nea. Reiso mka haui nea.”

⁴⁰ Yesus iahata, “Anom repeka runa sae wan uasau osia rei tewa? Munata aparisaa tanuku mo, mka anoo Anahatana ne kawasa rei.”

⁴¹ Onea hatu wan renete hatu nohue nene mitanunue rei. Oyo Yesus inoo na roe nante iahata, “Ama! Uainisi iake arihonia tau atinu tau we mainisie.

⁴² Uanei ata Ano mo, atinuku sui osa. Ne, uasau san reini na sio wason ooso mai rei oparisaa ata Ano ruam sahoro aisosiku mai tuniai reini.”

⁴³ Iainisi pusi oyo, iakapona nioi mainae ata, “Lasarus! Ahokaya!”

⁴⁴ Sira tau Lasarus wain imatai nea rei ihokai rei sirinia. Hanai ain rakanihoo tau nipae wan opai tanui rei asi. Nipae iae rehehe unui asi oi. Oyo Yesus iaisosiso ata, “Nosu nipaya waron rakanihoo ne patane rei na ieu iake.”

Sio mainaya arihon akama Yahudi onina arena nanie ohunu Yesus

⁴⁵ Sio Yahudiu panesi wason ohokaso poe Maria onoo Yesus iuna Lasarus iamahaiki honu, reiso oparisaa tanui.

⁴⁶ Ne, sio umau oeu osima runa sae wan Yesus iunai rei osi sio onata arihon akama Yahudi.

⁴⁷ Reiso, sio imam no sio mainaya na sio onata arihon akama Yahudi oamanou sio siniriu oyo oasau ata, "Nanie iuna sae? Wain iuna sima-simana panesi.

⁴⁸ Sani itapiki iuna san rei sui osa mo, mka sio pusiso oparisaa tanui. Oyo sio tantara Romau mka ohoka okohu ita re numa mainisie na ita Yahudiu pusita."

⁴⁹ Ia isa arihon sio wason oamanouso roe rei wain nanai Kayapas. Ia mo, iuna sio imam no ia mainae tau musum rei. Iasau osiso ata, "Oarirunemo nai osa!

⁵⁰ Oanei tewa ata nene iake mo, sana osa imatai ikati mansia pusiki. Pene tu-tu ita Yahudiu imata pusita noso ia osa."

⁵¹ Kayapas iasau ata ia osa kahurae imatai ikati sio panesi arihon ia ruai anoi tewa. Iasau san rei tau ia mo, sio imam no ia mainae tau musum rei. Ne, ianei tewa ata waimo isima runa Anahatana ne anamanae ata Yesus mo, mka imatai ikati sio Yahudiu.

⁵² Yesus panokoi ikati sio Yahudiu man tewa. Ne, panokoi ikati Anahatana ne mansiau wason owena-wenaso mai tuniai rein. Na iamanou pusiso tau osa.

⁵³ Reiso tau rei, sio siniriu oapamata sou nanie ohunu Yesus.

⁵⁴ Reiso Yesus ieu ria nau sui sio Yahudiu tewa nea. Ieu iau-iauhuniki man. Ieu arihon kota Yerusalem ikata ami ne mampusua na pan niane isa wan nanae Epraim. Niane rei wapan haineke otoa huie isa, oyo aruema pan rei.

⁵⁵ Haineke ami Yahudiu ma karisaa anori rapeka na Anahatana ihoka ma upu momou arihon otoa Mesir nea. Sio panesi arihon niana-niana ohokaso naone roe Yerusalem. Ohokaso naone na osekata tau ruao arihon no rosa repusu ami Yahudiu ma monne, na reeu mai karisaa mainae reimo, opusui iake nea.

⁵⁶⁻⁵⁷ Sio imam no sio mainaya na sio onata arihon akama Yahudi nanie osota Yesus. Reiso orui anamanae san rei, "Munata ia seia mani ianei Yesus wain sui supan mo, sima osima sansana."

Reiso sio wason ooso roe Anahatana ne numa mainisie nusue onina-nina Yesus. Oasau osi umau ata, "Pusu ano mo, sapan? Mka Yesus ieu mai karisaa reini te tewa?"

12

Maria iauhene Yesus ain atue tau mina tune wan haue rihue

¹ Nesie onona nome samatoro ami Yahudiu ma karisaa anoma rapeka na Anahatana ihoka ma upu momou arihon otoa Mesir. Yesus inuniki poe nia Betania honu. Betania mo, Lasarus wain Yesus iunai iamahaiki honu ne niane.

² Sio poe niane rei ouna nasa mainae tau nanie oamuiria Yesus. Marta sahoro ireha muaina rai, oo Lasarus ikata sio wason orue oaiso okata Yesus.

³ Oyo Maria inana mina tunne. Mina rei mo, mina hau rihue wan nanae mur. Irori liter sama tihue. Mina reimo, hunonie mainae. Maria isona Yesus ain atua tanui oyo ikusa ain atua tau ne huau. Numa anoe rei mo, haue rihue nai osa tau mina rei.

⁴ Yesus ne mampusue isa wain nanai Yudas. Ia on pan nia Kariot. Ia sahoru mka iahen Yesus. Iasau ata, "Pene!

⁵ Mina reimo, hunonie sani ia isa isupu kati tau musum osa. Nene iake mo, iaheniki na nene kepen, aruire osi sio mosokinia."

⁶ Yudas iasau san reimo, tau anoi runa sio mosokinia mo, tewa. Ne areimo, tau ia mo, ia tai onate wain saka ikimanaka kepen arihon kepen waron irime osi Yesus sio.

⁷ Reiso Yesus iasau osiso ata, "Ia ruai! Pene oakapuku tau ia pina rei. Iaheniki tewa na mka umataku, oyo oaunutuku, ia pina rei nanie isonaku tau mina na iseka tau we patane oni panokoku tewasi.

⁸ Sio mosokinia mo, okatamo sui osa. Reiso sui supan man omi oakahaiso pusu ruamo mo maue. Ne Au mo, urue ukatamo sui osa tewa."

Sio Yahudiu oapamata sou nanie ohunu Lasarus

⁹ Sio Yahudiu panesi oatinu ata Yesus waipo nia Betania. Reiso oeuso poe rei nanie onooi. Na nanie onoo Lasarus oi. Lasarus mo, ia wain Yesus iunai iamahaiki honu rei.

¹⁰ Reiso sio imam no sio mainaya oapamata sou nanie ohunu Yesus na Lasarus oi.

¹¹ Tea mo, sio Yahudiu panesi oatinu rerihon Lasarus oyo oparisaa tau Yesus. Opusu sio imam no sio mainaya tewa nea.

Yesus inusu kota Yerusalem

¹² Nene han roe san rei, sio panesi wason ohokaso roe kota Yerusalem tau ami Yahudiu ma karisaa. Oatinu ata Yesus waipo arena tihue nea nanie ieu roe kota rei.

¹³ Reiso, oeu onana ai sanaya oyo oeu hokaso arihon kota nanie onapa Yesus. Oakapona ata,

“Ainaa na Anahatana!

Arui iake osi Ia wain ihokai tau ma Upu Anahatana nanai.

Arui iake osi ami Israel ma Aia reini.”

¹⁴ Yesus isupu keledai anae isa, oyo isaai. Iuna san reimo, noo sani sae waron Sakaria ikanu tau Anahatana ne anamanaya ata,

¹⁵ “Omi Yerusalem, pene okaitau!

Masi onoo! Omi mo Ia Aia wain ihokai nea. Isaa keledai anae isa.”

¹⁶ Mataanoë, ami ne mampusua, anei tewa ata ikanu rerihoni sia. Ne, tau Yesus panokoi, oyo Anahatana iapusaai na roe noiyaha samatoro anei ata sae wan ikanui reimo, rerihon Yesus na sae waron ounare osiki.

¹⁷ Sio wason onoo Yesus ioi Lasarus on pani hatu nohue oyo iunai iamahaiki honu rei, oeu oruni rerihoni Lasarus.

¹⁸ Reiso, sio panesi oatinu rerihoni Yesus nea ata Ia sahoro iuna sima-simane wan retuhete ata ne kawasa arihon Anahatana. Reiso ohoka arihon kota Yerusalem na nanie osupu Yesus.

¹⁹ Onoo san rei, sio onata arihon akama Yahudi oasau mai umau ata, “Masi onoo! Ita nanie inete na pene sio panesi opusui ne mansia panesi ohoka upusui nea rei.”

Yesus isima runa mka imatai sapan

²⁰ Karisaa ami Yahudiu anoma rapeka na Anahatana ihoka ma upu momou arihon otoi Mesir mo, mansia panesi oeuso roe kota Yerusalem na oainisi oainaa na Anahatana. Mansia panesi rei mo, sio umau mo, sio Yahudiu tewa.

²¹ Ohokaso mai Pilipus. Ia mo, ne niane Betsaida pan otoi Galilea. Oyo oasau osiki ata, “Upu, ami nanie anamana na Yesus.”

²² Pusi, oyo Pilipus ieu iasau osi Andreas oyo uaso oeu oasau osi Yesus.

²³ Oyo Yesus iahata, “Nene orase nea tau Au, Tumata Reini mo, Anahatana Ihitiku umataku oyo Anahatana iamuiraku na iapusaaku na roe noiyaha.

²⁴ Oatinu mai ia-ia nanie uasau osimo. Nooku sani gandum kanie. Sani orahu gandum kanie poe tuamane mo, mka rematai ee, samatoro reruhui honu oyo reuhua panesi. Ne sani remata tewa, mka gandum rei hasae kanie osa rei man. Resinena tewa.

²⁵ Omi iae san rei oi. Ia seia wain ipusu ruai ne maue mai tuniai reini, ia mo, mka iamahaiki rotu-tu ria supan tewa. Ne ia seia wain iamanaku na imatai noso ipusu Au mo, mka pan muie rei iamahaiki ikata Anahatana rotu-tu ria supan.

²⁶ Ia seia man wain ianori na Au mo, kahurae ipusuku sui supan. Sui supan mana Au noi rei,

ia iae waimo rei oi. Ia seia man ianori na Au, mka Amaku iamuirai.

²⁷ Anoku wan mtinte nai osa. Nanie uainisi, ne kani uainisi sapan? Uasau ata, 'Ama, nea siraka wan reunaku sinsaraku rei arihoniku si?' Ne uainisi san rei mo, iake tewa. Tea mo, uhokaku mai tuniai reini mo, na sinsaraku.

²⁸ Reiso hasae uainisi ata, 'Ama, atuhete osi mansiau ata Ano mo, Ano mainae nai osa.' "Sira tau oatinu nioke isa on roe nante. Iasau ata, "Au uatuhete osi mansiau nea ata Au mo, Au mainae nai osa. Na Au mo, mka una mansia onoo we kawasa mainae honu."

²⁹ Sio panesi wason noi rei iae oatinu nioke rei oi. Reiso oasau ata, "Areimo tinaa tinunue." Sio umau honu oasau ata, "Tewa, areimo, Anahatana ne maisosie on roe noiyaha wain ianamana runai."

³⁰ Yesus iahata, "Nioke wan sinasi oatinui rei mo, Anahatana nioi na iakahai omi. Nioi na iakahai Au tewa.

³¹ Areini mo, orase tau Anahatana iapasana sio mai tuniai reini. Orase reini oi iae Anahatana nanieinei ia aia sakahatene wain ne kawasa tau tuniai reini.

³² Ne Au mo, mka osiuku roe hini on mai tuamane reini. Tau rei, mka uhuka arena osi ia sia man na oeuso mai tanuku."

³³ Yesus iasau san reimo, nanie isima na mka panokoi sapan.

³⁴ Oyo ia isa arihon sio panesi rei iahata, "Upu, ami anei nea oi arihon Anahatana ne maunauna ata Ia Aia wain Anahatana Ihitiki na Iapuheu Mansiau mo, mka iamahaiki rotu-tu ria supan. Reiso, Ano nanie asau ata, Ia Tumata wain

Anahatana Ihitiki mo, mka osiui roe hini tau sae? Reiso Ia Tumata wain Anahatana Ihitiki mo, ia seia?”

³⁵ Oyo Yesus iahata, “Au sani Manahane. Mka ukatamo potuina tewa nea. Manahane rei wain ikatamo. Reiso, oni Manahane reini wain asi, oamahaimo pan Manahane rei. Pene tu-tu pumono renetemo. Areimo, tau ia seia wain ieu tau pumono mo, ianei mosa arena tewa.

³⁶ Reiso oni Au wain ukatamo asi mo, oparisaa tau Manahane rei. Oparisaa na mo hali manahane.”

Yesus iasau san rei pusi, oyo ieui arihon rei na iauhuniki arihonso.

Sio Yahudiu openeso oparisaa tau Yesus

³⁷ Masike Yesus iuna sima-simana waron ratuhete ata ne kawasa arihon Anahatana panesi mai sio Yahudiu uao anoa iae, openeso oparisaa tanui sirinia.

³⁸ Areimo reeu sani Anahatana ne ia mamsima runa ne maunauna wain nanai Yesaya iasau ata, “Upu, ami asima runaya, ne sio panesi oparisaa tewa.

Masike Ano atuhete me kawasa, openeso oparisaa.”

³⁹ Reiso oparisaa tewa. Tea mo, Yesaya iae iasau nea rerihon sio ata,

⁴⁰ “Anahatana iuna matao raputiso,
reiso onoo mosa tewa.
Ihuka anoo tewa,
reiso oanei tewa.

Reiso onuni oninai tewa.

Sinana oninai, Anahatana itotoe nea, 'Mka uapuheuso.' "

⁴¹ Naone Yesaya iasau san rei mo, areimo noo sani inoo Yesu ne kawasa mainae nea. Reiso isima nnai rei tea.

⁴² Ne masike sio Yahudiu no sio mainaya panesi oparisaa tau Yesu tewa, sio umau oparisaa. Ne openeso osima. Tea mo, okaitau ata sio onata arihon akama Yahudi osoposo na pene oheta ami Yahudiu ma numa mananouna nea.

⁴³ Onina na mansiau oamuiraso renesi onina na Anahatana iamuiraso.

Anahatana mka iapasana sio wason openeso tau Yesu ne maunauna

⁴⁴ Yesu iakapona nioi mainae osi sio panesi ata, "Ia seia wain iparisaa tau Au mo, iparisaa tau Au ruaku man tewa. Ne iparisaa tau Ia waini iaisosiku uhokaku mai tuniai rein oi.

⁴⁵ Inoo Au, areimo inoo Ia wain iaisosiku rei oi.

⁴⁶ Au wan uhokaku mai tuniai rein na uatuhete Anahatana ne arena osimo. Au sani manahane wan retuhete arena na onoo mosa. Uhokaku na ia seia wain iparisaa tau Au, mka irue iapumonoi tewa nea.

⁴⁷ Ne ia wain iatinu we maunauna ne ipusure tewa, Au mo, uapasanai tewa. Areimo tau uhokaku mai tuniai reini mo, na uapasana mansia mo, tewa. Ne uhokaku reini mo, na uapuheu mansiau na pene Anahatana iapasanaso.

⁴⁸ Ia seia wain ipenei tanuku na iatarima we maunauna tewa mo, Anahatana mka iapasanai.

Sani tuniai nanie repena nea, mka iapasanaso pusu openeso tau Au we maunauna.

⁴⁹ Areimo tau Au mo, uanamana pusu ruaku we maue tewa. Ne uanamana pusu Amaku ne maue. Ia sahoro iaisosiku. Ia sahoro iasau runa sae wan kahurae uasau osimo.

⁵⁰ Au uanei ata sae wani iaisosiku uasau runai osimo reimo, reuna mansiau oamahaiso okatai rotu-tu ria supan. Reiso Au mo, uasau runa sae man waron Amaku iaisosiku uasaure.”

13

Yesus isohu ne mampusua aio atua

¹ Nene hanroe nanie karisaa anoma rapeka na Anahatana ihoka ma upu momou arihon otoa Mesir. Yesus ianei nea ata nene orase nea tau iei iarihon tuniai rein na inuniki roe Amai. Anoi runa ami, ne mampusua, wan akatai mai tuniai rein na nanie iatuhetema ata anoi runama rotu-tu imatai iarihonima.

² Ia aia sakahatene iakarema Yudas anoi nea. Yudas mo, Simon on pan nia Kariot anai rei. Reiso ia aia sakahatene iakarotai nanie iahen Yesus osi ne nisau. Ami mampusua wan aima akata Yesus.

³ Yesus ianei nea ata Amai irui kawasa osiki tau sae man. Ianei nea oi ata ihokai on roe Anahatana na mka inuniki roe Anahatana honu.

⁴ Reiso, wan arue aima, Yesus ihitio roe, oyo inosu ne papi naue. Oyo inana nipa sinte isa samatoro ikanihooi mai ahai.

⁵ Oyo iaiinu tihu tau parten isa samatoro isohu ami, ne mampusua, aima atua. Isohure pusi, oyo ikusa aima rai tau nipa sinte wan ikanihooi mai ahai rei.

⁶ Ihoka pakarema Petrus wain sio oiki tau Simon oi. Iasau ata, “Upu, iake tewa tau Ano asohu aiku atua.”

⁷ Yesus iasau ata, “Petrus, sae wan Au unai reini mo, ano aneiki tewasi. Ne mka pani muie samatoro mka aneiki.”

⁸ Ne Petrus iahata, “Pene, Upu! Masike rotu-tu umataku iae, upeneku utapia asohu au aiku.”

Ne Yesus iahata, “Sani usohu aim atua tewa, areimo ano mo, auna Au we mampusue tewa nea.”

⁹ Oyo Petrus iasau osiki honu ata, “Upu, munata san rei mo, pene hasae aiku atua man ne hanaku na unuku oi.”

¹⁰ Yesus iahata, “Ia wain isohui nea mo, hasae isohu ain atua man. Areimo, tau ne patane mo, kitataie tewa nea. Om reini anomo kaia nea. Tea mo, Anahatana isiru heu mo rosau nea. Ne ia isa mo, tewa.”

¹¹ Yesus iasau san rei tau ianei nea ata ia seja nanie iaheniki. Reiso, iasau ata pusiso anoo kaia tewa.

¹² Yesus isohu ami, ne mampusua, aima atua pusi, oyo iausahu ne papi naue rei honu. Oyo iuni iru-ruei roe naniai honu. Oyo iasei tau pusima ata, “Pusimo oanei sae wan Au unai osimo sinasi rei te tewa?”

¹³ Omi saka oiku tau Matuhetene na Upu. Areimo titue. Tau Au mo, omi mo Upu na mo Matuhetene rei tea.

¹⁴ Reiso masike Au mo, omi mo Matuhetene na mo Upu rei mo, urati ruaku usohu aimo atua sani Au maniane, omi iae kahurae osohu aimo atua ia isa na ia isa.

¹⁵ Areimo tau Au wan uatuhetei osimo nea. Reiso omi iae kahurae ouna sani sae wan Au unai osimo rei.

¹⁶ Oatinu mai ia-ia, nanie uasau osimo. Ia maniane mo, ia mainae inesi ne upu tewa. Ia maisosie mo, ia mainae inesi ia wain iaisosiki rei tewa.

¹⁷ Oanei pusi sae wan uasaure osimo nea rei. Reiso sani opusui mo, mka osupu iake.”

Yesus isima na ia seia sahoru nanie iaheniki

¹⁸ Yesus iasau osi ne mampusua ata, “Uasau ata osupu iake, ne uanamana rerihon omi pusimo tewa. Uromamo, uanei mo hali nea. Ne uroma ia isa wain mka iaheniku na iuna sui sae wan sio okanui tau Anahatana ne anamanaya. Okanu san rei, ‘We neta wain saka uama iai ikataku, iuna we nisa.’

¹⁹ Usima osimo nea reini rerihoni ia isa wain iaheniku, na sani iaheniku nea, omi oparisaa ata Au reini mo, Aia wain Anahatana Ihitiku na Upuheu Mansia.

²⁰ Oatinu mai ia-ia, nanie uasau osimo. Ia seia iatarima ia wain uaisosiki, areimo iatarima Au nea oi. Ia seia wain iatarima Au, arei iae noo san iatarima Ia wain iaisosi Au.”

²¹ Yesus ianamana san rei pusi, oyo anoi mtinte nai osa. Iahata, “Atinu mai ia-ia, nanie uasau osimo. Ia isa arihon om reini mka iaheniku osi we nisau.”

²² Ne mampusua, ami, anoo mai umau. Asira. Anei tewa Yesus ianamana rerihoni ia sia.

²³ Au, ne mampusue wain sio oiku tau “ia wain Yesus anoi runai” urue haineke Yesus.

24 Oyo Simon Petrus irui kakinatē osiku na iahata, “Asei tau Yesus. Ia sia sahorō mka iaheniki.”

25 Reiso ueu hai-hainekei na uasei ata, “Upu, ia seia sahorō mka iahenia?”

26 Yesus iahata, “Mka unono poroti reini poe sanaute, oyo uruiki osi ia rei.”

Iasau san rei pusi, oyo inana poroti, inonoi poe sanaute, oyo iruiki osi Yudas. Yudas mo, Simon on pan nia Kariot anai.

27 Taa Yudas inana poroti rei, ia aia sakahatene iamasuniki. Oyo Yesus iasau osiki ata, “Sae wan nanie aunai mo, unai rapu nea.”

28 Ne ami pusima wan arue ai akata umau rei, ia seia man ianei tewa ata nanie iasau osi Yudas san rei tau sae.

29 Ne Yudas mo, ia wain irime ma kepen. Reiso sio umau oanei mo, Yesus waimo iaisosiki ieu ihane sae umau tau ma karisaa rei. Te nanie tau ieu irui sae isa osi sio mosokinia.

30 Taa Yudas inana poroti rei pusi, oyo ihitio ieu rei sirinia. Tau reimo, wapan pumono nea.

Yesus iaunau ne mampusua na anoo na umau

31 Yudas ihitio ihoka ieu, oyo Yesus iasau osi ami, ne mampusua, ata, “Nene orase tau sio oamuiira Au, Tumata Reini mo, Anahatana Ihitiku nea. Mka oamuiira Anahatana noso Au oi.

32 Sani oamuiira Anahatana noso Au, Anahatana iae iunaso oamuiira Au oi. Potuina tewa oi, oyo iunai nea.

33 We hehuka, potuina tewa nea mka ukatamo tewa nea. Omi mka oninaku. Ne okataku roe rei iake tewa. Areimo, uasau runai osi sio onata

arihon akama Yahudi naone nea. Oyo wan uasau osi omi muie reini honu reini.

³⁴ Reiso nanie uasau runa maunau honue osimo. Anomo na umau. Omi mo, kahurae anomo na umau noo sani Au anoku na omi.

³⁵ Sani anomo na umau san rei, mka mansiau pusiso onoo ata omi mo, Au we mampusua.”

³⁶ Oyo Simon Petrus iasei tanui ata, “Upu. Nanie aeua sui supa?”

Yesus iasau ata, “Nanie ueuku roe naniaku wan ano mka aeue roe rei tewasi. Ne mka tau muie aeue roe naniake rei.”

³⁷ Petrus iasei honu ata, “Upu, upusua tewasi tau sae? Au mka umataku noso Ano.”

³⁸ Yesus iasau osiki ata, “Ano nanie amataya noso Au si? Atinu mai ia-ia, nanie uasau osia. Oni on punanoe, manua ratunkeko tewasi oimo, ano auhaa ata ationaku. Auhaa nai tonu nea!”

14

Yesus mo, arena wan manisate na ieuta roe Anahatana

¹ Yesus iasau osi ne mampusua ata, “Pene anomo rauponu. Parisaa tau Anahatana sui osa na parisaa tau Au sui osa oi.

² Roe Au Amaku ne numa mo, kakaranaya panesi. Sani munata titue tewa, uasau osimo. Nanie uanaone roe rei na useka tau naniaka osimo matane.

³ Uanaone roe rei na sani naniamo waruro nea, mka ununiku mai na unanamo na okataku roe rei. Unanamo na sui supan man Au noi rei, omi iae okataku noi rei oi.

⁴ Oanei arena wan reeu roe naniaku wani Au nanie ueuku roe tanui rei.”

⁵ Tomas iasau osiki ata, “Upu, ami anei tewa ata nanie aeua sui supa. Reiso sapan na ami anei arena rei?”

⁶ Yesus iahata, “Au sahoro arena na oeu roe Amaku. Au sahoro uatuhete sae wan manisate rerihoni Anahatana. Au oi, sahoro una mansia oamahaiso okata Anahatana rotu-tu ria supan. Hasae Au sahoro una arena na oeu roe Amaku.

⁷ Munata omi oationaku ia-ia nea, areimo oationa Amaku nea oi. On rahata reipan, omi mo, oationai na onooi nea oi.”

⁸ Oyo Pilipus iahata, “Upu. Atuhete Amam osima mai. Na anoma kaia.”

⁹ Ne Yesus iahata, “Pilipus ee. Ukatamo potuina rein nea rei! Ano mo, kahurae ationaku nea. Ia seia wain inoo Au nea, areimo inoo Amaku nea oi. Reiso ano nanie asau na uatuhete Amaku osimo tau sae?

¹⁰ Aparisaa tewa ata anoku osa na Amaku na Amaku anoi osa na Au? Maunauna waron uaunaure osimo rei mo, arihon Au ruaku tewa. Maunauna rai mo, arihon Amaku wain osa nnaku rei. Ia sahoro iunaku uaunaumo san rei runa una sima-simana waron iaisosiku na unare rei.

¹¹ Omi mo, kahurae oparisaa ata Au na Amaku mo, anoma osa. Munata oparisaa tau sae wan uasaui reini tewa, hete sae oparisaa tau sima-simana waron unare nea rei.

¹² Oatinu mai ia-ia, nanie uasau osimo. Ia seia man wain iparisaa tau Au mo, mka iuna sima-simana sani waron Au unare rei. Mka iuna sima-simana ranesi waron Au unare. Areimo tau nanie ueuku roe Amaku nea.

¹³ Sae man waron oainisire arihon Amaku tau Au nanaku, mka unare. Una san rei na mansiau oamuiria Amaku noso sae wan Au, Anai, unai rei.

¹⁴ Sae man waron oainisi arihon Amaku tau Au nanaku, mka unare.”

Yesus itotoe na irui Anahatana ne Inaha na iakahai sio wason oparisaa tanui

¹⁵ Yesus iasau osi ne mampusua ata, “Sani anomo nnaku, omi mka opusu we maunauna.

¹⁶ Oyo mka uainisi na Amaku iauwatu Ia isa na iakahaimo ikati Au. Mka iruei ikatamo rotutu ria supan.

¹⁷ Ia rei mo, Anahatana Ne Inaha. Ia mo, mka iatuhetemo rerihon Anahatana ne maunauna waron manisata. Ne sio mai tuniai reini wason oparisaa tau Anahatana tewa, openeso oatarimai. Tea mo, sio mo, oationai tewa. Onooi tewa. Ne omi mo, oationai. Areimo, tau Anahatana Ne Inaha rei ikata runamo na mka iruei pan anomo.

¹⁸ Au mo, mka ueu arihonimo sani sio iki sioiu tewa. Au mo, mka ununiku mai tanumo honu.

¹⁹ Wan haineke nea oyo sio mai tuniai reini wason Anahatana ne mansiau tewa, mka onooku tewa nea. Ne omi mo, mka onooku sinia. Tau Au mka uamahaiku honu, reiso omi iae mka oamahaimo honu oi.

²⁰ Sani uamahaiku honu, samatoro omi oanei ata anoku osa na Amaku na Amaku anoi osa na Au. Omi iae oanei ata anomo osa na Au na Au anoku osa na omi.

²¹ Ia seia ianei we maunauna na ipusure, ia rei sahoro anoi runaku. Ia wain anoi runa Au mo, mka Amaku anoi runai oi. Au iae mka anoku runai oi na uatuhete osiso ata Au mo, Au seia.”

²² Oyo Yesus ne mampusue isa wain nanai Yudas oi. Ne ia mo, Yudas on pan nia Kariot tewa. Iasau osi Yesus ata, “Upu, Ano hasae atuhete ata Ano mo, Ano seia osi ami man. Ne osi sio mai tuniai reini mo, tewa tau sae?”

²³ Yesus iahata, “Ia seia wain anoi runaku mo, mka ipusu we maunauna. Amaku iae, mka anoi runai oi. Mka Au runa Amaku ahoka na akata runai.

²⁴ Ia seia wain anoi runaku tewa mo, mka ipusu we maunauna tewa. We maunauna rai waron oatinure nea mo, Au ruaku we maunauna mo, tewa. Ne maunauna rai mo, arihon Amaku wain iaisosiku.

²⁵ Uasau rai pusire osimo oni wan ukatamo asi reini.

²⁶ Ne sani ununiku roe Amaku nea, mka Amaku irui ne Inaha, Ia sahoro iakahaimo. Mka ihokai runa Au we kawasa na iatuhetemo rerihon sae man. Na Ia iae mka iuna anomo rapeka runa maunauna waron uaunaure osimo nea rei.

²⁷ Nanie ueu arihonimo, ne mka una anomo kaia. Una anomo kaia noo sani sio mai tuniai rein tewa. Reiso pene anomo rauponu. Pene okaitau.

²⁸ Uasau osimo nea ata, ‘Nanie ueu arihonimo. Ne mka ununiku mai tanumo honu.’ Sani munata anomo nnaku, areimo mka anomo mirika tau Au nanie ununiku roe Amaku. Ia mo, Ia mainae inesi Au.

²⁹ Uasau osimo oni ueu tewasi ata mka ueu uarihonimo, na sani ueuku nea, oparisaa tau Au.

³⁰ Au mka uanamana osimo potuina tewa nea. Tea mo, ia aia sakahatene wain ne kawasa tau

tunia i reini wain nanie ihokai nea. Nanie ihokai imunaku. Ne ia mo, ne kawasa tau Au tewa.

³¹ Ne sio mai tunia i rein mo, kahurae oanei ata Au mo, anoku runa Amaku, na Au una sae wan iaisosiku na unai. Mai, na ieuta arihon reini.”

15

Yesus iatuhete ata kahurae anori osa nnai sui osa na Anahatana anoi manahane

¹ Yesus iruni runa matieue isa osi ne mampusua ata, “Au mo, noo sani ai anggur wan manisate. Omi mo, ai anggur nene sanaya. Amaku mo, nooi sani ia mamsaka nisi anggur.

² Sani ia mamsaka nisi iretu sanaya waron rauhua tewa mo, Amaku iae inea sio wason oasau ata anoo osa na Au ne oauhua tewa. Oauhua tewa, areimo no hali pannuhu na Anahatana anoi tewa. Sanaya waron rauhua, mka iseka tau nene totua na rahoka huaya panesi honu.

³ Omi mo, noo sani sanaya waron iseka tanre nea na nanie ohoka huaya nea. Tea mo, oparisaa tau maunauna waron uaunaumo tanure rei nea.

⁴ Omi mo, kahurae anomo osa na Au sui osa. Sani anomo osa na Au, mka Au iae anoku osa runa omi oi. Ai sanae wani oretui arihon nene tinaie nea mo, mka reuhua tewa nea. Omi iae san rei oi. Sani oamahaimo anomo osa runa Au tewa mo, mka oauhua tewa. Areimo, mo hali pannuhu na Anahatana anoi tewa. Reiso kahurae anomo osa na Au na oauhua.

⁵ Au reini mo, sani anggur nene tinaie. Omi mo, sani anggur nene sanaya. Ia seia wain anoi osa runa Au na Au anoku osa runa ia, mka iauhua.

Areimo ne hali pannuhu na Anahatana anoi. Ne sani anomo osa na Au tewa, mka mo hali pannuhu na anoi tewa.

⁶ Ia seia man wain iamahaiki anoi osa runa Au sui osa tewa, mka Anahatana ipesiki sani ia mamsaka nisi iretu anggur sanaya na nanie ipesire rei. Sani sanaya rai rakaimenso nea, iamanoure oyo ipesire pan usa na iakanupure.

⁷ Ne sani oamahaimo anomo osa runa Au sui osa na orime kuru we maunauna sui osa mo, oainisi sae man wan oninai arihon Amaku, mka irui sae wan oainisiki rei osimo.

⁸ Sani mo hali pannuhu na Anahatana anoi, areimo oatuhete ata omi mo, titue-tue Au we mampusua. Areimo oamuiira Amaku.

⁹ Anoku runamo nooi sani Amaku anoi runa Au. Reiso, omi mo, kahurae anomo osa runa Au sui osa na oanei ata Au mo, anoku runamo.

¹⁰ Sani opusu we maunauna, mka oanei ata anoku runamo. Au iae upusu Amaku ne mau-nauna na uanei ata anoi runaku.

¹¹ Usima na pusire osimo reini na anomo mirika sani Au oi. Na anomo mirika ia-ia.

¹² Areini mo, Au we maunaune osimo. Anomo runa umau, nooi sani Au anoku runa omi.

¹³ Ia wain anoi runa ne netau nai osa, areimo ia wain nanie irui ruai na imatai ikatiso runa iapuheuso.

¹⁴ Sani opusu we maunauna, omi mo, Au we netau.

¹⁵ Uoimo tau manianeu tewa nea. Tea mo, ia maniane mo, ianei sae wan upui iunai tewa. Ne uoimo tau we netau. Tea mo, usima osimo nea rerihon sae man wan uatinure arihon Amaku.

¹⁶ Omi oroma Au tewa na ouna we mampusua. Ne Au ruaku sahoro uroma omi na una we mampusua. Uromamo na mo haliu pannuhu na Anahatana anoi sui osa. Mo haliu pannuhu na anoi, mka Amaku irui sae man wan oainisiki tau Au nanaku.

¹⁷ Reiso we maunaune osimo wan san rei. Kahurae anomo runa umau.”

Sio wason openeso tau Anahatana openeso tau ne mampusua oi

¹⁸ Yesus iasau osi ne mampusua ata, “Sani sio mai tuniai openeso tau Anahatana, areimo openeso tau omi oi. Anomo rapeka ata sio mo, openeso tau Au naone nea.

¹⁹ Sinana omi anomo osa na sio mai tuniai reini wason openeso tau Anahatana mo, mka anoo runamo sani anoo runa no mansiau. Ne omi mo, anomo osa na sio rei tewa. Tea mo, uroma omi nea na pene okata sio mai tuniai reini. Reiso openeso tanumo.

²⁰ Anomo rapeka na sae wan uasau nnai osimo nea rei. Uasau ata, ‘Ia maniane mo, ia mainae inesi upui tewa.’ Reiso sani ouna sinsaraku nea, areimo omi iae mka sio ouna sinsaramo oi. Sani sio oatinu sae wan uatuheteso tanre, sio iae mka oatinu sae wan omi oatuheteso tanre rei oi.

²¹ Mka ouna sinsaramo tau omi mo, Au we mansiau. Tea mo, oationa Ia wain iaisosi Au reini tewa.

²² Sinana uhoka tewa na uatuheteso tewa, areimo osana tewa. Tea mo, openeso tanuku tewa. Ne, muie reini, Au wan uhokaku uatuheteso nea, reiso sio mo, mka oasau tewa

nea ata oanei tewa ata sae wan ounai rei mo, opalalosa.

²³ Ia seia wain ipenei tau Au, areimo ipenei tau Au Amaku oi.

²⁴ Onoo Au una sima-simana waron ia seia man iuna kuare tewa. Ne openeso oparisaa tau Au sirinia. Sinana Au una sima-simana rai tewa, osana tewa. Ne masike onoo sima-simana rai nea iae, openeso tau Au runa Amaku sirinia.

²⁵ Ne openeso tanuma rei, areimo opusu waron sio okanure tau Anahatana ne mau-nauna. Okanu ata Anahatana iasau ata, 'Openeso tanuku ne umunaso tewa.'

²⁶ Mka tau muie uaisosi Anahatana ne Inaha on roe Amaku na iakahaimo. Mka iatuhete maunauna waron manisata rerihon Anahatana osimo. Anahatana ne Inaha mka isima rerihoni Au.

²⁷ Omi iae kahurae osima rerihoni Au oi. Tea mo, oni mato uanori mai tuniai rein mo, omi okataku nea."

16

¹ Yesus ianamana osi ne mampusua ata, "Uasau osimo nea ata mka mansiau openeso tanumo na sani ouna sinsaramo mo, oparisaa tanuku sinia.

² Mka sio osopomo na pene oheta ita Yahudiu re numa mananoune. Renesi rei, mka sio wason ohunumo oata kani wason opusu Anahatana ne maue.

³ Sio mka ouna san rei tau sio mo, oationa Au runa Amaku tewa.

⁴ Mato uasau osimo nea na sani ouna sinsaramo mo, anomo rapeka ata Au uasau osimo

nea. Uasau osimo naone tewa, tea mo, Au wan ukatamo asi.”

Anahatana ne Inaha iakahai sio wason oparisaa tau Yesus

⁵ Yesus ianamana honu osi ne mampusua ata, “Nanie ununiku roe Amaku wain iaisosiku uhokaku mai tuniai reini. Ne ia seia man arihon omi iasei ata nanie ueuku supan mo, tewa.

⁶ Ne anomo rapunokoso tau uasau osimo ata nanie ununiku roe Amaku wain iaisosiku rei nea.

⁷ Nanie uasau sae wan manisate osimo. Ne sani ununiku, areimo iake osimo. Areimo tau sani ununi tewa, mka Amaku ne Inaha ihoka tewa na iakahaimo tewa. Ne sani ununiku mo, mka uaisosi ne Inaha ihoka na iakahaimo.

⁸ Sani Anahatana ne Inaha ihokai, mka iuna sio mai tuniai reini oanei ata sio mo, opalalosa. Mka iatuheteso runa ia sia sahoro iamanisa mai Anahatana uai anoe. Ia iae mka iatuheteso rerihoni seiso sahoro Anahatana mka iapasanaso.

⁹ Mka iunaso oanei ata opalalosa sani oparisaa tau Au tewa.

¹⁰ Nanie ununiku roe Amaku honu, reiso mka Anahatana ne Inaha iatuhete mansiau ata Au sahoro Au manisate. Omi mo, mka onooku tewa nea.

¹¹ Ia iae mka isima ata Anahatana nanie iapasana ia aia sakahatene wain ne kawasa tau tuniai reini nea. Reiso oanei ata mka iapasana sio oi.

¹² Nanie uasau panesi osimo asi, ne muie reini omi oatarimare ia-ia tewasi.

¹³ Ne mka Anahatana ne Inaha ihokai. Oyo iatuhetemo rerihoni sae waron titue arihoni Anahatana. Mka iakahaimo na oanei sae man

waron titue. Ruai ianamana tewa. Ne isima runa sae waron iatinure arihoni Amaku. Mka isima runa pan muie sapan.

¹⁴ Anahatana ne Inaha mka inana Au we maunaune na isima osimo. Reiso mka iuna mansiau oamuiraku.

¹⁵ Amaku ne sae man, areimo osi Au oi. Areiso uasau ata, Ne Inaha mka iasau osimo rerihon sae wani isupui arihon Au.”

Sio wason oparisaa tau Yesus mka sinsaraso ne mka anoo mirika honu

¹⁶ Yesus iasau osi ne mampusua ata, “Potuina tewa nea oyo onoo Au tewa nea. Ne mka, potuina tewa honu, uhokaku honu.”

¹⁷ Oyo Yesus ne mampusua umau oasau mai umau ata, “Iasau ata potuina tewa nea oyo inooi tewa nea, ne potuina tewa honu ihokai honu. Oyo wani iasau ata nanie inuniki roe Amai. Areimo sapan?”

¹⁸ Oasei sui osa ata, “Iasau ata potuina tewa nea mo, areimo sapan? Ami anei mosa sae wani iasau rei tewa.”

¹⁹ Yesus ianei ata nanie oasei tanui reiso iasau osiso ata, “Oasei tau umau rerihon sae wan uasau sinasi rei si? Wamo oasei tau umau ata potuina tewa nea oyo onooku tewa nea. Ne, potuina tewa oi uhokaku honu tea?

²⁰ Oatinu mai ia-ia, nanie uasau osimo. Omi mo, mka orani oasanoata. Ne sio mai tuniai reini mka anoo mirika. Mka anomo mtinta, ne mka anomo mirika honu.

²¹ Areimo noo sani ia pina isa iasanoata iahana reina nai osa tau nanie irue na anai. Ne, sani ia ikine iamrai nea, sinasi wan iasanoata iahana

reina rei mo, anoi kanihue nnai nea. Anoi mirike tau anai iamrai nea.

²² Omi mo, noo sani ia pina wain nanie irue na anai rei. Nanie oapunokomo noso Au. Ne tau uhokaku honu mai tanumo, omi mka anomo mirika. Ia seia man iuna kua sae isa tewa na pene anomo mirika.

²³ Tau rei mo, oasei sae isa arihon Au tewa nea. Atinu mai ia-ia, nanie uasau osimo. Sae man wan oainisiki arihon Amaku tau Au nanaku, mka iruiki osimo.

²⁴ Rotu-tu reini, oainisi sae isa arihon Au Amaku tau Au nanaku tewasi. Oainisi, mka irui osimo. Na anomo mirika nai osa.

²⁵ Uasau rai pusire osimo tau sou matieue, ne mka reeu mai tau nene orase na mka uanamana tau sou matieue tewa nea. Tau rei, mka uasau mai matamo rerihon Amaku.

²⁶ Tau rei, omi ruamo oainisi arihoni Amaku tau Au nanaku. Kahurae uainisi arihon Amaku osimo tewa nea.

²⁷ Tea mo, Amaku mo, anoi runamo tau omi anomo runa Au na oparisaa ata Au mo, uhokaku on roe Anahatana.

²⁸ Uhokaku on roe Amaku mai tuniai reini. Ne nanie ueu arihon tuniai reini na ununiku roe Amaku.”

²⁹ Ne mampusua oatinu san rei oyo oahata, “Areini mato Ano anamanai matae. Anamanai tau sou matieue tewa nea.

³⁰ Areini mato ami anei ata Ano anei pusire. Ano anina ia seia man tewa na iasei tau Ano rerihon sae man. Areimo tau Ano anei sae wan nanie aseiki naone nea. Areiso reunama aparisaa ata Ano mo, ahokaya on roe Anahatana.”

³¹ Oyo Yesus iahata, “Reiso mato oparisaa ata Au mo, uhokaku on roe Anahatana si?

³² Ne oatinu mai. Potuina tewa nea oyo omi oruma pamanahun sui mo numau. Oarihon Au ruaku man. Ne Au mo, ruaku man tewa. Areimo tau Amaku wain ikata runaku.

³³ Uasau raini pusire na anomo kaia noso anomo osa runa Au. Omi mo, mka sinsaramo mai tuniai reini. Ne omi mo, kahurae oapamese anomo. Tea mo, unesi sio wason onesiku mai tuniai reini nea.”

17

Yesus iainisi osi ruai

¹ Yesus ianamana osi ne mampusua suka, oyo iarinaa na roe nante oyo iainisi. Iahata, “Ama, nene orase nea tau umataku. Uainisi arihonia na amuira Au, Anam reini, na Au iae uamuira Ano oi.

² Tea mo, arui kawasa tau mansia pusiki osiku nea na Au una sio pusiso wason aruiso osiku rei oamahaiso okataya rotu-tu ria supan.

³ Mansia oamahaiso okataya rotu-tu ria supan mo, oationaya. Oationa Ano wan Anahatana wain manisate osa ruai. Na oationa Au, Yesus Kristus, wain Ano aisosiku uhokaku mai tuniai rein.

⁴ Uamuiraya mai tuniai rein. Tea mo, Au una pusire waron aisosiku unare nea rei.

⁵ Reiso Ama, uainisi arihonia na sani ukataya honu, amuiraku honu, noo sani naone ukataya oni tuniai reini wan tewasi.”

Yesus iainisi na Anahatana isaka ne mampusua

⁶ “Ama, uatuhete sio wason aruise osiku rerihoni Ano nea. Naone opusu sio mai tuniai reini ne aruise osiku nea. Sio rei mo, Ano me mansiau, ne aruise osiku nea. Opusu me maunauna nea.

⁷ Muie rein oanei nea ata sae man waron uaunaure na unare rei mo, pusire on roe Ano.

⁸ Tea mo, usima na maunauna waron Ano asau runare osiku rei nea. Na sio iae oatarimare nea. Sio iae oaneire ia-ia nea ata Au mo, uhokaku on roe Ano. Oparisaa ata Ano sahoru aiseosiku uhokaku rein.

⁹ Ama, uainisi osi we mampusua rei. Uainisi osi sio mai tuniai reini mo, tewa. Ne uainisi osi sio wason aruise osiku rein. Tea mo, sio rei mo, Ano me mansiau.

¹⁰ Sio wason we mansiau rei mo, Ano me mansiau oi. Sio pusise wason Ano me mansiau mo, Au we mansiau oi. Sio rei oamuiraku nea.

¹¹ Mka urueku mai tuniai reini potuina tewa nea. Areimo tau nanie ununiku roe tanua nea. Ne sio mo, wason mai tuniai reini asi. Ama, Ano wan manisate onate, sakaso na me kawasa wan aruiki osiku rei. Sakaso na pusise anoo osa, nooi sani ita ua wan anori osa.

¹² Oni ukataso asi mo, usakaso na we kawasa wan Ano aruiki osiku rei. Usaka runaso na okataya rotu-tu ria supan. Hasae ia osa man sahoru tewa. Ia rei mo, mka ikataya rotu-tu ria supan tewa na reeu san sae waron sio okanure tau me anamanaya.

¹³ Ama, nanie ununiku roe tanua nea. Ne uasau raini pusire oni Au wan tuniai reini asi na we mampusua anoo mirika, nooi sani Au iae anoku mirike oi.

¹⁴ Usima na me maunauna osiso nea. Reiso sio wason oparisaa tau Au tewa mai tuniai rein openeso tanso. Tea mo, sio sani Au, anoo osa na sio mai tuniai wason oparisaa tanua tewa.

¹⁵ Uainisi na ananaso arihon tuniai reini mo, tewa. Ne uainisi na asakaso arihon ia aia sakahatene wain saka iuna kahatene rei.

¹⁶ Sio rei mo, anoo osa tewa na sio wason oparisaa tau Au tewa wason mai tuniai rein. Noo sani Au iae anoku osa na sio rei tewa.

¹⁷ Akahai we mampusua na ouna me mansiau wason opusu me maunauna man. Oposu me maunauna waron manisata sui osa. Sae man waron Ano asau runare reimo manisata.

¹⁸ Noo san Ano aisosi Au uhokaku mai tuniai reini, Au iae uaisosi sio mai tuniai reini pusiki oi.

¹⁹ Noso sio, urui ruaku na uanori runaya ia-ia nea na sio iae orui ruao oanori runaya ia-ia oi.”

Yesus iainisi na sio wason oparisaa tanui tau muie anoo osa

²⁰ “Ama, uainisi osi we mampusua reini man tewa. Ne uainisi osi ia sia man wason mka oparisaa tanuku noso oatinu sae waron we mampusua oatuheteso.

²¹ Uainisi na pusiso anoo osa, nooi sani ita ua anori osa oi. Uainisi na anoo osa na uata, na sio mai tuniai rein oparisaa ata Ano sahoro aisosiku.

²² Uamuiru we mampusua nooi sani Ano amuiru Au. Au una san rei na pusiso anoo osa, nooi san ita ua iae anori osa oi.

²³ Au anoku osa na sio runa Ano anom osa runa Au. Uainisi na pusiso titue-tue anoo osa na sio mai tuniai rein oanei ata Ano aisosiku runa anom runaso, nooi san Ano anom runa Au oi.

²⁴ Ama. Unina na sio wason aruiso osiku nea rei okataku roe naniaku na onoo Ano amuiraku. Ano amuiraku, areimo tau anom runaku oni tuniai reini remrae tewasi.

²⁵ Ama, Ano ese hae osa man tewa. Masike sio mai tuniai rein mo, oationaya tewa, Au uationaya runa we mampusua oanei ata Ano sahoro aisosiku.

²⁶ Au uatuheteso reiso oationaya nea. Mka uatuheteso san rei sui osa na anoo na umau, noo sani anom na Au runa anoku osa nnaso oi.”

18

Sio osota Yesus

¹ Yesus iainisi suka oyo ieui arihon kota Yerusalem ikata ne mampusua. Oeuso poe wae ikine isa wani nanai Wae Kidron pan hae. Pan rei mo, nisi saitun isa wapan. Reiso Yesus sio oeuso pan rei.

² Yudas wain iahen Yesus osi sio ohunui rei iae ianei nisi rei oi. Tea mo, Yesus saka ieui ikata ne mampusua pan rei.

³ Reiso Yudas ihoka iautunu sio Romau no tantarau polotu osa na sio mamsaka ami Yahudiu ma numa mainisie. Sio imam no sio mainaya na sio onata arihon akama Yahudi oaisosi sio mamsakaya rai. Ohoka orori kamana, tunua, na atiena.

⁴ Ne Yesus ianei nea na sae wan mka reyari tanui. Reiso ieu isupuso oyo iasei tanso ata, “We amau, nanie onina ia seia?”

⁵ Oyo oasau ata, “Anina Yesus wain on pan nia Nasaret.”

Oyo Yesus iahata, “Au ruaku rein.”

Yudas wain iahen Yesus rei iae waimo iooi pan rei ikataso oi.

⁶ Taa Yesus iasau ata, “Au rein,” pusiso osuka hae muie oyo oamnohoso na poe tuamane.

⁷ Reiso Yesus iasei honu ata, “We amau, wan onina ia sia?”

Oasau ata, “Anina Yesus wain on pan nia Nasaret.”

⁸ Yesus iahata, “Uasau osimo sinasi nea ata Au reini. Munata titue Au rein sahoru ia wain oninai mo, ne tapi we mampusua rein oeuso.”

⁹ Yesus iasau san rei na sae wan iasau naone rei reeu. Naone iasau ata, “Ia isa arihon sio pusiso wason aruiso osiku rei, usakaso na okatata rotutu ria supan.”

¹⁰ Tau rei mo, Simon Petrus waimo irori tunue. Sira tau isaru tunue rei oyo ioto roha Malkus tinai ukune hae wanane warohai. Malkus mo, sio imam no ia mainae ne manorine isa.

¹¹ Oyo Yesus iasau osi Petrus ata, “Nusu me tunue rei. Au mo, kahurae sinsaraku nea. Amaku iaunutui san rei osiku nea.”

Sio orori Yesus roe ia mainae wain nanai Hanas

¹² Yesus ianamana runa Petrus pusi, oyo sio tantara Roma polotu osa runa no ia mainae na sio mamsaka sio Yahudiu no numa mainisie rei osota Yesus. Osotai samatoro okanihooi.

¹³ Oyo ororiki osi sio Yahudiu no sio imam no ia mainae wain nanai Hanas. Hanas mo, amai hanahanai tau Kayapas. Tau musum reimo, Kayapas mo, iuna sio imam no ia mainae.

¹⁴ Kayapas mo, naone iasau osi sio Yahudiu no sio mainaya ata, “Nene iake mo, sana osa imatai ikati mansia pusiki.”

Simon Petrus iauhaa ata iationa Yesus

¹⁵ Tau sio orori Yesus roe sio Yahudiu no sio imam no ia mainae mo, au na Simon Petrus uama aeu auhun tau muie pusu Yesus oi. Au uationa sio Yahudiu no sio imam no ia mainae rei. Reiso unusu kata Yesus oi pan sio Yahudiu no imam no ia mainae rei ne pakelo anoe.

¹⁶ Ne Petrus mo, kahurae inapa pan mui pan pakelo mitanunue man. Ueu honu nau haineke pakelo mitanunue na uanamana na ia pina maniane isa wain isaka mitanunue rei. Oyo itapi Petrus inusui pani pakelo anoe.

¹⁷ Oyo iasau osi Petrus ata, “Ano mo, Ia wain sio oamanarui rein ne mampusue isa rei tea!” Petrus iahata, “Tewa! Au mo, tewa!”

¹⁸ Tau pumono rei mo, mahatane. Reiso sio imam no ia mainae ne sio maniane u na sio mamsaka sio Yahudiu no numa mainisie umau oakanupu usa na ooso oasa ruao. Petrus ieu noi ioi iasa ruai noi rei oi.

Sio imam no ia mainae iasei Yesus

¹⁹ Sio imam no ia mainae iasei tau Yesus rerihon ne mampusua runa ne maunauna.

²⁰ Oyo Yesus iasau ata, “Au mo, uanamana mai mansia hutue matao kahutua. Au mo, saka uatuhete mansiau sui numa mananouna na sui Anahatana ne numa mainisie nusue wan ita Yahudiu saka iamanouta noi rei. Au mo, uatuhete mansia mo, uauhun-uauhun tewa.

²¹ Reiso nanie ase i tanuku san rei tau sae? Asei tau sio wason oatinu we maunauna nea rei. Sio rei mo, oanei sae wan uasau osiso nea rei, tea!”

²² Yesus wain ianamana, sira tau ia mamsakae isa iasapana uai anoe. Iahata, “San rei si? Anamana na sio imam no ia mainae san rei si?”

²³ Ne Yesus iahata, “Sani munata sae wan uasau rei mo, resana, areimo atuhete osiku mai ata resana sapan. Ne sani munata sae wan uasau rei mo, manisate mo, pene asapanaku.”

²⁴ Pusi, oyo Hanas iaisosiso orori Yesus roe sio imam no ia mainae wain nanai Kayapas. Onosu hanai waron okanihoore rei tewasi.

Petrus iauhaa honu ata iationa Yesus

²⁵ Simon Petrus waimo iooi iasai asi. Oyo sio wason noi rei oasei tanui ata, “Ano mo, ia hanaie rei ne mampusue si?”

Ne Petrus iauhaa ata, “Tewa! Au mo, tewala!”

²⁶ Sio imam no ia mainae ne ia maniane isa waimo iooi noi rei. Ia rei mo, ia wain Petrus ioto roha tinai ukune hae ne mansia. Iasau osi Petrus ata, “Sinasi mo, noo sani unooa akata ia hanaie rei ria nisi saitun. Titue, tea?”

²⁷ Ne Petrus iauhaa honu. Iauhaa oyo sira tau manue retunkeko.

Pilatus iasei tau Yesus

²⁸ On punano tunne asi oi mo, sio orori Yesus on poe Kayapas oeuso roe Pilatus ne numa aia. Pilatus mo, sio Romau no gubernur. Tau rei mo, sio Yahudiu wason oamanaru Yesus rei mo, openeso onususo pani Pilatus ne numa aia. Areimo tau Pilatus mo, ia Yahudi tewala. Sio Yahudiu no monne mo, resoposo na pene onusu sio wason sio Yahudiu tewala no numa. Sani onesi na onusu, areimo oapaputi ruao. Mka oaiso tau karisaa anoma rapeka na Anahatana ihoka ma upu momou arihon otoi Mesir tewala nea.

²⁹ Reiso, Pilatus ihokai na isupuso. Oyo iasei mai tanso ata, “Iuna sana sae rotu-tu ororiki mai tanuku reini?”

³⁰ Oyo sio rei oasau ata, "Ia reini mo, ia kahatene. Reiso aroriki mai tanua reini."

³¹ Oyo Pilatus iahata, "Munata san rei mo, roriki na oapasanai pusu ruamo mo monna!"

Ne oasau ata, "Ami ma kawasa tau apasana mansia rotu-tu imatai tewa."

³² Oasau san rei na sae wan Yesus iasau rerihon mka imatai sapan rei reeu.

³³ Oyo Pilatus inusui pani ne numa honu. Oyo ioi Yesus oyo iasei tanui ata, "Titue si? Ano mo, sio Yahudiu no Ia Aia si?"

³⁴ Yesus iahata, "Asei san rei mo, arihon ruam te sio umau oaisosia ase i tanuku san rei?"

³⁵ Oyo Pilatus iahata, "Ano ata kan au rein mo, au Yahudi si? Sio wason ororia mai tanuku rei mo, ruam me mansiau na me sio imam no sio mainaya. Reiso asau mai, auna sana sae?"

³⁶ Oyo Yesus iasau osiki ata, "Au una aia mo, sio mai tuniai reini ohitiku tewa. Ne sani Au una aia, sio mai tuniai rein ohitiku, sinasi we mampusua oanahitana oneteku na pene sio Yahudiu no sio mainaya osotaku. Ne tewa. Au una aia mo, sio mai tuniai reini ohitiku tewa."

³⁷ Oyo Pilatus iasei ata, "Munata san rei, Ano rein mo, Ano Aia, tea!"

Oyo Yesus iahata, "Ano asau ata Au mo, Au Aia. Areimo titue. Uamrai mai tuniai na una Aia. Uhokaku mai tuniai rein na usima rerihoni sae wan manisate. Ia sia wain inina sae wan manisate mo, mka iatinu tau Au."

³⁸ Oyo Pilatus iasau osi Yesus ata, "Ita imaha tewa ianei sae wan manisate, tea!"

Pilatus ianamana runa Yesus pusi, oyo ihokai nau mui na ianamana na sio Yahudiu wasun nau

mui rei. Iasau osiso ata, “Uasei tanui nea ne usupu ne isanae isa tewa.

³⁹ Tau karisaa anomo rapeka na Anahatana ihoka mo upu momou arihon otoa Mesir, usaka uhoka ia isa arihon pui osimo. Reiso onina na uhoka ia wain oaoiki ‘natu tau omi Yahudiu’ osimo?”

⁴⁰ Sio panesi rei oatinu Pilatus iasau san rei oyo oakapona oasau ata, “Pene, pene hoka Ia! Hoka Barabas osima man!” Barabas mo, inusu pui tau inesi sio Romau na pene orime sio Israel.

19

Pilatus iamanaku na ororu Yesus roe hini

¹ Pilatus ianamana runa sio Yahudiu pusi, oyo inusui na pan ne numa anoe. Oyo iaisosi ne sio tantarau. Iahata, “Oeu rori Yesus na osapui.”*

² Osapu Yesus pusi, oyo opepe awane unie wan nonae, samatoro oausahui roe unui. Oyo oausahu papi naue wan msinae sani sio aiau oausahui osiki.

³ Oahata sui osa, “Tapea. Natu sio Yahudiu.” Oasapana uai anoe.

* **19:1 19:1** Tau Yesus ne naene sio Romau osapu mansia tau awane wan ounai arihon koropou nene unte. Tau awane rei rurua mo, okanihoo binatang unia te mamono waron moita. Areimo, na reuna ia wain sio osapui rei ne apata pusu ne patane. Pusu sio Romau no monna mo, sio wason sio Romau mo, pene osapuso. Ne sio maniane te sio arihon nia tamena wason ohiti nisa nnaso wason kahurae sio ohunuso mo, kahurae osapuso naone samatoro ororuso roe hini. Taua-taua iae wason osapuso asi oimo ia rei imatai nea.

⁴ Pilatus ihokai arihon ne numa anoe honu. Oyo iahata, “Noo mai! Wan uhokai osimo na oanei ata usupu ne isanae isa man tewa oi.”

⁵ Tau Yesus ihokai iausahu awane unia waron opepere roe unui na iausahu papi naue wan msinae, Pilatus iasau ata, “Noo mai, Ia reini!”

⁶ Ne sio Yahudiu no sio imam no sio mainaya runa sio tantarau wason osaka sio Yahudiu no numa mainisie onoo Yesus, oyo oakapona. Oahata, “Rorui roe hini! Rorui roe hini!”

Ne Pilatus iahata, “Om ruamo oeu ororui roe hiniu. Au mo, usupu ne isanae isa tewa.”

⁷ Sio ona Yahudiu rei oasau osi Pilatus. Oata, “Pusu Musa ne maunauna mo, kahurae hunui. Tea mo, iasau ata Ia mo, Anahatana Anai.”

⁸ Pilatus iatinu oasau ata Ia mo, Anahatana Anai oyo ikaitau hun ruai.

⁹ Reiso inusui pan ne numa anoe honu. Oyo iaisosiso orori Yesus. Oyo iasei tanui ata, “Ano mo, ano on supa?”

Ne Yesus iamaturui man.

¹⁰ Reiso Pilatus iahata, “Penea anamana na au? Aikee au we kawasa tau uhokaya te uaisosi sio ororua roe hini.”

¹¹ Oyo Yesus iahata, “Ano me kawasa mo, Anahatana sahoro iruiki osia. Reiso ano me kawasa tau Au, hasae sani Anahatana iruiki. Reiso ia wain iruiku osia sahoro ne rosa mainae renesi ano.”

¹² Pilatus iatinu san rei oyo inina arena na ialapasi Yesus. Ne sio ona Yahudiu rei oakapona sui osa oahata, “Ia seia man wain iasau ata ia mo, ia aia, areimo ia rei inesi ia Aia Mainae Roma. Reiso sani alapasi Ia reno, areimo anesi ia Aia Mainae oi.”

¹³ Pilatus iatinu sio Yahudiu oasau san rei oyo iaisosi sio tantarau na orori Yesus. Ia ruai iruei tau ne katera wani iarinii parakanau. Katera rei mo, oaoiki tau Numano Hatu. Ne tau sou Ibrani mo, nanae Gabata.

¹⁴ Tau rei mo, kani pannuhu ranie katopu. Ranie hatae rei mo, wasumo onana tau nanie ma karisaa anoma rapeka na Anahatana ihoka ma upu momou arihon otoa Mesir.

Pilatus iasau osi sio ona Yahudiu ata, “Noo mai, mo Ia Aia reini!”

¹⁵ Ne oakapona ata, “Hunui! Hunui! Rorui roe hini!”

Pilatus iasei ata, “Onina na uroru mo Ia Aia roe hini si?”

Ne sio imam no sio mainaya oahata, “Ami mo, ma aia tau Ia Aia Mainae Roma. Ma aia tamene isa tewa nea.”

^{16a} Oyo tau muie Pilatus ipusu sio Yahudiu no mau. Iaisosi ne sio tantarau na ororu Yesus roe hini.

Sio ororu Yesus roe hini

^{16b} Pilatus irui Yesus osi sio tantara Romau na ororiki nanie ororui roe hini.

¹⁷ Yesus ruai ihana ne hini on ohokaso arihon kota Yerusalem nanie oeuso roe naniake isa wani nanae Unuke Kanie. Sou Ibrani reoiki tau Golgota.

¹⁸ Hoka roe, oyo ororu Yesus roe hini samatoro oapuooi. Ororu sio kahatena ua tau hini oi. Ia isa oapuooi hae Yesus hanai wanane, ia isa honu oapuooi hae Yesus hanai pante. Reiso Yesus wain pakarema uaso tihue.

¹⁹ Pilatus iaisosiso okanu tau ai inate isa na oaunutui roe Yesus unui roe ne hini rei. Okanu

san rei, “Yesus, Ia Nasaret. Natu tau sio Yahudiu.”

²⁰ Sio Yahudiu panesi ohatae tau sae wan okanui roe ai inate rei. Areimo tau, naniake rei mo, haineke kota. Na sae wan okanui rei iae, okanui tau sou Ibrani, Latin, na Yunani.

²¹ Reiso sio imam no sio mainaya oasau osi Pilatus ata, “Kati sae waron okanui rei. Pene kanu, ‘Natu tau sio Yahudiu.’ Ne kanu, ‘Ia reini iasau ata Ia mo, Natu tau sio Yahudiu.’ ”

²² Ne, Pilatus ata, “Sae wan ukanui nea mo, rei man. Pene katiki nea!”

²³ Sio tantarau rei ororu Yesus suka, oyo onana ne apia tau tinain oyo osamare tau ate. Ia isa isupu osa. Ne ne papi naue mo, oneai. Papite rei mo, ohoniki tewa, ne orae pola on roe rurue tu-tu poe rurue.

²⁴ Reiso oasau mai umau ata, “Nene iake mo, pene ikihai nea ne mai na irehi katoite na inoo ia sia sahoru isupui.”

Rai pusire raeu sani sae waron naone okanure tau Anahatana ne anamanaya waron oasau san rei,

“Osama-sama we apia osi umau.

Orehi katoite tau we papi naue.”

Reiso ouna san sae wan okanui tau Anahatana ne anamanaya rai.

²⁵ Tau rei, Yesus inai, inai wanin, Klopas sahai wain nanai Maria, na Maria on pan nia Makdalena pusiso wasumo ooso haineke Yesus ne hini rei.

²⁶ Yesus inoo inai na au, ne mampusue wain anoi runaku, wan aooma noi rei. Iasau osi inai ata, “Ina, oni orase repan, ia mo, ano anam tau ia rei.”

²⁷ Oyo Yesus iasau osiku ata, “Saka ia pina onate reini sani inam ruai.” Reiso oni orase reini uroriki poe we numa na usakai.

Yesus Panokoi

²⁸ Yesus ianei nea ata tanei waron Anahatana iaisosiki iunare rei mo, iuna pusire nea. Ne ianei ata sio okanu tau Anahatana ne anamanaya reiso iasau ata, “Anoku kasae.”

²⁹ Noi rei potone wan oaiinui tau tihu anggur wan maninue wamo rei oi. Reiso ia isa inana nokase sanae oyo ononoi poe anggur wan maninue rei, samatoro isipai tau ai hisop sanae oyo iruiki roe Yesus sihurui.

³⁰ Yesus iahana tihu anggur wan maninue rei oyo iasau ata, “Au una pusire nea.” Oyo ikanahatai oyo watipusi nahai.

³¹ Ranie hatae rei mo, ranie hatae wani ami Yahudiu anana ma tanei apia tau anapa ma ranie hatae wan ami amuira Anahatana. Ranie hatae wan amuira Anahatana rei mo, mon mainae. Tea mo, pannuhu ami Yahudiu ma karisaa anoma rapeka na Anahatana ihoka ma upu momou arihon otoa Mesir. Reiso, sio ona Yahudiu openeso tau otapi matana rakatana roe hini. Oyo, oeu oanamana runa Pilatus na iaisosi sio tantarau na okuparehi Yesus na sio kahatena ua rei aio atua, na opanokoso on sin. Opanokoso na rapu orati no tihana hataya arihon no hiniu rai.

³² Oyo, sio tantarau oeu okuparehi sio kahatena ua wason sio ororuso roe hini okata Yesus rei aio atua naone, ia isa pusi ia isa.

³³ Ne ohokaso mai Yesus, onoo wain ipanokoi nea. Reiso, okuparehi ain atua tewa nea.

³⁴ Ne ia tantara isa isipa Yesus nusui anae tau atiene. Oyo nasi wan renehu tihu on pan reana.

³⁵ Au, Yohanis, ruaku unoo sio ohunu Yesus oyo wan usima. Sae waron usima nnare rei mo, pusire manisata. Uanei ata sae waron usima nnare rei mo, pusire manisata reiso usima osimo na omi iae oparisaa oi.

³⁶ Sio tantarau rei okuparehi ain atua tewa. Areimo, ereeu san sae wan sio okanu tau Anahatana ne anamanaya san reini, “Ne unia isa tewa oi, okuparehiki tewa.”

³⁷ Okanu san reini oi, “Mka sio onoo Ia wain osipai nea rei.”

Sio oatasin Yesus

³⁸ Ia isa wain ipusu Yesus nanai Yusup. Yusup mo, ia arihon nia Arimatea. Ne ipusu Yesus iauhun-iahunki man. Tea mo, ikaitau sio ona Yahudiu. Yesus panokoi, oyo Yusup ihokai ianamana runa Pilatus na inana Yesus ne tihane hatae. Oyo Pilatus iamanaku reiso irati Yesus ne tihane hatae on roe hini.

³⁹ Nikodemus ikatai. Nikodemus mo, ia wain naone ieu pan Yesus tau pumono rei. Tau rei, Nikodemus irori hau rihua nanie iauhene Yesus ne tihane hatae. Hau rihua rai mo, nanaya mur

runa alalasie. Onehu uare tau osa nea. Nene mtinta kilo hutu tonu nesi.

⁴⁰ Onana Yesus ne tihane hatae oyo uaso opai tau nipa ohie nene sinta na hau rihua rai pusire oi. Ouna san rei mo, repusu ami Yahudiu ma monne tau autotu matane.

⁴¹ Haineke sio ororu Yesus roe hini rei mo, nisi isa wamo. Pan nisi anoe rei mo, sio mato ouna hatu anoe isa. Hatu anoe rei mo, sio unai tau kupuro. Ne honue asi reiso oaunutu matane pan anoe tewasi.

⁴² Oatasin Yesus pan rei. Tea mo, haineke man samatoro ranie hatae rei mo, sio Yahudiu wason opatapariso osekā tau no muaina na oaunutu noi no numau na onapa no ranie hatae wani oamuiā Anahatana tau ran manne nea.

20

Yesus iamahaiki honu

¹ Tau ranie hatae wan mataanoē tau minku unue rei, nene on punano tunne, Maria on pan nia Makdalena ieui pan Yesus ne kupuro. Ihokai pan, sira tau hatu mainae wan renete kupuro rei nene mitanunue okamauniki nea.

² Reiso, iruma inina Simon Petrus runa au, Yesus ne mampusue wain anoi runaku, na isima osima. Iahata, “Sio onana Upuri ne tihane hatae arihon kupuro anoe nea. Ne ami anei tewa ata sio oaunutui sui supā!”

³ Reiso au na Petrus aeuma pan kupuro rei.

⁴ Uama aruma na pan kupuro. Ne au mo, uruma rapu unesi Petrus. Reiso uhokaku pan kupuro naone.

⁵ Hoka pan, ukanahata oyo unoo na pan kupuro anoe. Unoo nipa ohie nene sinta-sinta waron sio opa Yesus tanre rei. Ne unusu pan kupuro anoe tewa.

⁶ Simon Petrus ihoka tau muie, oyo ihuu inusui pan kupuro anoe rei. Inoo nipa ohie nene sinta-sinta waron sio opa Yesus tanre rei oi.

⁷ Inoo nipa ohie nene sinte wan ohehe Yesus unui tanui rei oi. Ne ia isa inokui nea. Rekata nipa sinta waron opa ne tihane hatae tanre rei tewa nea.

⁸ Oyo au, wan uhokaku mai kupuro naone, unusuku oi. Unusu unoo pusire rei, uparisaa ata Yesus mo, iamahaiki honu.

⁹ Ami anei tewasi ata sae waron sio okanure tau Anahatana ne anamanaya waron oasaure ata, Yesus mo, kahurae iamahaiki honu.

Yesus iatuhete ruai osi Maria Makdalena

¹⁰ Au na Simon Petrus anoo Yesus ne kupuro huie oyo anunima.

¹¹ Ne Maria Makdalena iooi haineke kupuro mai mui irani. Wain iran asi, oyo ikanahata na inoo pan kupuro rei anoe.

¹² Sira tau inoo Anahatana ne maisosia ua on roe noiyaha. Uaso oausahu papi putia. Wasuro orueso roe naniake wan sio oaunutuu Yesus ne tihane hatae rei. Ia isa iruei roe unui nahae, na ia isa honu iruei poe ain atua nahaya.

¹³ Oyo oasei tau Maria ata, “Ano pina onate, arani tau sae rei?”
Maria iasau ata, “Sio onana Upuku ne tihane hatae arihon rein nea. Samatoro uanei tewa ata oaunutui sui supan.”

14 Iasau san rei pusi, oyo iuni inoo mo, Yesus waimo iooi pan rei. Ne ianei tewa ata Ia rei mo, Yesus.

15 Oyo Yesus iasau osiki ata, “Ano pina onate, arani tau sae rei? Anina ia seia?”

Maria ata kan ia rei mo, ia mamsaka nisi rei. Reiso iasau ata, “Upu! Sani munata ano sahoro anana Upuku ne tihane hatae mo, asau osiku mai. Aunutui sui supa na ueu unanai.”

16 Yesus iasau ata, “Maria.”

Maria iuni inoo Yesus oyo iasau ata, “Rabuni!” (Rabuni mo, sou Ibrani. Nene manarti mo, Ano Ona Matuhetene.)

17 Oyo Yesus iasau osiki ata, “Pene akahuu Au. Tea mo, ununiku roe Amaku tewasi. Ne eu na sima osi we kaka wani wason oparisaa tau Au ata Au nanie ununiku roe Amaku Anahatana wain uainaa nnai. Ia iae omi mo Ama na Anahatana wain oainaa nnai oi.”

18 Reiso Maria Makdalena inuniki isima runa sae wan Yesus iasau osiki rei osi ami, ne mampusua. Iasau ata, “Unoo Upuri nea!”

Oyo isima runa sae wan Yesus iasau rei osi ami ne mampusua.

Yesus iatuhete ruai osi ne mampusua

19 Tau ranie hatae wan mataanoë tau minku unue rei wapan pumono nea. Ami ne mampusua amanouma tau numa isa. Akatunepa mitanunua pusire tau akaitau sio ona Yahudiu. Sira tau Yesus ihoka iooi kua pusima tihue oyo iasau ata, “Uainisi na Anahatana iunamo okarihuru oamahai!”

²⁰ Oyo iatuhete ne apata nahaya mai hanai na poe nusui anae rei osima. Taa anoo ma Upu san rei, oyo anoma mirika.

²¹ Yesus iasau honu ata, “Uainisi na Anahatana iunamo okarihuru oamahai. Uaisosi omi oaunau sio mai tuniai reini noo sani Amaku iaisosi Au oi.”

²² Oyo iauhona ne nusete osima iahata, “Atarima Anahatana ne Inaha.

²³ Sani anomo rasaa tewa tau ia sia man wain ipalalosa, Anahatana iae isiru heu ne rosau oi. Ne sani anomo rasaa sinia, Anahatana iae isiru heu rosau tewa oi.”

Yesus iatuhete ruai osi Tomas

²⁴ Ia isa arihon Yesus ne mampusua hutusa rahana ua rei, nanai Tomas. Sio saka oiki tau Didimus oi. Didimus mo, nene manarti Ia Iki Alaleka. Tau Yesus iatuhete ruai osi ami ne mampusua rei mo, Tomas waimo ikatama tewa.

²⁵ Reiso ami ne mampusua tamena rei asau osi Tomas ata, “Tomas! Ami anoo Upuri nea.”

Ne Tomas iahata, “Uparisaa tanumo tewa. Kahurae ruaku unoo ne paku nahaya mai hanai. Kahurae uakahuu ne apate nahaya mai hanai na unusu hanaku noi apate nahae noi nusui anae rei.”

²⁶ Nene minku unue isa renikui nea, oyo ami ne mampusua rei amanouma honu pan numa rei. Tomas iae waimo ikatama oi. Akatunepa pusi mitanunua nea. Ne sira tau Yesus iooi mai pusima tihue. Iasau ata, “Uainisi na Anahatana iunamo okarihuru oamahai.”

²⁷ Oyo iasau osi Tomas ata, “Tomas, mai na anoo we apata nahaya waron hanaku reini na

akahuure na hanam nakata. Nusu hanam mai we apate nahae wan mai nusuku anae rein. Pene anom resama-samai, ne aparisaa!”

²⁸ Oyo Tomas iahata, “Upuku! Anahatana wan uainaa nnaya!”

²⁹ Oyo Yesus iahata, “Tomas, anooku nea, reiso aparisaa. Ne mka Anahatana irui iake osi sio wason onoo tewa ne oparisaa sinia.”

Yohanis ikanu surate rein nan tahae

³⁰ Ami mampusua anoo Yesus iuna sima-simana panesi waron ratuhete ata ne kawasa arihon Anahatana warumo asi oi. Ne ukanu pusire mai surate rein tewa.

³¹ Ne waron ukanure mo, ukanure na oparisaa ata Yesus mo, Ia Aia wain Anahatana Ihitiki na Iapuheu Mansiau. Ia mo, Anahatana Anai. Ukanu rain pusire oi na oparisaa. Oparisaa na oamahaimo okatai rotu-tu ria supan tau anomo osa nnai.

21

Yesus iatuhete ruai osi ne mampusua sio itu

¹ Yesus iatuhete ruai osi ami ne mampusua suka, oyo iatuhete ruai nai osa honu osi ami umau haineke nakane wan nanae Tiberias. Areimo sani nanie uasau reini.

² Au na kakaku Yakopis*, Simon Petrus, Tomas wain sio oiki tau Didimus, Natanael arihon kota Kana wapan otoa Galilea, runa sio mampusua ua oi.

³ Oyo Simon Petrus iasau osi ami ata, “Nanie ueu upesi uete ee!”

* **21:2 21:2** Yohanis ikanu “Sebedeus ne hehuka”.

Oyo ami asau osiki ata, "Munata san rei mo, ami aeua akataya oi."

Reiso aeuma nau nakane na asaa arupai na aeua anina ikae. Ne asupu sae isa tewa nene onone hatae sepe-sepe.

⁴ Nene omnanoeranie on pan resaa nea, Yesu ioioi haineke nakane. Ne ami ne mampusua ationai tewa.

⁵ Yesu iakapona ioima ata, "We netau, osupu ikae te tewa?"

Asau ata, "Tewa!"

⁶ Oyo Yesu iahata, "Pesi mo uete rei hae arupai wanane! Mka osupu ikae."

Reiso, apesi ma uete rei hae wanane oyo asupu ikaya panesi nai osa rotu-tu anesa kua ma uete rei pan arupai anoe tewa.

⁷ Ne au uationai reiso uasau osi Petrus ata, "Ia rei mo, Upuri Yesu!"

Sinasi Petrus waimo ipakarian reiso inosu ne papi naue wan mui. Ne iatinu au uasau, "Ia rei mo, Upuri Yesu!". Oyo iausahu ne papi naue honu, oyo isoman na poe waene, oyo iōne na ria kaimenne.

⁸ Ami mampusua tamena asaa arupai na ria kaimenne anesa uete wan taue na ikaya rai. Ami hainau arihon kaimenne tewa. Kani meter utun san rei.

⁹ Ahokama ria kaimenne, anoo usa akena. Anoo ata ia isa wain ikotu ikaya poe usa akena rai. Anoo poroti wamo nea oi.

¹⁰ Oyo Yesu iahata, "Orori ikaya waron mato osupure rei use uasa te tona mai."

¹¹ Reiso Petrus isaa nau arupai oyo inesa uete rei na ria kaimenne. Uete rei mo, taue tau ika

maina-mainaya. Pusire use 153. Ne masike asupu ikaya panesi san rei iae, ma uete rei wakiha tewa.

¹² Oyo Yesus iahata, "Mai, na iaita!"

Ia sia man ne hanaya na iasei tewa ata ia mo, ia seia. Areimo tau pusima anei ata ia rei mo, ma Upu Yesus.

¹³ Yesus ihoka inana poroti oyo irui osima ai. Inana ikae oi oyo irui osima ai oi.

¹⁴ Areimo, Yesus iatuhete ruai osi ami ne mampusua nai tonu nea tau iamahaiki honu nea rei.

Yesus iaisosi Petrus na isaka sio wason oparisaa tanui

¹⁵ Yesus runa ami ne mampusua aima pusi, oyo Yesus iasei tau Simon Petrus ata, "Simon, Yohanis anai. Ano mo, anom runa Au te tewa renesi me netau reini anoo nnaku?"

Petrus iasau ata, "E-e, Upu! Ano anei ata au mo, anoku runaya."

Oyo Yesus iahata, "Munata san rei mo, apiara sio wason oparisaa tau Au rei ia-ia, nooi sani ia mamsaka rompau iapiara ne rompau."

¹⁶ Ita Yesus iasei honu ata, "Simon, Yohanis anai. Ano mo, anom runa Au ia-ia te tewa?"

Petrus iasau ata, "E-e, Upu! Ano anei ata au mo, anoku runaya."

Ita Yesus iahata, "Munata san rei mo, apiara sio wason oparisaa tau Au rei ia-ia, nooi sani ia mamsaka rompau iapiara ne rompau."

¹⁷ Ita Yesus iasei tau Petrus nai osa honu. "Simon, Yohanis anai. Ano mo, anom runa Au te tewa?" Iatinu san rei oyo anoi rekahate pusiki. Tea mo, Yesus iasei tanui nai tonu nea ata anoi runai te

tewa. Oyo iasau osi Yesus ata, “Upu, Ano anei pusire. Anei ata au mo, anoku runaya.”

Ita Yesus iasau osiki honu ata, “Munata san rei mo, apiara we mansiau wason oparisaa tanuku ia-ia, noo sani ia mamsaka rompau iapiara ne rompau.

¹⁸ Atinu mai ia-ia, nanie uasau osia. Oni ano honue mo, ruam ausahu me apia. Oyo aeua sui supan man pusu ruam me maue. Ne tau akorekorea nea mo, mka arata kihem na sio okanihoo hanam oyo ororia roe naniake wan apenea eu roe tanui rei.”

¹⁹ Yesus iasau san rei mo, tau nanie iatuhete ata Petrus, mka sio ohunui sapan, na sapani na Petrus iamuiira Anahatana. Iasau san rei suka, oyo iasau osi Petrus ata, “Mai, na pusu Au.”

Yesus ianamana rerihoni au, Yohanis

²⁰ Petrus iuni inoo mo, au wan upususo. Au sahero urue haineke Yesus tau naone arue ai karisaa ami Yahudiu anoma rapeka na ma upu momou oeu arihon otoi Mesir rei. Oyo uasei tau Yesus ata, “Upu, ia seia wain mka iahenia?”

²¹ Petrus inooku oyo iasei tau Yesus rerihoni au ata, “Upu, oyo mka sapan na ia rei?”

²² Ne Yesus iasau ata, “Ano pene unum reina na ia rei. Sani we maue mo, Yohanis ruai iamahaiki rotu-tu uhokaku honu te, tewate, areimo ano mo, pene unum reina tau rei. Ne nene iake mo, ano apusu Au ia-ia man.”

²³ Noso Yesus iasau san rei, oyo sio kaka wani wason oparisaa tau Yesus oeu oruni inamatane ria nau rotu-tu Yesus ne mampusua umau rei oatinu ata au mo, mka upanokoku tewate. Ne

Yesus iasau tewa ata au mo, mka upanokoku tewa. Ia mo, hasae iasau ata, “Sani we maue na iamahaiki rotu-tu uhokaku honu te, tewa te, areimo, pene unum reina tau rei.”

²⁴ Au rein mo, Yohanis, Yesus ne mampusue wain uruni rerihon sae man waron Yesus iunare nea rei. Au iae sahoro ukanu rai pusire tau surate reini. Au na we netau anei ata sae waron urunre reini mo, pusire manisata.

²⁵ Yesus iuna panesi asi. Ne sani ukanu pusire mo, surata panesi nai osa. Mka tuniai reini reaiinu pusire tewa.

**Anahatana ne Anamanaya tau Sou Naunue
Nuaulu, South: Anahatana ne Anamanaya tau Sou
Naunue (New Testament+)**

copyright © 2019 Wycliffe Bible Translators, Inc.

Language: (Nuaulu, South)

Contributor: Gereja Protestan Maluku

All rights reserved.

2025-05-20

PDF generated using Haiola and XeLaTeX on 19 May 2025 from source
files dated 20 May 2025

b0e8a98f-e16d-5ef2-aee1-d71416901aa6